

Én tjatsiee Jesukristoø xikó ts'en kats'én'indó

San Rkaa

1 Kjoaa nga achichí ma xt̄a xi kamámejeén índonda nga kats'én'indó kjoaa ngayeje ni xi kamá nguijinná, ²xikó ts'en akóyáná ndeskande nga ítjats'enni^j kui xt̄a xi chistiko kamá nga kamábe kojo nga mosoo eén Néná kamá. ³Nda kasasienna an nga nguije tsangase ndiyáa kóts'en kjindibáni, indonda an nga kats'en'indoó ji ndi Teofilo, ⁴tsi^le nga nda xchie ji nga jakoxi kjoaa ni xi je akakoyaá.

Bi ts'én katsáyatjón ngo ndítsjie nga stsen Jua Bautistaø

⁵Kui nixtin jan nga kamá Erodeø nda reø nanguí Judea, kis'ijña ngo chiná'mi xi 'mí Sakaria xi tsíchjia ni já chiná'mii nda xi 'mí Abíaa. Chjoón kamánii Sakaria na xi 'mí Nasabee, na xi chjiani xta tjiee nda xi 'mí Aaroøn. ⁶Ngajoó nga kixi kis'int̄soma nguindyíkon Néná kó tsint'ie'eén kjoabotíxomaä kojo kjoakitii Néná. ⁷Tanga jmí ndi kis'iejiín, ngat'a nga ndi kamá Nasabee, kó ngajoó nga je 'niú xchá.

⁸Ngo nixtin nga kui já chiná'mi xi chjiani Sakariaä kasakoo nga sa'ín kui xaá Néná xi ts'én nguiya nangoxxi, ⁹xikó kis'ie kjoaxcháa já chiná'mii, Sakariaä nda kamá nixtiin ngat'a kui kasakoo nga kui xi kui'ítií nisijen nangoxi ndikoón Néná. ¹⁰Kó ngayeje xt̄a naxindaá ndyichjiaa Néná ndítsseen nangoxxi chiboa nga tñítií nisijeen. ¹¹Kó ngo ndítsjiee Néná jatokjaá xt̄jién nga fojnií nchandikón ninga 'bítí nisijeen. ¹²Kó nga kamábe Sakariaä kui ndítsjiee achichí kijíndikoón kó katsakjonní. ¹³Tanga ndítsjiee bi katsoó:

—¡Sakaria!, ngata ndakinjín ma ji!, ngat'a Néná je tsint'ieé ji kojo chjoón nga ndyindokjoajnúu, kó Nasabee ngo ndi k'uieé, xi Juá kuít'e ja'én. ¹⁴Kó achichí tsja k'uieé jí, kojo kjín xt̄a xi tsja kamaä nga stsen kuí ndií. ¹⁵Ngat'a ndíi achichí 'niú nk'a xá xi k'uieé nguindyíkon Néná. Jmí binø kojo xán k'uíjín kó ngaskande nga tjiyá'má nga Asién Niñtiin Néná tsjanga'niúu. ¹⁶Kó achichí kjín xt̄a xi chjiani naxindá Israel xi kui xi sa'ín nga skuie Ndíaa. ¹⁷Kó kuí xí koejetjoón Néná, kó k'uieé asién niñtiin kojo nga'níuú nda chjinie'eén Néná xi 'mí Elíaa, tsi^le nga koóndaä inimaa xi na'mi kojo xi

ndi, kojo xi kitikjoa tsil'e nga kixi kama, tsil'e nga kui'íjñánda Ndianá xta naxindá xi mejeén nga sa'lín xaá.

¹⁸S'e Sakariaaq bi katsoó ndítsjee:

—¿Kó ts'en skuie ni an nga kama kui nii? Ngat'a an kojo chjoónna je 'niú xchájne.

¹⁹S'e bi katsó ndítsjee:

—Án xí 'mína Ngabrie, kó ngatsjé nixtin nga nguindyikon Néná tikón an, kó án xí kananguiyana nga k'uinijmi jí kui éntjátsi. ²⁰Kó ngot'e'ne nguiti kamájín kondókjoe ngaskande nixtin nga kama kui nii, ngat'a kis'ijinjiín énna xi kjotjosón nga kjochó nixtin.

²¹Kó xta naxindaá ndyikoyaq ndyikoyaq Sakariaaq, kó ta bi ta maq nga tá tsie kji'bondíyaá nguiya nangoxi ndikoón Néná. ²²Kó nga jataxie Sakariaa, nguiti kamájín tsichjia, kó kji'a kamákjiín kui xtaa nga ngo ni akakoo nguiya nangoxi ndikoón Néná, ngat'a ta tsja tsí Sakariaa xi kats'entíyaá nga tsichjia, kó boq ts'en kistso'bá nga kamájín tsichjia.

²³Kó nguije jatjosón nixtiin xaá, Sakariaq kiji ndi'aq. ²⁴Kó nguije ja'a kui nixtiin, chjoón Sakariaa xi 'mí Nasabee tsa'a ndi, kó ún sá nga jatjójin ndi'aq, ngat'a bi ts'en kats'énkjó: ²⁵“Boq kats'énjona Ndianá, kui nixtiin nga nimá kamaá an, tsil'e nga ja'áxín kjoasoboána nguijiin xtaa.”

Bi ts'en katsáyatjón ngo ndítsjee nga stsen Kjisoo

²⁶Xi ma jun sá, Néná katsanguiya ndítsjee xi 'mí Ngabrieq ngo ndi nangui xi chjiani Galilea xi 'mí Nasaret, ²⁷nínga tikón ngo tsakjin xongo xi 'mí Nariya xi kjie jmí xi'in 'béjíin, tanga je kichjiáá nga kuixanjo nda xi 'mí Kosiee, xi chjiani tjiee nda re Ndabii. ²⁸Kó nga ts'as'i en kui ndítsjee nínga tikón Nariyaq, bi katsoó:

—Tinde Nariyaa, achichí kjoandaq Néná ts'entsjaá!, Ndianá tikónjoo ji.

²⁹Nariyaq ta bi ta kamaá nga tsint'ié kuí eén, kó kats'énkjó mí ni xi mejeén katsó kui kjoatindee. ³⁰S'e ndítsjeeq bi katsoó:

—Nariya, ngata ndakinjín ma ji, ngat'a Néná ts'entsjaá kjoandaq.

³¹Ngot'e'ne ngo ndi x'ie ji, kó nguije stsen kuí ndi, KJISQ kuít'e ja'en. ³²Kuí xí 'niú nk'a kama xaá, kuí xí ndi Néná xi tikón ndi'ak'ajmi jan k'uiín, kó Ndianá kui xi Néná tsjaá nga kotíxoma xikoó Ndabii, kui xi xta tjiee, ³³kó ngatsjé nixtin kotíxoma naxindaá, kui xi ndi'a xta tjiee nda xi 'mí Jakob, kó kui kjoabotíxomaq jmí nixtin kjuie.

³⁴Kó Nariyaq bi katsoó ndítsjee:

—¿Kó kóts'en nga kama kui nii, xi kjie jmí xi'in tikónjojín an?

³⁵Kó ndítsjeeq bi katsoó:

—Asién Nixtiin Néná kjindibánieé ji, kó nga'niuú Néná xi tikón ndi'ak'ajmi jan ko'ómániij tjink'ieén, kuí ni nga kui ndi xí stseén ji, ndi Néná k'uiín. ³⁶Kó kojo na xingui ji xi 'mí Nasabee ngo ndi k'uiié, nda tsi je 'niú xchá, kó je jun sánií nga ya'a ndi, kui xi ndi ki'mií. ³⁷Ngat'a ngayeje nii xi kamaaq sa'lín Néná.

³⁸Kó bí katsoó Nariyaá:

—Kíie tikón an nga ná mosoo Ndianá án, kó ngats'énjona xikó kase ní.
Kó kui ndítsjee nguije katsó kui nii, kijí.

Nariyaá bí ts'én kijítsabekoón Nasabee

³⁹Kui nixtin jan, Nariyaá jastjíen kó tsá kijí nguijin naxii ngo ndi naxindá xi tikón nanguí Judea, ⁴⁰kó nga jachó, ts'as'iен ndí'aq ndá xi 'mí Sakariaa, s'e kats'éntinde Nasabee. ⁴¹Kó nga tsint'ié kjoatindee Nariyaá, kui ndi xí ya'a Nasabee iskjink'á má nguiya ngants'oá, kó Nasabee tí kji'a ts'as'iéen Asién Nixtijin Néná. ⁴²Kó 'niú má tsíchjia nga bí katsó:

—Néná 'niú kats'énchikonñé ngasee ji, nguijiin ngayeje ínchjiín, kó kats'énchikonñé ndíí nga. ⁴³¿Kó 'yání án, tsí'lé nga an kjindibátsobekonna naaa Ndiana? ⁴⁴Ngat'a nga tsint'ie an nga kini'líntinde ní, ndi xí ya'a an, iskjink'atsja má nguiya ngants'oá án. ⁴⁵Kó jacchichí ra tsjaá nga kis'ijiin ngat'a kjojtosón ni xi kí'míya nga katsó Ndianá!

⁴⁶Kó bí katsó Nariyaá:

Inímana tjíts'entsjá kjoajee Ndiana,

⁴⁷Kó asién nixtinna iskjink'á má nga tsja kamaá kjoaqá Néná xi ts'axié'ána.

⁴⁸Ngat'a an askotsijenna nga ja'ájinna, nga ndi mosoo ma an,
kíie tikón an, kó ndeskande ngot'e nga achichí ra tsjaá, katsona ngayeje tjíee xta.

⁴⁹Ngat'a achichí tsie ni xi je kats'énjona Néná xi tjiín nga'niú.

¡Tsje ja'leén!

⁵⁰Kó Néná tsjaá kjoanimatakón
ngayeje tjíee xta xi skuiendikón.

⁵¹Néná kats'énkjién tjaaq kojo ngayeje nga'niuú,
kó kats'énkjatsón ni xi kats'énkjó xta xi yí'i maá yojoo nguijin
inímaa,

⁵²Ja'áxiín xaá nga atíxoma xta xi tjiín ngayeje nga'niuú,
kó iskjinink'a xta xi nda inímaa.

⁵³Xta xi bojoó katsjaá ni,
kó xta xi chon kats'énkjítiya.

⁵⁴Asíkojo xta naxindá Israel, moso tsí'lé,
tsí'lé nga kjoa'átsjíeeen kjoanimatakoón.

⁵⁵Xikó ts'én tsíchjiajo xta xi xcháná xi 'mí Abraam kojo xta tjíee ngatsjé
nixtin.

⁵⁶Kó Nariyaá jáñ sa kamaá nga kis'ijnajo ndí'aq Nasabee, kó s'e jaskan kijí
ndí'a tsí'lé.

Bí kamá nga katsen Jua Bautistaá

⁵⁷Kó Nasabee jachó nixtin nga stsen ndíí, kó ngo ndi xi'in kis'íee. ⁵⁸Kó xta
t'a ndí'aq kojo xta xkjín, nga tsint'ié nga Néná kats'énje nga kamánimaá,
kats'éntsjajo Nasabee. ⁵⁹Kó xi ma jin nixtin, tsanguínjo kui ndíí nga

kini'aán sirkunsisioon, kó Sakariaq ikít'a ja'én xikó ki'mí na'mii kui ndií.

⁶⁰Tanga nqaq ndií bi katsó:

—Jmí, chjen nga Juá k'uin!

⁶¹Kó bi' mií Nasabee:

—Nde ngojín xtá xingui ji xi boq 'mí.

⁶²Kó kui xtaaq ta tsja tsí kats'entíyaá nga asíyaá na'mii ndií, tsí'e nga kotsoya mí ja'eén xi kui'íjñaá. ⁶³Kó Sakariaq tsí'a ngo ndi yátie xi ni'án indó, kó s'e bi ts'én kats'én'indó: "Juá k'uin ja'eén." Kó ngayeje xtaaq kijíndikoón. ⁶⁴Kó tí kji'a, kamá tsíchjia nga katjondo najen Sakariaq, kó íts'iyanií nga kats'éntsja Néná. ⁶⁵Kó ngayeje xtá t'a ndi'aá katsakjonní ni xi kamá, kojo ngayeje xtá xi síndo naxi xi chjiani nangui Judea tā soboá kuí niíj tsíchjia. ⁶⁶Kó ngayeje xtá xi tsint'ié kui niíj ja'átjó nguijin inimaa kó bi ts'lén kats'énkjó:

—¿'Yá ní boq xi kama kui ndií?

Ngat'a nga jakoxi nga'niúú Ndianá tikónjiin.

Bi ts'én katsáyatjón Sakariaq xikoó ngo chjinie'eén Néná kjoaq Juaa

⁶⁷Kó Sakariaq, na'mii kui ndií, kis'iee Asién Nixtiín Néná kó bi katsó nga tsíchjia xikoó ngo nda chjinie'eén Néná:

⁶⁸¡Nga ni'ántsja Ndianá, Néná xi tsí'e naxíndá Israel,
ngat'a je je'ekoón kó je ts'axié'á xtá naxíndaá!

⁶⁹Kó katsanguiya ngo xi 'niú tjiín nga'niú nga k'oxié'ána,
xi chjiani xtá tjíee Ndabíi, nda xi mosoo Néná,

⁷⁰Xikó ts'én tsíchjia ts'oa já chjinie'eén tsjíee ndeskande koó nga íts'iyaa.

⁷¹Nga kui xi k'oxié'ána kjoaq ngayeje kondraná
kojo nguiya tsja ngayeje xtá xi kats'ench'oná,

⁷²tsí'e nga nimá kamaa xtá xi xcháná,
kojo nga kjoá'átsjíee ni tsjíe xi índajo.

⁷³Kuí én xí jakoxi nga sa'lin an katsoó xtá xi xcháná Abraam nga tsjaná,

⁷⁴nga nguiye tindyiondée kondraná,
nga kondokon jan nga si'anxát'aa,

⁷⁵Nga ngatsjé nixtin nga tsjíe kojo nga kixi kuiyión nguindyíkon Néná.

⁷⁶Kó kjoaq jí nga 'ne, ndi ndächíi,
nda chjinie'eén Néná xi tikón ndi'ak'ajmi jan k'uiín,
ngat'a jí xí kuintjetjéen Ndianá,
nga k'uijñinde ji ndiya tsí'e,

⁷⁷tsí'e nga k'uiyée xtá naxíndaá
nga Néná k'oxié'á,
tsí'e nga kamajetakoón jeé.

⁷⁸Ngat'a nga Néná kamánimaa ñá,
nga kui xi je'ekonná ndeskande nk'a jan,

⁷⁹Tsí'e nga tsjaá ndi'í ngayeje xtá
xi síndo nínga 'niú jñoó kojo nínga tjín kjoamayaá,

tsi'lé nga kui xi kokoo ndsáko ngo ndiya nínga tjín kjoaxió.

⁸Kó kui ndíi nga kjimaxchá kis'iee nga'nuiú Asién Nixtiin Néná, kó kia kis'ijña nangui kjitiyaq ngaskande ngaako yojoo xta naxindá xi chjiani Israel.

Bí ts'én katsen Kjisoo

(*Matig 1:18-25*)

2 Kó kui níxtin jan, ndá xtitjoón Roma xi 'mí Augusto Sesaa, katsjá kjoa nga kama xki ngayeje xta xi tjín ngasondiee. ²Ndá xi 'mí Quirinioo xi tjín xá nangui Siria nga tjón tjón katjo'ó'yá xkii xtá. ³Ngayeje xtaa kijíkít'a xojon yojoo, kó kja kijí kja kijí naxindá nínga chjiani. ⁴Kó Kosiee jatjoni naxindá Nasare, xi tikón nangui Galilea, s'e kijí ndi naxindá Belen xi tikón nangui Judea, nínga katsen ndá re Ndabij, ngat'a Kosiee xta tjee ndá re Ndabij chjiani, ⁵tsi'lé nga kia sit'a xojon Kosiee kojo Nariyaq kui na xi ixánjo nga ja boá ya'a ndi. ⁶Kó nga síndo naxindá Belen, jachó níxtiin nga stsen ndíi Nariyaq. ⁷Kó kia katsen ndi xil'in xi tjoón, s'e ítsakjajón ndi njño, kó nguiya kojo nínga kjiénya choo kia yíjñaya, ngat'a jmí nguindie kasakojiín kia ndi'a nínga machjí nga tsjayojoo.

Já xí koón chotsangá bí ts'én kijíkatsijeēndi Kjisoo

⁸Kó kis'ie kui nguindiee já xí koón chotsangá xi askoon choo nga jñoó kia nguijin k'ijñaá. ⁹Kó kia, ngo ndítsjiee Néná jachókoón, kó kjoajee Néná kats'entsijen yejee, kó achichí katsakjonní. ¹⁰Kó kui ndítsjiee bí katoó:

—Ngata ndakonjín majnú, tsitsíjenjnú nga éntjátsiee kjoatsja xi ts'entsáyá an, tsi'lé ngayeje xta naxindaá boá: ¹¹Nga ngot'e je katsen naxindaá Ndabij ngo xi k'oxié'ájnú, kui xi KRISTOO, xi Ndajnú. ¹²Kó kui niij xi chiboa kamájnú: Kja sakojnú ngo ndi xí tjíxtie ní njño nga kji'ijñaya ngo kojo nínga kjiénya cho.

¹³Kó tā niján má jatokját'a kui ndítsjiee achichí kjín ngase ndítsjie xi kats'entsjajo Néná nga bí katsó:

¹⁴¡Ngat'ieé kjoaje Néná ndi'ak'ajmi jan!

¡Kó ngat'ieé kjoaxió k'ie t'ananguij xta xi ndyits'enkjatjosoón kjoandaa Néná!

¹⁵Kó nguije kijí nguiní ndítsjiee ndi'ak'ajmi jan, já xí ndyikoon chotsangaa jak'ie ja nga jan bí katsoó xkíjín:

—Tjián tsóboa naxindá Belen tjiantsitsijén ni xi kamá, kui ni xi Néná katsáyaná nga kama.

¹⁶Kó achichí tsá kijí kó kia kamábe Nariyaq kojo Kosiee, kojo ndi ndíi nga kji'ijñaya nguiya kojo nínga kjiénya choo. ¹⁷Kó nguije kamábe, ínjimi ni xi kí'mií kjoaa kui ndíi. ¹⁸Kó ngayeje xi tsint'ié kuí eén, kijíndikoón ni xi katsó já xí koón chotsangaa. ¹⁹Tanga Nariyaq inímaaq íjin ngayeje kui ni xi kamaá, kó tā kui ni kats'énkjó. ²⁰Kó kui já xí koón chotsangaa nga kijí'oyá

nguiní nínga kjindibá, katsjaá kjoaje Néná kjoaa ngayeje ni xi tsint'ié kojo ni xi kamábe, ngat'a boa kamá ngayeje ni xi ki'mií.

Bí ts'én akako ndi Kjisoō nguindyikón Néná

²¹ Kó nga jachó xi ma jin *nixtin*, kini'aán sirkunsisioon kui ndií, kó s'e KJISO ikít'a ja'én, tì kui ja'én xí katsáyatjón ndítsjeē ngeuindiē nga kōa'a ndi Nariyaa.

²²Kó nguije jatjosón nixtin nga kats'éntsjie yojoo_o nguindyik_{on} Néná, xikó ts'en ijná_o kjoakitii Moisee_o, na'mii kojo naa_a kui ndií kijíjo naxindá Jerusalén tsi'e nga kijíkakoó Néná, ²³xikó ts'en kjit'a kjoakitii Néná nínga bi tsó: "Ngayeje ndi xi'in xi tjón stsen, chjen nga ndi xí tsjee_e Néná k'uín." ²⁴kó boq_a ts'en kijíts'enk'ás'ieén Néná ngo kjoatjó xikó ts'en botixómá kjoakitii Néná nínga bi tsó: nga chjen xó nga ngo 'niú tonñá kojo tsi jó tójo si'an_k'as'ieen Néná.

²⁵ Kó kia naxindá Jerusalen kis'ijña ngo nda xi 'mí Simeon, ngo nda xi kixi kojo xi nimatakón kamá, xi ts'énkoyaq nga si'andajoon xt̄a naxindá Israel, kó Asién Nixtiin Néná tikónjiin yojoo kui ndaa, ²⁶ kó Asién Nixtiin Néná katsáyatjoón nga kjie koyajín tsi tjónjín skuie Kristoo, kui xi sanguíya Néná. ²⁷ Kó Asién Nixtiin Néná kijíjo kui nda xi 'mí Simeoón nga kijí kia nangoxii, kó kji'a nga xi xchaá ndi ndi Kjisoo kijíjo ndatsa kui, ts'i'e nga sa'ínkjatjosón xikó ts'en ts'enchjia kjoakitii, ²⁸ Kó kui ndaa tsanká ndií, kó katsjaá ndok'óchji Néná nga bi katsó:

29 Ngot'e'ne Ndia',

je jatjosón ni xi kaseyetjén ní:

Kó je kama koe'éndie ji nga kui mosoo xió koya.

³⁰ Ngat'a je kamábe an kjoa'naxié'aá,

³¹ kui xi je ik'íjninde nga kama

nguindyikon ngayeje xta naxindaá,

³² kuí xí xikoó ngo ndi'í xí sa'íntsijeen xta xi judiojín.

kui xi kama kjoajee xta naxindáa Israel.

³³Kó Na'mij̄ kojo naaq̄ ndi Kjisoo achichí kijíndikoón ni xi tjí'mí kjoaq̄ kui ndií. ³⁴Kó nda xi 'mí Simeoon kats'énchikonñé, kó bi katsoó Nariyaá naaq̄ ndi Kjisoo:

—Kui ndí bí, je **bø** ts'én kjindibáni nga kui xi **sá'ínc**ha ja kojo **sá'ínkja'**á'yaá kjín xtä xi **chjiani** naxindá Israel. Ngat'a kuí xí xikoó tsi ngo **chibøa** kama kó kjín xtä xi **sá'ínc**'o, ³⁵ **tsi'lë** nga k'lijñátsijen ni xi ndyits'énkjó inimaa kjín xta. **Tang**a ngayeje kui nii, xikó maá tsi ngo **kicha** xi kjoa'xtikjá inimaa kama.

³⁶Kó ti kia tikón ngo na chjinieén Néná xi 'mí Naana, tsakjiin nda xi 'mí Fenuel xi chjiani xta tjiee nda xi 'mí Aseer, je ta nisién 'niú tjian kamá kui xtachjoón ngat'a achichí xongo nga ixán, kó yito tsí nó kamaá nga kis'ijñajo xil'in, se k'ien xil'in, ³⁷kó je ichítie kojo kantié nijún nó tjín, kó ngatsjé nixtin nga kia kis'ijña nguiya nangoxii, nga kats'én xaá Néná nga

nixtin kojo nga nixtjien nga kats'én kjindiá kojo nga tsíchjiaa Néná.³⁸ Kui ndi tjaan tì kui chiboa jachó nga íts'yanii nga katsjaá ndok'óchji Néná kó tsíchjiajo kjoaa kui ndi Kjisoo ngayeje xta xi ndyikoyaä nga kjojt'o a xta naxindá Jerusalen.

Bí kamá nga kijí'oyá nguini naxindá Nasaret

³⁹ Kó nguije kats'énkjatjosón ngayeje ni xi chjia kjoakitií Néná, kijí'oyá nguini nangui Galilea nínga tikón naxindá tsí'e, kui xi 'mí Nasaret.⁴⁰ Kó kui ndií tā sa sá kamá xchá, kó kis'iee nga'niú, kojo kjoakjíntakón, kó kjen nga tā 'niú tsie kjoandaä Néná kis'iee.

Ndi ndachí Kjisoo bí ts'én tsíchjianjmíjo já chjiniekjoakitií

⁴¹ Kó xi xchaá Kjisoo xki nó xki nó fí s'ué paskua xi fotjo naxindá Jerusalen. ⁴² Kó nga kamá tiejó noó Kjisoo, kijí naxindá Jerusalen, xikó ts'en tikón kjoaxchqá. ⁴³ Kó nga ndyifí'oyá nguini ndi'aä nguije ja'a kui s'ueé, ndi Kjisoo kis'ijñamasien naxindá Jerusalen, kó nde kamábejín na'mii kojo naaa. ⁴⁴ Kó na'mii kojo naaa Kjisoo kats'énkjó nga Kjisoo nguijiin xtaa kia rá tso'bájin kamaá, kó je ngo nixtinnii ndiya nga ndyifí, tænga nguije tsangasejiin xtæ xi be kojo xi xkjín,⁴⁵ kasakojiín, kó kijí'oyá nguini naxindá Jerusalen tsí'e nga kia kongase.

⁴⁶ Kó xi ma jáñ nixtin kasako kia nangoxii, nga tikónjiin já chjiniekjoakitií, nga tsint'ieé kojo nga asiyaá én xí ndyichjia kui jaá. ⁴⁷ Kó ngayeje xtæ xi tsint'ieé ndi ndachí Kjisoo, achichí kijíndikoón kjoaa nga tā nisién kjímkón kojo kjoaa ngayeje ni xi tsíchjia. ⁴⁸ Kó nguije kasako Kjisoo, na'mii kojo naaa, tā bí tā kamaá, kó naaa bí katsoo:

—Ndi xiánnna, ¿ánní nga bi kijí'i ni xi kini'ínejne?, na'mii kojo an achichí boa kjimajne nga ndyimindyiséjne ji.

⁴⁹ S'e ndi ndachí Kjisoo bí katsó:

—Mí kjoaa nga an ndyimindyiséjnu'un? ¿A yajíjnú nga chjen nga ndi'aä Na'mina kotíjña an?

⁵⁰ Tanga na'mii kojo naaa kamákjíjniín kui ni xi katsó kui ndií.

⁵¹ Kó boä ts'én nijan kijijo nguini naxindá Nasaret, kó tsint'ie'é'n ngayeje ni xi ki'mií. Kó naaa ndi ndachí Kjisoo nguijin inimaa ja'átjó ngayeje nii.

⁵² Kó ndi ndachí Kjisoo kjimaxchá kó kji'beé kjoakjíntakón, kó kis'iee kjoandaä Néná kojo tsí'e xtaa.

Bí ts'én ínijmi Jua Bautistaä eén Néná

(Matig 3:1-12; Marko 1:1-8; Jua 1:19-28)

3 Nó tji'uún nga kis'ijña xá ndä xi 'mí Tiberio Sesaa, kó ndä xi 'mí Ponsio Pilatoö kis'ijña xtitjoón nangui Judea, kó Erodeë atíxoma nangui Galilea, kó nts'ie kui xi 'mí Nguiripee atíxoma nangui Iturea kojo Trakonítide, kó Lisaniaä atíxoma nangui Abilene,² kui nixtin nga kamá chiná'mi xi 'niú nk'a xaá ndä xi 'mí Anaas kojo Kaifaä, kui nixtin jan,

Néná tsíchjiajo Juaaq ndíí Sakariá kia nangui kjitiyaaq. ³kó Juaaq kijí ngayeje nangui xi síndo t'a ndejé xi 'mí Jordáan, kó ínijmi nga sätíndá xtaaq tsí'e nga sa'ínk'oyá yojoo kjoaa já xí ndyits'en, tsí'e nga si'anjetakoón, ⁴xikó ts'én kjit'a xojon xi kats'enda nda chjinie'eén Néná xi 'mí Isayaaq nínga bi tsó:

Nda'yá ngo nda xi kjandayá nangui kjitiyaaq xi bi tsó:

“T'íjñandajnúu ndiyaá Ndíaa,
tí'ankixijnú ndiyaá kui.

⁵ Ngayeje nínga konga, xíndyiándié,
kó ngayeje naxi kojo tjingui, kama són,
kó ndiya xi nkja ngájén kama naxo,
kó ndiya xi nk'aya nk'tajon kama són.

⁶ Kó ngayeje xtaaq xi skuié kui kjoa'naxié'á xi katsanguiya Néná.”

⁷Kji'a nga jataxie xtaaq tsí'e nga kastindá, Juaaq bi katsoó:

—¡Xta xi tjiee ye! ¿Yá xí boq katsójnú nga kama kuiyojnúu kjoaxchaán Néná xi je kjimatiñaá? ⁸Tasá tí'ánjnú ni xi kokó nga je kini'ánk'oyajnú yojojnú, kó ngata bijín ts'en fojintakónjnú: “¡Tjiee nda xi 'mí Abraám ndokjoa ñái”, ngat'a xiyájnú'un nga tsi Néná xi mejeén ngaskande kui ndijoo kama sa'ín xtatjíee Abraám. ⁹Kó tí je tikónda jachaq tsí'e nga kótie yaá ngaskande jamaa, ngat'a ngayeje yá xí jmí to xi nda tsjájín, bichá kó nguijin ndií jan bichijmijin.

¹⁰Kó xta kjiín bi katsó nga asíyaá:

—¿Mí ní xi si'anjne?

¹¹Kó bi katsó Juaaq:

—Xi jó chinga tjiín, ngo ngatsjaá xi jmíjiín, kó xi tjiín ni chinie, ngatsjaá xi jmíjiín nga.

¹²Tí boq tí ts'én jachókatíndá yojoo já xí foa'á'yá ton xi machjítjé ni, kó bi katsó nga asíyaá Juaaq:

—Jí Mostro!, ¿mí ni xi kama si'anjne jin?

¹³Kó Juaaq bi katsoó:

—Ngata ts'atijoín chja'áchjíjnú xikó kji'i chja'áchjíjnú.

¹⁴Tí boq tí ts'én tjín jaíjn xi bi katsó nga asíyaá:

—Kó jin, ¿mí ni xi si'anjne?

Kó Juaaq bi katsoó:

—Ngata ta'yajín ni xi chja'áxín kjoa'niujnú ni xi tjiín, tí nde ngata 'bíndisota'injíjnú, kó ngatama níjnú tón xi ni'ánjnú.

¹⁵Kó nga ngayeje xtaaq nga kijíndikoón kui níj, kats'énkjó nguijin inímaa tsi ta'a nga Juaaq xi Kristoo, ¹⁶tanga Juaaq bi katsoó ngayeje kui xtaaq:

—An, nga jakoxi ndójoa xí botindá án, tanga s'e ndibá ngo xi tjín ngaseé nga'niú tā boajíín án, kui xi ngaskande tsoboájínnna nga an skjíndóo n'i'niú tjixíndieé, kó kuí xí Asién Niixtiín Néná kojo ndií xí kotíndánijnú. ¹⁷Je ts'ényá'a nguiya tsja ni xi sa'íntsje to ndsokoan nñoo nga xín sa'ínkja'a xtjieé. Kó kjoa'átjó to ndsokoan nñoo nguindie nínga xíndyiá, kó kuíl'ítí xtjieé ngo nguijiín ndií xí jmí níxtin k'o.

¹⁸Kó kuij kojo kjín ngase kjoabotíxoma xi katsáya Juaaq nga tsíchjiajo xtaaq éntjátsiee Néná. ¹⁹Kó tì boq tì ts'én Juaaq kats'énxchánjo nda xtitjón xi 'mí Erodee, ngat'a Na'lerodiaaq tikónjo, chjoón nts'ié Erodee kui xi 'mí Nguiripee, kojo kjoaa ngayeje ni xi ndajín kji'i xi kats'én, ²⁰ngayeje kui nii, ingo ni kats'én ngase: katsanguis'ien ndoboya Juaaq.

Bí ts'én kastindá Kjisoo

(*Matio 3:13-17; Marko 1:9-11*)

²¹Kó nixtin nga ngayeje xtä naxiñdaá jachókatíndá yojoo, tì jachó Kjisoo nga, kó tì kastindá, kó nga tsléñchjiaa Néná, katjox'a ndi'ak'ajmi jan, ²²kó Asién Nixtiin Néná nga yojo ja kji'i tójo má kji'i nga kjindibánié Kjisoo, kó kanda'yá ngo nda ndi'ak'ajmi jan xi bí katsó:

—Jí xí ndi tjóna, 'niú tsjatjinna ngat'aq ji.

Kuí xi'bí xi xtä tje xi ya'anii Kjisoo

(*Matio 1:1-17*)

²³Kó Kjisoo tjín raá tsi ta kantié nó nga íts'iyaní xaá. Kjisoo kuí xí ndií Kosiee katsó xtaaq, kó Kosiee ndií Elíi, ²⁴kó Elíi ndií Matat, kó Matat, ndií Lebij, kó Lebij, ndií Melkii, kó Melkii, ndií Janaaq, kó Janaaq, ndií Kosiee, ²⁵kó Kosiee, ndií Matatíaa, kó Matatíaa, ndií Amós, kó Amós, ndií Naum, kó Naum, ndií Eslij, kó Eslij, ndií Nagaij, ²⁶kó Nagaij, ndií Maat, kó Maat, ndií Matatíaa, kó Matatíaa, ndií Semeij, kó Semeij, ndií Kosiee, kó Kosiee, ndií Judaaq, ²⁷kó Judaaq, ndií Joanaaq, kó Joanaaq, ndií Resaa, kó Resaa, ndií Sorobabel, kó Sorobabel, ndií Salatiel, kó Salatiel, ndií Nerij, ²⁸kó Nerij, ndií Melkii, kó Melkii, ndií Adij, kó Adij, ndií Kosam, kó Kosam, ndií Elmadam, kó Elmadam, ndií Er, ²⁹kó Er, ndií Josuee, kó Josuee, ndií Elieseer, kó Elieseer, ndií Joriim, kó Joriim, ndií Matat, ³⁰kó Matat, ndií Lebij, kó Lebij, ndií Simeon, kó Simeon, ndií Judaaq, kó Judaaq, ndií Kosiee, kó Kosiee, ndií Jonaan, kó Jonaan, ndií Eliakim, ³¹kó Eliakim, ndií Meleaaq, kó Meleaaq, ndií Mainaan, kó Mainaan, ndií Matataaq, kó Matataaq, ndií Nataan, ³²kó Nataan, ndií Ndabij, kó Ndabij, ndií Isaii, kó Isaii, ndií Obeed, kó Obeed, ndií Boos, kó Boos, ndií Salmoon, kó Salmoon, ndií Naasoon, ³³kó Naasoon, ndií Aminadab, kó Aminadab, ndií Araam, kó Araam, ndií Esroom, kó Esroom, ndií Faree, kó Faree, ndií Judaaq, ³⁴kó Judaaq, ndií Jakob, kó Jakob, ndií Isaaq, kó Isaaq, ndií Abraam, kó Abraam, ndií Taree, kó Taree, ndií Nakor, kó Nakor, ³⁵ndií Seruj, kó Seruj, ndií Ragau, kó Ragau, ndií Peleeg, kó Peleeg, ndií Ebeer, kó Ebeer, ndií Salaa, ³⁶kó Salaa, ndií Kainaan, kó Kainaan, ndií Arfajad, kó Arfajad, ndií Seem, kó Seem, ndií Noee, kó Noee, ndií Lamek, ³⁷kó Lamek, ndií Matusaleen, kó Matusaleen, ndií Enok, kó Enok, ndií Jared, kó Jared, ndií Maalaleel, kó Maalaleel, ndií Kainaan, ³⁸kó Kainaan, ndií Enoos, kó Enoos, ndií Seet, kó Seet, ndií Adaan, kó Adaan, ndií Néná.

Bí ts'én kachjat'ayákón Kjisoo

(*Matiq 4:1-11; Marko 1:12-13*)

4 Kó Kjisoo kis'ikitsie maá Asién Ni_xti_in Néná nga kjindibáni ndejé Jordaañ, kó Asién Ni_xti_in kijíjo nangui kjitiya_a, ²kó yichán nixtin kis'ijña kia_a, kó xindajín ndiabloo askot'ayákón. Kó jmí ni iskjiniejín kui nixti_in, kó nguije ja'a kui nixti_in, kamábojoó. ³Kó s'_e xindajín ndiabloo bí katsoó:

—Tsi jakoxi nga ji xi ndií Néná, boqa t'iin kui ndijoo nga pan ngatama.

⁴Kó Kjisoo bí katsoó:

—Je kjit'a xojon eén Néná nínga bí tsoó: “Jmí tsi ta pan tsí xi k'uijñá ni ngo xtaq, chjiénrií ngayeje ni xi tsó eén Néná.”

⁵Kó kui xindajín ndiabloo kijíjo Kjisoo ngo k'ijñá xí 'niú nk'a kó akoó ngotjón chií ngayeje nguindie nínga botíxoma xi tjín ngasondee. ⁶Kó xindajín ndiabloo bí katsoó:

—Ji tsjaq ngayeje kui nga'niuú kojo kjoajee kui xtaq naxindaá, ngat'a an je katse'eña, kó kama tsjaq ta'yaní xi mejénná nga tsjaq, ⁷tsi kosint'í ní tikóo nga sil'indikín ní, ngayeje kui niij xi tse kama.

⁸Kó Kjisoo bí katsoó:

—Chjéndiyáa xindajín Satana_a, ngat'a je kjit'a xojon eén Néná nínga bí tsoó: “Ndia xi Ne tse xí til'indikín jí, kó ta kuí tsí xi sil'in ji xaá.”

⁹Kó kui xindajiín kijíjo Kjisoo naxindá Jerusalen kó kia asiénsón nk'aq nangoxij, kó bí katsoó:

—Tsi jakoxi nga ndií Néná ji, tjaminguí yojoo, ¹⁰ngat'a je kjit'a xojon eén Néná nínga bí tsoó:

Néná sanguíya ndítsjeee tiña nínga tindyin, tsi'le nga skoón.

¹¹Kó tsja koó'niúnií,

tsi'le nga ngojín ndijo stinguí ndsaki.

¹²Kó Kjisoo bí katsoó:

—Ti bí ti tsó xojon eén Néná: “Kamájín chját'ayékín ji Ndiaa.”

¹³Kó kui xindajín ndiabloo nguije kasakojíín kóts'en skót'ayákón ngase Kjisoo, kjín nixtin kats'énkjiin yojoo.

Bí ts'én íts'iyanij Kjisoo nga kats'én xaá

(*Matiq 4:12-17; Marko 1:14-15*)

¹⁴Kó Kjisoo kijí nguiní nangui Galilea nguije 'niú ts'én_a'a Asién Ni_xti_in Néná, kó ngayeje xtaq xi síndo nangui Galilea tsíchja kjoaa kui. ¹⁵Kó Kjisoo akóyá xki ndi'a nínga ndokjoq eén Néná, kó ngayeje xtaq xi katsjaá kjoaje.

Bí ts'én kijíndikoón xtaq kjoq Kjisoo

(*Matiq 13:53-58; Marko 6:1-6*)

¹⁶Kó Kjisoo jachó naxindá Nasaret, kia nínga kamá xchá, kó ngo nixtin ndikón ts'as'ien nguiya ndi'a nínga ndokjoq eén Néná, xikó ts'en ngaá, kó

kasasien kixi nga kats'énaya xojon eén Néná. ¹⁷Kó katse'eé nga kats'énaya ngo ch'o xojon xi kats'énda nda chjinie'eén Néná xi 'mí Isayaá kó nga iskjíx'á xojoon kia má kasakoo nínga bi tsó:

¹⁸ Asíen Nixtiin Ndjaa tikónniéna,
ngat'a je katsjáxána
tsi'e nga an xi k'uinijmíi éntjátsiee ngayeje xtä nima,
katsanguiyana nga xiyáa nga je k'uítsomandé xtä xi ndyia'ya ndoboya
kojo nga tsjaá nga kámatsijeen xtä xi tika,
kojo nga k'uíndondé xtä xi ndajín tjíni'ánjo,

¹⁹ kojo tsi'e nga k'uinijmíi ngayeje xtaa kui nó ndaa Néná.

²⁰ Kó nguije íchjá kui ch'o xojoon, katsjaá nda xi tikónda ndi'a nínga ndokjoa eén Néná, kó s'e kis'ijña, kó ngayeje xtä xi síndo kiaa askotsijen ndá ndá Kjisoo. ²¹ Kó íts'iyanií nga bi katsoó xtaa:

—Ngot'e'né nga nguindyikónjnú nga je jatjosón xojon eén Néná.

²² Kó ngayeje xtaa xi nda tsichjia kjoaa Kjisoo, kó kijíndikoón kjoaa kui eén tsjatsó xi jatjo ts'oa, kó bi katsó nga asíya jak'ie ja ngajaán xkjín:

—¿A kuijín xi'bí xi ndií Kosiee?

²³ Kó Kjisoo bi katsoó kui xtaa:

—Jákoxi nga jún bi ra ndyi'míjnú'un xikó tsó kui énkjiín: "Chjinieendiki", ti jií ti'lindaye yojoo." Kó ti bi ra ndyi'míjnú nga: "Tí ti'in ji k'ie nanguii, ni xi kanda'yájin kjoaa ngayeje ni xi kamá naxindaá Kapernaum."

²⁴ Kó bi katsó ngase Kjisoo:

—Jákoxi ni xi xiánjnú'un nga ngojín nda chjinie'eén Néná xi ndats'én xcha ti kui nanguii. ²⁵ Tanga jákoxi ni xi xiánjnú'un nga achichí ínchjín k'án xi je k'ien xi'ljin kis'ie ne naxindá Israel kui nixtin nga kis'ijña nda chjinie'eén Néná xi 'mí Elíaa, kji'a nga jmí stsé tsá'ájin ján nó kojo jun sá, kó achichí kjindiá kis'ie ngayeje ngasondiee, ²⁶ kó nde ngojín kui ínchjín k'aán xi chjiani naxindá Israel xi kananguiyachoón Elíaa, ta ngo tsí chjoón k'án xi asíkojo xi chjiani naxindá Sarepta, nanguii Sidoon. ²⁷ Kó ti boá ti ts'én kia naxindá Israel kjín má xtä xi tjiín chi'in xi ts'enkjátsón tjixin yojoná kis'ie kui nixtin jan nga kis'ijña nda chjinie'eén Néná xi 'mí Eliseoog, tanga nde ngojín kui jaá xi kamátsjie, ta kui tsi nda xi 'mí Naamaqan xi chjiani nanguí Siria.

²⁸ Kó nga tsint'ié kui nii kui xtaa xi síndo nguiyaa ndi'a nínga ndokjoa eén Néná, achichí kats'énxchán. ²⁹ Kó jastjíen kui xtaa, kó tsanga tjinguii Kjisoo nguijin naxindaá kó kijíjo ngo tjingui nínga tikón xoó kui naxindaá, tsi'e nga kia k'oju mingui. ³⁰ Tanga Kjisoo ja'ájin masien masieen nguijiín kui xtaa, s'e kijí.

Bi ts'én kats'éndaya Kjisoo ngo nda xi tjiíjin ásién nixtin xi ndajín
(Marko 1:21-28)

³¹ Kó Kjisoo kijí Kapernaum, ngo ndi naxindá xi chjiani nanguí Galilea, kó nga nixtin ndikón akóyaá xtaa. ³² Kó xtaa kijíndikoón xikó ts'en akóya Kjisoo, ngat'a tsichjia xikó maá ngo nda xi tjiín xá.

³³Kó kia ndi'a nínga ndokjoa eén Néná kis'tijña ngo nda xi tikónjiin ngo asién nixtin xi ndajín, kó 'niú askandáya nga bí katsó:

³⁴—¿Mí xí tjiín kjoaa jin, Kjisoo xi chjiani Nasaret? ¿A je kjoé'e ni'líkjéjne? Je be an nga ji xi xta tsjíee Néná.

³⁵Kó Kjisoo kats'énxchánjo kui asién nixtin xi ndajiín nga bí katsoó:

—¡Se ni'ín ji, kó tjtaxiejiin nguijin yojoo kui ndaa!

Kó kui xindajíin ts'ajmitójó kui ndaā nguindyikon ngayeje xtaā, kó s'e jataxiejiin nguijin yojoo kó kats'én'ónjiín. ³⁶Kó ngayeje xtaā nga kijindikoón, kó jak'ie ja nga jan bí katsoó xkjin:

—¿Mí eén xi'bí, nga kui ndaā tjiín xá kó tjiín nga'niú nga botixómaá asién nixtin xi ndajiín kó foto?

³⁷Kó ngayeje nguindie xi síndo t'a kui nanguii nga kandokjoa kjoaa Kjisoo.

Bí ts'én kats'éndaya Kjisoo nchi'yaá Peé kojo kjín xta xi oon

(*Matiq 8:14-15; Marko 1:29-31*)

³⁸Kó s'e Kjisoo jastjíen kó jatjo ndi'a nínga ndokjoa eén Néná, kó kijí ndi'ā nda xi 'mí Ximoo. Nchi'yaá Ximoo achichí nt'e ndyiaā, kó 'niú kichjiá'a Kjisoo kjoaa kui xtachjoón. ³⁹Kó Kjisoo kixixtien ngasón nínga kji'líjña kui xtachjoón kó kats'énxchánjo nt'ee, kó katjo'óxín, kó tjien má jastjíen kui xtachjoón, s'e kats'énseén kui jaá.

Kjisoo bí ts'én kats'éndaya kjín xta xi oon

(*Matiq 8:16-17; Marko 1: 32-34*)

⁴⁰Kó nga ts'atjé ts'ueé, ngayeje xta xi tjiín xkjin xi tjiín chi'in xi k'ie xi ngaján jachóchinií Kjisoo, kó kui kats'énjo nga ngo nga ngo kui xtaā, kó kamándayaā. ⁴¹Kó kjín má kui xtaā xi jataxiejin nguijin yojoo xindajín, xi askandáya má nga bí katsó:

—¡Jí xí ndií Néná ji!

Tanga Kjisoo kats'énxchánjo, kó katsjandiéjiín nga tsíchjia, ngat'a ja boaa je be nga Kjisoo xi Kristoo.

Bí ts'én ínijmi Kjisoo eén Néná nangui Galilea

(*Mr 1:35-39*)

⁴²Kó nga kisisiéen, jataxie Kjisoo kó kijí ngo nguindie xi kjitiya, kó xtaā tsangase, kó nga jachókoón nínga tikón, kamámejeén íjña'niú ts'i'e nga kui'íjñámasiénjín. ⁴³Tanga Kjisoo bí katsó:

—Tí chjien nga k'uñijmi án kje'e naxindá kui éntjátsjee xi chjia kjoaa nínga botixómá Néná, ngat'a kuí xá kananguiyana.

⁴⁴Kó boaa ts'én Kjisoo ínijmi eén Néná ndi'a nínga ndokjoa eén Néná xi síndo nangui Judea.

Bí kamá nga kjín tjo kjýaá

(*Matiq 4:18-22; Marko 1:16-20*)

5 Ngo ndiya nga tikón t'a Kjisoo nguindio tsie xi 'mí Jenesaret, achichí xtà kamátikónié xi kamámejeén kint'ié eén Néná. ²Kó Kjisoo kamábe jó tjotso je t'a ndaá, kó já xí tsoboa tjo jatjajen nga ndyimoniéjón nda'yaá. ³Kó Kjisoo ts'as'iен nguiya tjotso jee nda xi 'mí Ximoo, kó ts'i'aá nga sanguíñña chií nguijin ndójoaa, kó kis'ijñaya nguiya tjotso jee, kó kia nguiya tjotso jee íts'iyanií nga akóyaá xtà kjiín. ⁴Kó nguije kamaá nga tsíchjia, Kjisoo bí katsoó Ximoo:

—T'enje ji tjotso jee nínga 'niú nangaa nguindio kó kia tjienjnú nda'yajnú, tsi'e nga kjoyajnú tjo.

⁵Kó bí katsó Ximoo:

—Mostro', nga ngo nixtjién ikjianje nda'yajne, kó nde ngo tjo kjíyajnínjé, tanga tjienga ji xi boà t'íse, kuijen an nda'yaá.

⁶Kó nguije yején nda'yaá, achichí tjo kjýaá, ngaskande katjondiyájo má nda'yaá. ⁷Kó yejeén tsja nga tsíchjiaa já xí tjimájo kje'e tjotso je, tsi'e nga kijíkasikójo, kó jachó kui jaá, kó íkitsie ngajó tjotso jee nga ta nguichí chajaá nga matingándá má. ⁸Kó nguije kamábe kui nii nda xi 'mí Ximo Peé, asiént'aá tikoó Kjisoo kó bí katsoó:

—¡Tjitaxínt'e ní Ndia', ngat'a xtajé án!

⁹Ngat'a Ximoo kojo já xí ngaseé achichí katsakjonní kjoaa kui tjo xi boà nda kjýaá, ¹⁰tí boà tí kamaá Sandiyaá kojo Juaá, ndíí nda xi 'mí Sebedeoó, já xí nijan tso'bájo tjo Ximoo, kó Kjisoo bí katsoó Ximoo:

—Ngat'a ndakinjín ma, ngat'a ngot'e'ne nguiti tjojín xi kondoboe, xtà xí k'uitíkí.

¹¹Kó nguije kijíjo tjotso jee t'a ndaá, kia íjñamasien ngayeje ni xi ndyiy'a, kó s'e kijítjinguii Kjisoo.

Bí ts'én kats'endaya Kjisoo ngo nda xi tjiín chi'in xi ts'enkjátsón tjixin yojoná

(*Matiq 8:1-4; Marko 1:40-45*)

¹²Kó ngo ndiya nga tikón Kjisoo ngo naxindá, kia jachókoón ngo nda xi tjiín chi'in xi ts'enkjátsón tjixin yojoná, kó nga kamábe Kjisoo kis'ijñaxtien ngaskande nga jachót'aá kjen t'ananguii, kó 'niú ts'i'aá nga bí katsoó:

—Ndia', tsi mejeén, kama tíintsjiejínní chi'inna.

¹³Kó s'e Kjisoo yejénnié tsja kó kats'enjo, nga bí katsoó:

—¡Mejénnna, ngatama tsiejón chi'in!

Kó tí kji'a kichajá chi'in xi koon kui ndaá. ¹⁴Kó Kjisoo 'niú ts'i'aá nga bí katsoó:

—Ngat'a 'yájín xi 'míyée, tasá t'enchíin chiná'mii kó takeé yojoo, kó te'é ji ngo chjie nga je kamátsziejón ji xikó katsó Moisee nga atíxoma, tsi'e nga skuié nga je kamándaya ji.

¹⁵Tanga tā sa sá 'niú kamáya ngase ni xi kats'én Kjisoo, kó achichí xtā kamátikó xi tsint'ieé ni xi katsó, kojo xi jachókoón tsil'e nga sa'índaya chi'in xi koon. ¹⁶Tanga Kjisoo tsangasendie nga kijít'axín ngo nguindie nínga jmíjín xi tjín nga kijíchjiaq Néná.

Bí ts'én kats'éndaya Kjisoo ngo ndā xi majín fí

(*Matiq 9:1-8; Marko 2:1-12*)

¹⁷Kó ngo nixtin nga ts'énbokoyá Kjisoo, kó kia kis'indojuín já fariseō kojo mostroō kjoakitií xi kjindibáni ngayeje ndi naxindá xi chjiani nangu Galilea, kojo nangu Judea kojo naxindá Jerusalen. Kó nga'níuú Néná kis'ijñajíiñ Kjisoō nga kats'éndaya xtā xi oon. ¹⁸Kó kia jachó já xí ndiyiya'a ngo ndā xi njmā xi majín fí xi je tā ngo unction kji'ijñasón, kó kui jaá kamámejeén kijijo ngaskande nguiya ndi'a nínga tikón Kjisoō kó kia koójñá nguindyikon. ¹⁹Kó nga kasakojiín ná xtien sa'ínk'as'ien ngat'a achichí xtā xi tjín, kats'énkijin kui ndā xi oon nk'aq ndi'aq, s'e ngo tixa kats'lénda, nínga kats'énkjatjajen unction xi kji'isón kui ndā xi oon, kia ngamasieen xtaa, kó nguindyikon Kjisoō yíjñá. ²⁰Kó nga kamábe Kjisoō nga s'ijiín kui jaá, bí katsoó nda xi njmā:

—¡Ji nda!, jéé je kini'ánjetakoón!

²¹Kó s'e já chjiniekjoakitii kojo já fariseoō bí ts'én yíjin kon: “¿'Yá ní kui ndaā nga Néná ch'o tjítsoó? ¿'Yá ní xi kamaā sa'ínjetakón ngo jé, a mí tsí ta kuí tsí Néná?”

²²Tanga Kjisoō kamákjiín ni xi kats'énkjó kui jaá, s'e bí katsoó:

—¿Mí xí ndyini'ánkjójnú nguijin inimajnú? ²³¿Mí ní xi ni'línjín kji'i nga k'uín, a nga bí k'uín: “Jéé je kini'ánjetakoón”, axā nga bí k'uín: “Tisítjin kó t'en ji”? ²⁴Tanga tsil'e nga xchajnú nga ndií ndā xil'in tjiín nga'níu kuí t'ananguii tsil'e nga kamaā sa'ínjetakón jé.

Kó s'e bí katsoó ndā xi majín fí:

—Tisítjin, chjábe unction kó t'en ndi'aq.

²⁵Kó tij kji'a, ndā xi njmā jastjien nguindyikon ngayeje xtaa, kó iskjibe unction xi kis'iesón, s'e kijí ndi'aq nga katsjaá kjoaje Néná. ²⁶Kó ngayeje xtaa kijindikoón kó katsjaá kjoaje Néná kó achichí katsakjonní nga bí katsó:

—Ngot'e'ne je kamáya ngo ni xi tā nisién 'niú kijíndikonné!

Kjisoō bí ts'én tsíchjiaq Lebii

(*Matiq 9:9-13; Marko 2:13-17*)

²⁷Kó jaskan nguije kamá kui nii, Kjisoō jataxie kó s'e askotsijen ndá ndaá ngo ndā xi foal'á'yá ton xi machjítjé ni, Lebii 'mí kui ndaā kó kia tikón t'a yamíxá nínga machjítjé nii, kó Kjisoō bí katsoó:

—Ndibéjtjinguiní.

²⁸Kó Lebii jastjien kó ijñámasien ngayeje ni xi tjits'én, s'e kijítjinguii Kjisoō.

²⁹Kó Lebij ngo s'ué 'niú kats'eén Kjisoo kia ndi'aq, kó kjín já xí foa'á'yá ton xi machjítjé ni, kojo kje'e xta xi nijan kis'indot'ajo yamíxq. ³⁰Kó já chjiniekjoakitii kojo já fariseeo tsichjiata'in xta tsle Kjisoo nga bi katsó:

—¿Mí kjoa nga jún ndyichiniejo kojo ndyi'l'yójojnú xta xi foa'á'yá ton xi machjítjé ni kojo xtajé?

³¹Kó Kjisoo bi katsoó:

—Xta xi nda, jmí chjiniendiki chjiénjiín, kuí xí oon xi chjieén chjiniendiki. ³²Kó án jmí xta xi kixi jé'e chjiáqan, xtajé xí jé'e chjiáa, tsle nga sa'ínk'oyá yojoo.

Bí ts'én akasíyaá Kjisoo kjoa kjindiaá

(*Matiq 9:14-17; Marko 2:18-22*)

³³Kó s'e kui jaá bi katsoó Kjisoo:

—¿Mí kjoa nga xta tsle Juua kojo já fariseeo kjín ndiya ts'enkjá'a kjindiá yojoo kojo achichí chjiáa Néná, tanga xta tse ndyikjinie kojo ndyi'bi kui?

³⁴Kó Kjisoo bi katsoó:

—¿A kamájnú sí'ankja'ájnú kjindiá xta xi tjimá ngo ndi'ibixan, tjienga nda xi kuixaq kia tikónq? ³⁵Tanga nga kjochó nixtin nga xtjo'óxiín nda xi kuixaq, kó kui nixtiin nga kama k'uindo kjindiá.

³⁶Kó Kjisoo ti boa ti ts'én katsáyaá ngo énkjín:

—Ngojín xta xi kotie chií njñoo ngo xtji tjatsie, s'e koóyaá nga kui'íxtiό ngo xtji xchá, tsi boa sa'ín, jmí tsi ta skjíndiyá tsí ngase xtji tjatsiee, ngat'a kojo kui xii njño tjatsiee ndajín kokiín xtji xchaá. ³⁷Ti nde ngojín xta xi kuindyá bino tjatsie ngo tijitjixín xchá, ngat'a tsi kje'e ts'én, bino tjatsiee skjíndiyá tijitjixín xchaá, kó binoo kojo tijitjixíin jmí chjí kamajínni. ³⁸Kuí ni nga bino tjatsiee tijitjixín tjatsie kuindyia. ³⁹Kó nde ngojín xta xi je kats'e bino xi je tsie ndyia ni, s'e jaskan bino tjatsie kamamejeén, ngat'a bi tsó: "Bino xchaá nda ngase 'yó."

Bí ts'én tsichjiá Kjisoo kjoa nixtin ndikoón

(*Matiq 12:1-8; Marko 2:23-28*)

6 Kó ngo ndiya nga nixtin ndikón, Kjisoo ja'a ngo nguindie nínga tjiitjie to ndsokoqan nño, kó xta tsle tsatíe ntíin to ndsokoqan nñoo kó nguiya tsja kats'engaya, s'e iskjinie kui too. ²Kó tjín já fariseeo xi bi katsó:

—¿Mí kjoa nga ndyini'ánjnú ngo ni xi tsjandiejín kjoakitii nga ni'án nga nixtin ndikón?

³Kó Kjisoo bi katsoó kui jaá:

—¿A nde kini'ányajínjnú ni xi kats'én Ndabij ngá kamábojoó kui kojo xta xi tso'bájo? ⁴¿Kó ts'en ts'as'ién ndi'aq Néná, kó iskjinie kui kojo xtaa pan xi je kini'ánk'as'ieen Néná, kui xi tsjandiejín kjoakitii nga skjinie kui kojo xtaq, kó ta kuí tsí já chiná'mijj xi ma kjinie, kó iskjinie kó ti katsjaá xta xi tso'bájo?

⁵Kó bi katsó ngase Kjisoo:

—Ndií nda xi*lín* ngaskande kui botixómaá nixtin ndikoón.

Bi ts'én kats'éndaya Kjisoo ngo nda xi kixíya tsja

(*Matiq 12:9-14; Marko 3:1-6*)

⁶Kó bi kamá kje'e nixtin ndikón, Kjisoo ts'as'iен nguiya ndi'a nínga ndokjoa eén Néná kó akóyá, kó kia kis'ijña ngo nda xi kixíya tsja xi kixii, ⁷kó já chjiniekjoakiti kojo já fariseoo ndyikonda'ma Kjisoo, tsil'e nga skui tsi sa'líndaya kui ndaq nga nixtin ndikón, tsil'e nga boq ts'én sakoó ngo kjoa nga koónguítal'in. ⁸Tanga Kjisoo kamákjiín ni xi ndyits'énkjó kui jaá, kó bi katsoó nda xi kixíya tsja:

—Tisítjin, kó k'le tindyin ngamasieen.

Kó kui ndaq jastjén s'e kasasien kixi. ⁹Kó Kjisoo bi katsoó xta xi ngasee:

—Ngo ni kosiyajnú'un: ¿Mí ní xi tsjandié kjoakiti nga ma nián nga nixtin ndikón: a ni xi nda, axa ni xi ndajín? ¿A ko'naxié'á, axa si'anck'ién ngo xta?

¹⁰Kó askotsijeen xta xi ja'atjiyajoon, kó bi katsoó kui ndaa:

—Tjintie ndse.

Kó kui ndaq boq kats'én, kó kamándaya tsja. ¹¹Kó kui já chjiniekjoakiti kojo já fariseo xi ngasee achichí kats'énchán, kó íts'ijanii nga askjoyá mí ni xi sa'lín kjoaa kondraa Kjisoo.

Bi ts'én ja'ájin Kjisoo nga tiejó já apostroo

(*Matiq 10:1-4; Marko 3:13-19*)

¹²Kui nixtin jan, Kjisoo kijí ngo tjingui nga tsíchjiaa Néná kó kia ja'aa ngo nixtjén nga tsíchjiaa Néná. ¹³Kó nga kisisiéen, tsíchjiaa ngayeje xta tsil'e, kó tiejó má já xí ja'ájin xi já apostro katsoó nga. ¹⁴Kuí xi'bí nga tiejó já xí ja'ájin Kjisoo: Ximoo, nda xi tì Peé katsoó nga, kojo nda xi 'mí Jandree, nts'ie Ximoo, kojo Sandiyaá, kojo Juaa, kojo Nguiriipe, kojo Bartolomee, ¹⁵kojo Matioo, kojo Tomaq, kojo Sandiyaá ndií nda xi 'mí Alfeoo, kojo Ximoo nda xi chini ki'mií nga, ¹⁶kojo Judaa nts'ie nda xi 'mí Sandiyaá, kojo Judaa Iskariotee, nda xi jaskan atíñá Kjisoo.

Kjisoo bi ts'én akóyaá kojo kats'éndaya kjín xta

(*Matiq 4:23-25*)

¹⁷Kó Kjisoo jatjafen ngeuní kia tjingui kojo xta tsil'e kó kia nínga soón kixindyia, nga achichí má xta xi kis'intsoma tjingui xi chjiani ngayeje nangui Judea, kojo naxindá Jerusaleñ kojo naxindá xi tikón t'a ndachíkoón xi 'mí Tiro kojo Sidon, ¹⁸xi jachókint'ieé Kjisoo kojo tsil'e nga sa'líndaya chi'in xi tjiín, kojo kui xta xi tsie kjoanima ja'a tangat'anii asién nixtin xi ndajiín, ti boa ti ts'én kamándaya nga. ¹⁹Kó ngayeje xtaa nga kamámejeén kats'énjo Kjisoo, ngat'a ngo nga'niú jatjoo yojoo xi kats'éndaya ngayeje xtaa.

**Bí ts'én akóyá Kjisoo kjoaa 'yá xtä xi tsja tjiín kojo xi tsjajín
tjiín nguindyikón Néná**

(Matig 5:1-12)

²⁰Kó Kjisoo askotsijeen xtä tsí'e, kó bí katsoó:

—Achichí rä tsjajnú jún xi nímajnú, ngat'a tsajún boá nínga botixómá Néná.

²¹'Achichí rä tsjajnú jún xi bojójnú ngot'e, ngat'a s'e stsiejnú.

'Achichí rä tsjajnú xi ndyicha'ájnú ngot'e, ngat'a s'e kojnojnú.

²²'Achichí rä tsjajnú nga xtaaq sa'linch'oijnú, kojo nga kongatjínguijnú, kojo nga ch'o katsojnú kojo nga ch'o kamaaq ja'énjnú xikoó ngo ni xi ndajín, tangat'anii ndií nda xí'iin. ²³Tsja ngatamájnú kui nixtin jan kó tsja ngat'iejnú, ngat'a ta nisién je ni xi sakojnú ndi'ak'ajmi jan, ngat'a boá ti ts'én kui xtä xi xchaá kui xtaaq boá kats'énjo já chjinie'eén Néná.

²⁴'Tanga, xix'ianjnú jún xtä xi chon, ngat'a je kis'iejnú kjoani'ándajonjnú jún.

²⁵'Xix'ianjnú jún xi ngot'e kitsiejnú, ngat'a s'e kama bojójnú.

'Xix'ianjnú jún xi ngot'e ndyimojnú jún, ngat'a s'e on kamájnú kojo s'e xcha'ájnú.

²⁶'Xix'ianjnú jún kji'a nga ngayeje xtaaq ndats'én kuichjia kjoaa jún, ngat'a xtä xi xchaá kui xtaaq boá ti ts'én kats'énjo já chjinie'eén ndísoó.

Bí ts'én akóyá Kjisoo kjoaa nga ni'án ngojo

(Matig 5:38-48; 7:12)

²⁷'Tanga jún xi ndyinda'yajnú'un, bí xiánjnú'un: Tjó ti'ánjnú xtä xi kondrajnú, nda ti'anjojnú xtä xi ch'oo jún, ²⁸ti'anchikonñéjnú xtä xi ch'o tjitsójnú, chjia'atjéjnú Néná kui xtä xi kuichjiata'injnú. ²⁹Tsi tjín xí kot'a ngo t'anjin, te'ée nga kot'a xi ingoo nga, kó tsi tjín xí kjoa'áxiín njño xi kjit'a ngaxten, te'é chingáa nga. ³⁰Ta'yaní xi kui'aq ngo ni, te'ée, kó tsi tjín xi kjoa'áxiín ni xi tse, ngata chjíe'éjiín nga tsja'lyá nguinií. ³¹Kó xikó ts'en mejéjnú nga sa'línjojnú kje'e xtä, boá ti ti'anjojnú xtaa.

³²'Ngat'a tsi ta kuí tsí xtä xi tjoó jún xi si'antjójnú, ¿mí kjoanda xi tjínjnú? Ngat'a ngaskande xtajeé ts'entjó xtä xi ndyits'entjó kui. ³³Kó tsi ta kuí tsí xtä xi nda sa'línjojnú xi nda si'anjojnú, ¿mí kjoanda xi tjínjnú? Ngat'a ngaskande xtajeé ts'én kuí nii. ³⁴Kó tsi ta kuí tsí xtä xi si'ankíyajnú xi ndyichiayjnú nga tsja nguinijnú, ¿mí kjoanda xi tjín kui nii? Ngaskande xtajeé ts'énkíyaá ngo ni xkjín, nga ndyikoyaá nga ingo boá kji'i tsja nguinií xkjín. ³⁵'Tanga jún chjien nga si'antjójnú kondrajnú, kó nda ti'anjojnú, kó ti'ankíyajnú ngo ni, nga jmí tsi xchiyajnú nga kje'e ni koe'é nguinijnú, kó boá ts'én nga sakojnú ngo kjoanda xi 'niú je, kó jún, ndií Néná xi tikón ndi'ak'ajmi jan kamájnú, kui Néná xi nda ts'énjo xtä xi bejín ni xi nda ni'ánjo kojo xtä xi ndajín ndyits'en. ³⁶Chjien nga nímatakón ngatamájnú, xikó ts'en njima maä Na'mijnú.

Bí ts'én akóyá Kjisoo kjoaa nga ndikón nga fonguita'in je ngo xta
(Matiq 7:1-5)

³⁷'Nga fonguita'injínjnú je ngo xta, kó Néná t̄axkiya skjiníniéjínjnú ngo je. Nga ni'ánjéjínjnú ngo xta, kó Néná sa'línjéjínjnú jún.

Tí'anjetakónjnú xínguijnú, kó Néná bōa ts'én sa'línjetakónjnú nga.

³⁸Te'jénúu ni xi kama chjieén ngo xta, kó Néná tsajjnú ni xi kama chjiéjnú jún. Tsajjnú ngo stsa chiboa xi s'íktsie má nga 'niú xíndiyá. Ngat'a tí kuij yachíboa xi si'ankjiéjnú nga x'ichiboañjú, tí kuij xi si'ankjiéjn nga x'ichiboañjú jún.

³⁹Kó Kjisoo katsáyaá ngo énkjín xi bí tsó:

—¿A kamaríí ngo nda xi t̄ika kokoō ndiya kje'e nda xi t̄ika? ¿A mí tsí ngajoó nga kuixoya ngo t̄ixa? ⁴⁰Nda xi tjibókoyaá 'niújín ngase kamaa ta boajínni mostroo, t̄anga nguije akakoyaá kui ndāā bōa tí ts'én kamaa xikoó mostroo.

⁴¹'Ánní nga xtjié xi kjingui ndyikon nts'ie titsitsijiin, kó yéjín ji yá xí kjingui ndyikin ji? ⁴²¿Axa kóts'en ma takín nga bi sée nts'ie: "Nts'ie", te'éndiéni nga k'oxié an xtjié xí kjingui ndyikin, nga yéjín yá xí kjingui ndyikin ji"? ¡Jókjen!, tjón ma ra 'naxié ji yá xí kjingui ndyikin, s'ē nda kamatsijeen tsílē nga xchie ji xtjié xí kjingui ndyikon nts'ie.

Bí ts'én akóyá Kjisoo kjoaa xikó ts'en ya xtaa
(Matiq 7:17-20; 12:33-35)

⁴³'Ngojín yá xí nda, xi to xi ndajín koajaa, tí nde ngojín yá xí ndajín, xi to xi nda koajaa. ⁴⁴Ngat'a nga ngo nga ngo yaá ya kjoaa to xi tsjaá, ngat'a ngojín yá nda'yá xí to igoo koajaa, tí nde ngojín yá sarsā xi tostsije koajaa. ⁴⁵Nda xi ndaa, ni xi nda 'boxié xi tikónjiin nguijin inimaa, kó nda xi ndajiín, ni xi ndajín 'boxié xi tikónjiin nguijin inimaa, ngat'a ni tsie xi tjiín nguijin inimaa kuí ni xi chjia ts'oa.

Bí ts'én ijná chiboa Kjisoo kjoaa jó já xi kats'énda ndi'aa
(Matiq 7:24-27)

⁴⁶'Mí kjoā nga jún, "Ndia!", "Ndia!" ndyi'míjnú'un, kó ni'ánjínjnú ni xi xian an? ⁴⁷Ngayeje xta xi ndibakónna, kó nt'ié énna kó ts'enkjátjosón, k'ie xiyájnú'un xikó kón: ⁴⁸Xikónií ngo nda xi kats'énda ngo ndi'a, kó tjón kats'énda ngo t̄ixa xi nāngā, kó ítjats'ennií xoó ndi'ā ngasoón ngo ndijo xi je, kó nga kamá je ndejeé, ndójoā ye'ét'a xchaán kui ndi'ā, t̄anga nde kats'éntíyajiín, ngat'a ngasoón ngo ndijo kamánda. ⁴⁹T̄anga xi tsint'ié kó kats'énkjatjosónjín, bōa fóyaniī xikoó ngo nda xi kats'énda ngo ndi'a ngasoón t'ananguii kó jmí xó ítjats'enjín niī nga kats'énda, kó nga kamá je ndejeé, ndójoā ye'ét'a xchaán ndi'ā, kó t̄jién má ts'áka, kó tsie ni xi je.

Bí ts'én kats'éndaya Kjisoo ngo mosoo nda nguitokoo jajuún

(Matiq 8:5-13)

7 Nguije kamaá Kjisoo nga tsichjiajo xta naxindaá, kijí naxindá Kapernaum. ²Kó ngo mosoo nda nguitokoo jajuún, xi achichí tjoó ndajíntjiín kó je mején mak'i'en. ³Kó nga tsint'ié kui nda nguitokoo jajuún kjoaa Kjisoo, katsanguiya chiboa xtá xi xchá judioo tsí'lé nga 'niú tsí'áa Kjisoo nga kjindibá ts'endáya kui mosoo. ⁴Kó kui xtá xi xchaá jachókoón Kjisoo, kó 'niú tsí'áa nga bí katsoó:

—Nda inimáa kui ndaq, tsobárií nga kosikeje, ⁵ngat'a tjórií naxindájne, ngat'a kuí xí kats'éndajne ndi'a nínga ndokjoa eén Néná.

⁶Kó Kjisoo kijijo kui xtá xi xchaá. Tanga nguije makjachó má ndi'aá, nda nguitokoo katsanguiya já amingoo xi bí katsoó Kjisoo:

—Ndíá', mejénjínna sa'inxtíí, ngat'a nde tsoboájínna nga kuitjás'in ji ndi'aná, ⁷kuí ni ngaskande kamajín nga án má xi kijíkja'aá, tangá ndokjoe ji ngo én kó kāmandaya mosona. ⁸Ngat'a tì boá tì ts'én tì an tjínna ngo nguitoko xi botixómána, kó tì tjínna jajún xi botixomaq, kó tsi bí xiáan xi'bí: T'en ji, kó koeje, kó tsi kje'e xi jabí'in xiáan, kó kjindibá, kó kji'a nga mosona tsanguiya an nga sa'ín ngo ni, ts'enkjátjosónna.

⁹Nga tsint'ié kui níj Kjisoo achichí kijíndikoón, kó askotsijeen xta xi yajánguií kó bí katsoó:

—Jákoxi ni xi xiánjnú'un nga kjie ngo nda sakóna k'ie naxindá Israel xi bi ts'én 'niú s'ijiin.

¹⁰Kó nga jachó nguinií kui já xí kananguiyaa kia ndi'aá nda nguitokoo jajuún, kamábe nga kui nda moso xi oon je kamádaya.

Bí ts'én kats'énkja'á'yaá Kjisoo ndií ngo xtachjooón k'án xi je k'ien xi'iin

¹¹Kó jaskan Kjisoo kijí ngo naxindá xi 'mí Naín, kó níjan kijijo xtá tsí'lé kojo kjín ngase xta. ¹²Nguije makjachó kuí naxindaá, kamábe nga tjífíkanijín ngo inimáa, ndi ngoó ngo naa k'án xi je k'ien xi'iin, kó achichí má xta naxindaá xi níjan kijíkanijínjo. ¹³Kó Ndíaa nga kamábe, níma kamaá kui xtachjooón, kó bí katsoó:

—Ngata che'éjín ji.

¹⁴Kó Kjisoo tjien má kijíkóntiñaq koxa xi kji'iya kui nda xongo xí je k'ieen, kó kats'énjo, kó já xí ndiyiya'ank'á xió kixindyia, kó Kjisoo bí katsoó nda xongo xi k'ieen:

—Nda xongo!, jí xí bí t'íxiaán: ¡Tisítjin!

¹⁵Kó kui nda xi k'ieen, tjien má kis'ijñando, s'e tsichjia, s'e Kjisoo kijijo kui ndaq nínga tikón nqaá. ¹⁶Kó ngayeje xtaq xi katsakjonní, kó katsjaá kjoaje Néná nga bí katsó:

—Ngo nda chjinie'eén Néná xi 'niú nk'a xaá jatjojinná.

Kó tjín xí bí katsó:

—Néná je kjoe'ekoón xtá naxindaá.

¹⁷Kó ngayeje nangui Judeá kojo ngayeje naxindá xi síndot'a tiñaa,
kamábe ni xi kats'én Kjisoo.

Bi ts'en tsíchjiajo Kjisoo xtä xi katsanguiyajo én Jua Bautistaa
(*Matig 11:2-19*)

¹⁸Kó xtä tsí'e Juaaq kini'ánkint'ié kjoaa ngayeje kui niij. Kó Juaaq tsíchjiaa
jó xta tsí'e, ¹⁹kó katsanguiyakoon Kjisoo, tsí'e nga kosíyaá tsi kui Kjisoo boá
xi kjindibaá, axa chjen nga kje'e xi skoyaá. ²⁰Kó kui jaá jachókoón Kjisoo
kó bi katsoó:

—Jua Bautistaa xí katsanguiyajne tsí'e nga kosiyajne: ¿A jí boá kui nda xi
kjoe'eé, axa xchiyá xó jin kje'e?

²¹Tí kuij chiboa Kjisoo achichí má xtä xi kats'éndaya chi'in xi tjiín, kojo
xi kjoanima ndyifoaa, kó ts'axié asién nixtin xi ndajín xi tjíjiin xtaa, kó
kjín má xtä xi tijkä xi kats'éntsiween. ²²Kó Kjisoo bi katsoó kui jaá:

—Tanguínjnú, kó t'íyajnuú Juaaq ni xi je kamáyajnuú kojo ni xi je
kanda'yájnú, t'ínjmijnúnga xi tijkä je kamátsiween, xi njima see je ma fí,
xi tjiín chi'in xi ts'enkjátsón tixin yojoná je kamátsjie, xi xtiyaa je tsint'ié,
xi je k'ieen je ja'a'yaá, kó nga xtä njima je tjí'miyaá éntjátsíee Néná. ²³Kó
achichí rä tsjaa kui xi tangat'ajiín an nga stinguí.

²⁴Kó nguije kijí xtä xi katsanguiya Juaaq, Kjisoo íts'iyanií nga katsáyaá
xtaa kjoaa Juaaq, kó bi katsoó:

—¿Mí xí tsanguín tsitsijenjú nangui kjitiyaa? ¿A ngo yáxá xí ítsanie tjoó?

²⁵Tsi jmí, ¿mí xí tsanguín tsitsijenjú? ¿A ngo nda xi njño tsjakon ts'ényajá?
Jún je yajnú nga kui xtä xi boajá njño tsjakon kojo xi nda síndo, ndi'aa
re nínga síndo. ²⁶Kó, ¿mí xí tsanguín tsitsijenjú? ¿A ngo nda chjinie'eén
Néná? A joon, ja kuí boá xián an, kó nk'a ngase xaá tā boajiín ngo nda
chjinie'eén Néná. ²⁷Kuij bí xi kxit'a xojon eén Néná xi bi tsoó:

K'ie sanguiyatjoón chjinie'énna,

tsí'e nga kuijíjnánda ndiyáa, nguindyikin ji.

²⁸Ts'énxiyajnu'un nga k'ie kui ngasondiee kje tsenjín ingo nda chjinie'én xi
nk'a ngase xaá xikoó Jua Bautista, tanga kui nda xi 'niú chichí ngase xaá
nínga botíxomaq Néná, nk'a ngase xaá tā boajiín Juaaq.

²⁹Kó ngayeje xtä naxindá kojo já xí foa'á'yá ton xi machjítjé ni, nga
tsint'ié Juaaq, kats'énkixi yojoo nguindyikon Néná, nga katsjandié nga Juaaq
atíndá, ³⁰tanga já fariseoq kojo já chjiniekjoakitií kats'ench'o ni xi mejeén
Néná, nga kamámejénjiín nga Juaaq atíndá. ³¹Kó Ndiaa bi katsó:

—¿Mí xi boá má kón xikó kón kui xtä xi tjin kui nixtin xíbi? ³²Boa
má kón xikoó já xongo xi síndo nguiya nditseen xi bi ndyitsoó xkjín:
“Kini'ánkjaniejne yanáxo xi foniee, tanga jún kicha'ájnú, kandajne só
xi ndasen tsó, tanga jún kicha'ájnú.” ³³Ngat'la je'e Jua Bautista, xi
iskjiniejin pan, ti nde kats'ejín bino, kó jún bi ki'míjnú nga xindajín tjíjiin.
³⁴Jaskan je'e ndií nda xi'iin, nda xi iskjinie, kojo xi kats'e, kó bi ki'míjnú:
Kui ndaa, nda xki'á, nda ch'i, nda amingoo já xí foa'á'yá ton xi machjítjé

ni kojo xtajé boá xi₁'bi.³⁵ Tanga kjoakjíntakoón Néná kama kixi ni kjoaa ngayeje ndií.

Bi kamaá Kjisoo nda fariseo xi 'mí Ximoo

³⁶Kó ngo nda fariseo tsí'áq Kjisoo tsí'e nga kijíkjiniejo nñó ndi'aq, kó nga ts'as'ien Kjisoo ndi'aq kui ndaq, kis'ijñat'a yamíxq.³⁷Kó s'e kji'á má jachókoón ngo na xi chjiani naxindaá xi tjiín jé, kó nga tsint'ié nga Kjisoo tikón t'a yamíxq ndi'aq nda fariseoo, jachójo ngo ndi rámita ndasíjen,³⁸kó kis'ijñá ngaxton se Kjisoo, askandá s'e íts'iyanií nga ndandyíkon aniéjón ni se Kjisoo, kó tsjatoko kats'énxijón ni, s'e atíndsoa'l sé, kó s'e katsanguijon ndasíjeen.³⁹Nga kamábe kui nij nda fariseoo, bi ts'én kats'énkjó: "Tsi jakoxi nga kui nda xi nda chjiniel'eén Néná, kamákjínií 'yá naq boq xi tjít'senjo, nga ngo na xi tjít'sen jé."⁴⁰Kó Kjisoo bi katsoó nda fariseoo:

—Jí Ximo', ngo ni tikónna xi xiyaá jí.

S'e bi katsó nda fariseoo:

—Tíyéní, Mostro'.

⁴¹S'e Kjisoo katsáyaá ngo énkjín xi bi tsó:

—Jó ma já xí kitsjieen toqn ngo nda xi ts'énkíya toqn, ngo ma xi kitsjieen ún úchan toqn ndenario, kó xi ingoo ichítié ma xi kitsjieen.⁴²Kó nga jmíjíin kui jaá kóts'en sal'ínsón toqn xi kitsjieen, nda xi ts'énkíya toqn kats'énjetakoón ngajó kui jaá. Ngot'e tíyéní'ne, ¿ñání ngajó kui jaá xi 'niú tjó ngase kamaq kui nda?

⁴³S'e Ximoo bi katsó:

—Bee kon an nga kuí nda xi 'niú tsie ngase kats'énjetakoón.

Kó Kjisoo bi katsó:

—Boq kji'i ni xi kase ji.

⁴⁴Kó Kjisoo askotsijeen kui naq, kó s'e bi katsoó nda xi 'mí Ximoo:

—¿A titsitsijíin kui naq? Ts'as'ien an ndi'áq, kó jmí ndójoa katse'éjín ní xi aniejón an ndsako án, tanga kui naq ndandyíkon aniéjón ni ndsako án, kó tsjatoko kats'énxijón ni nga.⁴⁵Akatindse'éjín ní nga kini'líntinde ní, tanga kui naq, ndeskande koó nga ts'as'ien an ndi'áq ts'énbotíndsoa'á ndsako án.⁴⁶Jmí istí kananguijinjín tokó án, tanga kui naq, ndasíjen katsanguijon ndsako án.⁴⁷Kuí ni nga boq xianñaq nga nda tsi kjín má jeé, je kini'lánjetakoón, ngat'a achichí 'niú kats'éntjó, tanga kui xta xi chiboa ni'anjetakoón, chiboa ts'éntjó.

⁴⁸Kó Kjisoo bi katsoó kui naq:

—Jéé je kini'lánjetakoón.

⁴⁹Kó xta xi ngase xi síndoq t'a yamíxq, íts'iyanií nga bi katsó jak'ie ja ngajaán xkjín:

—¿'Yá ní boq kui xi₁'bi, nga ngaskande jé ts'énjetakón?

⁵⁰Kó Kjisoo bi katsó ngasee kui naq:

—Tangat'anii kjoas'ijiin, kuí ni nga je jatjo'a ji, t'en xió xió ji.

Ínchjín xí asíkojo Kjisoo

8 Kó jaskan nguije kamá kui niij, Kjisoo kijí ngayeje naxindá kojo ndi nangui nga katsáya éntjátsiee kjoaqá nínga botixómá Néná. Nga tiejó xta tsí'e kia nijan kistsol'bájo, ²kojo boq ts'én tjín ínchjín xí Kjisoo kats'éndaya nga ts'axiéé ásién nixtin xi ndajín kojo kjín tokoya chi'in. Nguijiin kui ínchjiín kia tso'bájin Nariyaa, kui xi ti Naleé ki'mií nga, kui xi yito ásién nixtiin xindajín jatjo nguijin yojoo, ³kojo Najuaá, chjoón kui nda xi 'mí Kusaá, nda xi kats'énxájo Erodee, kojo Nasusaá kojo kjín ngase kje'e ínchjín xi kats'énseén nga asíkojo nga katsjaá ta ni xi tjínrií.

Bí ts'én íjñá chiboa Kjisoo kjoaqá nda xi atítsojo xojmaá

(Matiq 13:1-9; Marko 4:1-12)

⁴Kó kjí'a nga kjín xta kamátikó, xi kjindibáni xki naxindá xi kijikoón Kjisoo, ínijmií kui énkjín xi bí tsoó:

⁵—Ngo nda xi 'bitjie, kijík'itjie xojmaá. Kó nga ítjie xojmaá, ngo tjín ixó t'a ndiyaá, kó xta xi ja'aa katsjánié, kó nisiee iskjiniie. ⁶Kó ingo tjín ixó ngasón ndijoo, kó nguije katjonts'ién, kixí ngat'a jmí ndójoa kis'iejiín. ⁷Kó ingo tjín kuí xojmaá xi ixó nguijin yandá'yaá, kó nga kamánk'a yandá'yaá nijan kamánk'a kó kats'énxí. ⁸Kó ingo tjín kuí xojmaá xi ixó t'ananguí xi ndaa, kó kis'iee to, kó ínts'ién, kó nda to katsjá, ngaskande úchan to katsjá nga ngo xojmaá.

Nga katsáya Kjisoo kui niij 'niú tsíchjia nga bí katsó:

—Xi tjín tjabonijon nga kuint'ie, ngatint'ié kuí eén.

⁹Kó xta tsí'e Kjisoo asíyaá, mí ni xi mejeén tsó kui énkjín xi katsáya. ¹⁰Kó Kjisoo bí katsó:

—Jún je ki'miyajnú ni xi tji'maá xikó ts'en botixómá Néná, tanga xta xi ngasee énkjín xí tjindókjoajo, tsí'e nga nda tsi skotsíjen, skuijéjín, kó nda tsi kuint'ie, kámakjíniín.

Bí ts'én katsáya Kjisoo kjoaqá énkjíín nda xi 'bitjiee

(Matiq 13:18-23; Marko 4:13-20)

¹¹'Kuí niij xi mejeén tsó kui énkjíín: Xojmaá, kuí xí eén Néná, ¹²kó kui xi ixó t'a ndiyaá, kuí xí xikoó xta xi nt'ié eén Néná, tanga ta tji'niju ndibá xindajín ndiabloo kó foa'áxiín nguijin inímaaq kui eén, tsí'e nga s'lijinjiín, kó kjojtójájín. ¹³Kó kui xojmá xí ixó ngasón ndijoo, kuí xí xikoó xta xi nt'ié eén Néná kó tsjamaaq nga kjíbe, tanga nga jmí jamajiín, ta ngotjón tsí s'ijiín, tanga nga fochó chiboa nga chjat'ayákón ts'enkjíé kjoa. ¹⁴Kó kui xojmá xí ixó nguijin nda'yaá, kuí xí xikoó xta xi nt'ié eén Néná, tanga chíchí chíchí 'bíjñá kui eén, ngat'a kjoanda, kjoachoon kojo kjoatsja xi tjín kuí ngasondiee, ts'enchája, kó jmí to 'béjíín nga maxchá. ¹⁵Kó kui xojmá xí ixó t'ananguí ndaa, kuí xí xikoó xta xi kixi kojo xi ngayeje inímaaq nga nt'ié eén

kojo nga ts'enkjátjosón ni xi tsó eén Néná, kó 'niú mindyia, kó nda to xi tsja.

Bí ts'én akóyá Kjisoo kjoaq ndi'ií

(*Marko* 4:21-25)

¹⁶ 'Ngojín xtá xi kui'ítí ngo ndi'í xí ts'entsíjenná, tsí'e nga jaskan skíbe ngo tiji xi kui'ímá, kojo tsi nguindie ngo nchan kui'íjñá, a mí tsí tasá nk'a kui'íjñá, tsí'e nga sa'íntsijeen xtá xi k'os'ien nguiya ndi'aq. ¹⁷ Ngat'a, nde ngojín ni xi 'ma xi xchajín, tí nde jmíjín ngo ni xi kondókjoasien xi xcha nda ndajín kojo tsi xchajín nínga tsijeen.

¹⁸ 'Tsitsíjenjnú kóts'en kondá'yájnú, ngat'a ngayeje xi tjiín, koe'ee, kó xi jmíjíin, ngaskande ni xi ts'enkjó nga tjiín xi chja'áxiín.

Bí ts'én katsáya Kjisoo 'yání xi nqaq kojo nts'ie

(*Matiq* 12:46-50; *Marko* 3:31-35)

¹⁹ Kó nqaq kojo nts'ie jachó nínga tikón Kjisoo, tanga kamájín jachókóntiñaa ngat'a achichí xtá tjín. ²⁰ Kó tjín xi katsáyaá Kjisoo nga bí katsoó:

—Naáq kojo nts'ie ndítsen jan síndo kó mején xoó skuiee.

²¹ Tanga Kjisoo bí katsoó kui jaá:

—Naana kojo nts'ie án kui xi nt'ié kojo xi ts'én ni xi tsó eén Néná.

Bí ts'én kats'enk'íxió Kjisoo tjoó kojo ndachíkoón

(*Matiq* 8:23-27; *Marko* 4:35-41)

²² Kó ngo ndiya nga Kjisoo kojo xtá tsí'e, ts'as'ien ngo nguiya tjotso je, kó bí katsoó:

—Tjián ngándá xí ingoboá jan.

Kó s'e kijí. ²³ Tanga tjienga ndyifoá'atio nguijin ndójoa, kis'ifé Kjisoo. Kó tā kji'á má kjindibá ngo tjo 'niú xi kitsjíeñ ndójoa, kó ndeskande ts'enk'ás'ién má ndójoa nguiya tjotso jee, kó ngaskande je matingándá má.

²⁴ Kó tsanguínchoon Kjisoo, kó kini'lánkja'aá nga bí kí'mií:

—¡Mostro! ¡Mostro! ¡Je matingándá!

S'e nguije ja'aá Kjisoo kats'enxchánjo tjoó kojo nga'niuú ndójoa, kó kixixió, s'e kis'ie xió xió. ²⁵ Kó Kjisoo bí katsoó xtaa:

—¿Ná tsanguínjoñu kjoas'ijinjún?

Kó kui jaá achichí katsakjonní kojo kijíndikoón, kó jak'ie ja nga jan asiyáa xkjín nga bí katsoó:

—¿'Yá ndaq xílbí, nga ngaskande tjoó kojo ndójoa tsjaá kjoa kó nt'ié'eén?

Bí ts'én kats'endaya Kjisoo ngo ndaq xí tjíjíin asién nixtiín xindajín

(*Matiq* 8:28-34; *Marko* 5:1-20)

²⁶ Kó tichañ jachó nanguíi xtá Jerasa, kui nanguí xi tikón ngándá xí ingoboaá, kjen nanguí Galilea. ²⁷ Kó nga jatjajen Kjisoo tjotso jee, kijí

ngasón kixí jan, kó jachókoón ngo nda xi kjindibáni naxindá jan, xi je kjín nixtinnii nga tikónjiin nguijin yojoo ngo asién nixtiin xindajín, kó jmí njño yajájín ti nde nguiti jmí ndi'a kis'ijñajín, ngat'a kia nguijin nangoximik'ieen kis'ijña. ²⁸Kó kui ndaq̄a nga kamábe Kjisoo, 'niú askandáya kó asién tikoó t'a se Kjisoo s'e bi katsó:

—¡Mí xí tjiín kjoaa an, Kjisoo, ndíi Néná xi tikón ndi'ak'ajmi jan! ¡'Niú ts'lénmí'aá nga jmí kjoanimá ni'ínkje'ejín ní!

²⁹Kuí ni nga bi katsó ngat'a Kjisoo tsí'aá kui asién nixtin xi ndajiín tsí'e nga jatjojin nguijin yojoo kui ndaq̄a. Ngat'a achichí kjín nixtinnii kui asién nixtiin nga kats'en tsí'e yojoo kui nda, kó xtaq̄a nda tsí n'iñiú kicha má íta'niú tsja kojo se, tsí'e nga jmí ni sa'ínjín, ti kuí xí iskjtindsó ni, kó kui xindajín taxkiya kats'énkjí nguijndie kjitiya kui ndaq̄a. ³⁰Kó Kjisoo bi katsóo nga asiyáa:

—¿Kó 'mií?

Kó kui ndaq̄a bi katsó:

—Lejion 'mína.

Ngat'a achichí kjín má asién nixtiin xindajín xi ts'as'ienjin nguijin yojoo. ³¹Kó kui xindajín 'niú tsí'aá Kjisoo tsí'e nga kiajín katsanguiya tixa nangaa t'ananguiji. ³²Kó kiaa achichí má chinga tjemá xi ndyikjien nguijin ndixchoo, kó kui asién nixtin xindajín 'niú tsí'aá Kjisoo tsí'e nga nguijin yojoo kui chingaa k'os'ienjin, kó s'e Kjisoo katsjaá kjoa. ³³Kó kuí asién nixtiin jatjojiin kui ndaq̄a, kó chingaa kijík'índoijiin, kó taxkiya tsanga tsabé ngo nínga nk'a kó kia ixó ngándá nguijin ndójoaa nínga jesón ngándá.

³⁴Kó kui já xí ndyikoon kui chingaa, nga kamábe ni xi kamaá, tsangá má nga kijí nguijin naxindaá kojo t'a ndia nga kijík'ínjimi ni xi kamaá. ³⁵Kó xtaq̄a kijíkatsijen mí ni xi kamaá, kó jachó nínga tikón Kjisoo, kó kamábe kui nda xi kjín asién nixtiin xindajín kis'índojojin yojoo nga je xió tikón t'a se Kjisoo, je ts'enyajá njñoo kó je nda tikón, kó kui xtaa, achichí katsakjonní.

³⁶Kó kui xt̄a xi kamábe ni xi kamaá, ínijmíi kóts'en jatjo'a kui nda xi kis'ijñajin asién nixtiin xindajín. ³⁷Kó s'e ngayeje xta xi chjiani nangui Jerasa, 'niú tsí'aá Kjisoo tsí'e nga kjojo ni kui nanguii, ngat'a achichí katsakjonní kjoaa ni xi kamaá. Kó Kjisoo ts'as'ien nguiya tjotso jee s'e kijí.

³⁸Kó kui nda xi jatjojiin asién nixtiin xindajín nguijin yojoo, 'niú tsí'aá Kjisoo tsí'e nga kjojo, tanga Kjisoo bi katsoó:

—Tasá t'en ngeuní ndi'áa, kó t'ínjimi ni je xi kats'énjoo Néná.

Kó kui ndaq̄a kijí kó ínijmíi xta naxindaá ni xi kats'énjo Kjisoo.

Bí ts'én kats'endaya Kjisoo ngo tsakjin kojo ngo xtachjoón

(Matio 9:18-26; Marko 5:21-43)

⁴⁰Kó kji'a nga kijí ngeuní Kjisoo, achichí má xt̄a xi tsja kamaá nga jachókoón, ngat'a ngayejee nga je ndyikoyaa. ⁴¹Kó s'e ta niján má jachókoón ngo nda xi 'mí Jairo, kui xi nda nguitokoo ndi'a nínga ndokjoa eén Néná. Kó asién tikoó t'a se Kjisoo, kó s'e 'niú tsí'aá nga kjojo ndi'aa,

⁴²ngat'a tā ngo tsí má ndi tsákjin xi tikoón xi ma rā tsi tā tiejó noó, xi je mején mak'ien. Kó tjienga ts'én fí Kjisoo ndi'aā Jairoo, achichí xtā nijan kijijo xi ndyi'bindyio'niú má.

⁴³Kó ngo xtachjoón xi tiejó nónií nga tjiín chixójín kó je kats'énkjié ngayeje toon nga kijíkoón chjiniendiki kó nde ngojín xi kats'éndaya. ⁴⁴Kui xtachjoón kijíkóntiñaa ngaxton Kjisoo kó kats'énjo ngandeeq njñoo, kó tī kji'a kixixió kui chixójín xí koón.

⁴⁵Kó Kjisoo bī katsó nga asíya:

—¿'Yá xí kats'énjo njñoa?

Kó xtā xi tso'bájo jinjín katsó, s'e Peé bī katsó:

—Mostro! xtā kjiín ts'én'bindyio'niuú kó ndyitsanguinña k'ie ndyitsanguinña jaán, kó bī t'íse ji “¿'Yá xí kats'énjona?”

⁴⁶Tānga Kjisoo bī katsó:

—Tjín xí kats'énjona, ngat'a tsijen kamána nga nguijin yojona jatjojin ngo nga'niú.

⁴⁷Kó s'e kui xtachjoón nga kamábe nga kamá'májíín yojoo, jatsié má nga kijíkoón Kjisoo kó s'e asién tikoó t'a se Kjisoo, s'e katsáyaá nguijin ngayeje xtaa mí kjoa nga kats'énjo njñoo Kjisoo, kó kóts'en nga tī kui chiboa kamándaya. ⁴⁸Kó Kjisoo bī katsoó:

—Jí chjoón, kjoas'ijiín xí je ts'axié'aá, t'en xió xió.

⁴⁹Tī ts'enchjia ngase Kjisoo nga jachó ngo ndā xi kjindibáni ndi'aā ndā nguitokqoó ndi'a nínga ndokjoa eén Néná nga bī katsoó:

—Je k'ien tsakjíin, nguiti ni'ínxijíin Mostroo.

⁵⁰Tānga Kjisoo tsint'ié kuí eén kó s'e bī katsó:

—Ngata ndakinjín ma, tā tī'ins'ijin tsí jí, kó tsákjinchií kjotjo'a.

⁵¹Kó nga jachó Kjisoo ndi'aā Jairoo, tā 'yájín xi nijan ts'as'ienjo ngase, ta Peé, Sandiyaá, Juaa kojo na'mii kojo naaá kui tsákjinchií tsí. ⁵²Kó ngayeje xtaa nga ndyikjandá nga ndasen kjimaaq kjoaa kui tsákjinchií, tānga Kjisoo bī katsoó:

—Ngata cha'ájíjnú, tsákjinchií kjie 'méisín, tā kji'ifé tsí.

⁵³Kó ngayeje xtaa tsajnókie Kjisoo, ngat'a nga be nga je k'ien kui tsákjinchií. ⁵⁴Tānga Kjisoo iskjíbe tsja tsákjinchií kó bī katsoó:

—Tsákjinchií, tisítjin!

⁵⁵Kó nguije ja'á'yaá asién nixtiin tjien má jastjien, kó Kjisoo katsjá kjoa nga koe'eé ni chinie. ⁵⁶Kó xi xchaá kui tsákjinchií achichí kijíndikoón, tānga Kjisoo tsí'aá nga tā 'yájín xi kotsoyaq ni xi kamá.

Kjisoo bī ts'én katsjáxaá nga tiejó xtaa

(Matio 10:5-15; Marko 6:7-13)

9 Kó nguije Kjisoo ítitók nga tiejó xta tsí'e, katsjaá nga'niú kojo xá tsí'e nga kamaa k'oxié ngayeje tokoya asién nixtiin xindajín kojo nga sa'índaya ngayeje chi'in. ²Kó katsanguiya tsí'e nga kui'ínjimi kjoaa nínga botixómá Néná kojo tsí'e nga sa'índaya xtā xi oon. ³Kó bī katsoó kui jaá:

—Ngata jmí ni ch'ajínjnú tsí'e ndiyaá: nde yanísie, nde stsa, nde ni chinie, nde tón, kojo ngata ch'ajínjnú jó 'niú njño. ⁴Kó tajña ndi'a nínga kjóchójnú kia tindyionjnú, ngaskande nga konguín nguínjnú kje'e nangui. ⁵Kó tsi tjín xtá xi sa'ínsenjínjnú, tjítaxiejnú kui naxindaá, kó t'ítsaniejnú xaa ndsakojnú, tsí'e nga skuié kui xtaa nga ndajín kji'i ni xi kats'éen.

⁶Kó jatjo kui jaá, kó kijí ngayeje ndi nangui nga ínijmi kuí éntjátsiee kojo nga kats'endaya xtá xi oon.

Bí ts'én k'ien Jua Bautistaá

(*Matig 14:1-12; Marko 6:14-29*)

⁷Kó Erodeé ndá xi tjiín xá nangui Galileá tsint'ié kjoaa ngayeje ni xi kats'lén Kjisoo, kó nde bejín mí xí sa'ínkjó, ngat'a tjín xtá xi katsó nga Juaa xó xi je ja'l'yaá nguijiin xta xi je jesón, ⁸kó kje'e xí katsó nga nda chjinie'eén Néná xi 'mí Elíaa xó xí jatokjá nguini, kó ti kje'e xi katsó nga ngo xó ndá chjinie'eén xchaá Néná xi ja'l'yaá nguinií. ⁹Kó Erodeé bí katsó:

—Tí ánní xi katsja an kjoa nga ikichásen toko Juaa ja, ¿'yá ndaa xí'bí tsoboá, kui xi tsint'ie an nga tsie ni xi tjíts'én?

Kó Erodeé kamámejeén nga skuié Kjisoo.

Bí ts'én kats'énkjíen Kjisoo ún mi xta

(*Matig 14:13-21; Marko 6:30-44; Jua 6:1-14*)

¹⁰Kó nguije jachó nguini já apostroo, ínijmií Kjisoo ngayeje ni xi kats'lén. Kó Kjisoo kijijo t'axín kui jaá ngo nangui kixí xi 'mí Betsaida.

¹¹Tanga nguije kamábe xta kjiín kijítjingui nínga kijí Kjisoo, kó Kjisoo kats'lénseén nga ínijmií kjoaa nínga botixómá Néná, kojo kats'endaya xtá xi oon.

¹²Kó nga je mején kjima'ña, jachókoón Kjisoo nga tiejó xtaa kó bí katsoó Kjisoo:

—Tí'inkjí kui xtaa 'ne, tsí'e nga koeje nínga jnoo kojo ndi nangui xi síndo tiñaa tsí'e nga k'otsie chií ni xi skjinie, ngat'a kui nguindiee jmí nijín.

¹³Kó Kjisoo bí katsoó:

—Jún te'ejnú ni xi skjinie.

Kó kui jaá bí katsó:

—Ta ún tsi pán kojo jó tjió xi kich'ájne, ngototo tsi konguin'ñátsiéjne ni xi skjinie ngayeje kui xtaa.

¹⁴Ma ra tsi ta ún mi já xí'in. Kó s'e Kjisoo bí katsoó xta tsí'e:

—Xkí ichítie ichítie t'índotikójnú.

¹⁵Kó kui jaá kats'én ni xi ki'mií, kó boq katsoó xtaa nga kia k'uíndo ngasón ndixchoo. ¹⁶Kó iskjíbe pan xi uún kojo tjió xi joó, askotsijen nk'a jan, kats'énchikonné, s'e akjángá kó katsjaá xta tsi'e, tsí'e nga kjen xtaa kui'índo. ¹⁷Kó ngayeje xtaa iskjinie kó kitsie chān chān, kó ngui tiejó nisenya kamá xii xi ts'anguii.

Bí ts'én katsáya Peé nga Kjisoo boá xi Kristoo

(*Matiq 16:13-20; Marko 8:27-30*)

¹⁸ Kó ngo ndiya nga Kjisoo ts'énchjiaá soboaá Néná, kó xta tsil'e nijan tikónjo, s'e Kjisoo bí katsó nga asiyáá:

—¿Kó tsó xtaaq, 'yá xó ní án?

¹⁹ Kó kui jaá bí katsóo:

—Tjín xi Jua Bautistaá xó jí tsó, kje'e xí Elíaa xó jí tsó, kó ti tjín xí ngo xó nda chjinie'lén xchaá Néná xi je ja'ályaa xó jí tsó.

²⁰ Kó Kjisoo bí katsóo:

—Kó jún, ¿'yání án, kó 'míjnú?

Kó s'e Peé bí katsó:

—Jí xí Kristoo Néná.

Bí ts'én katsáyatjón Kjisoo nga koya

(*Matiq 16:21-28; Marko 8:31—9:1*)

²¹ Tanga Kjisoo 'niú atíxomaa kui jaá nga ta 'yájíñ xi kotsayaa kui nii.

²² Kó bí katsoo:

—Ndií nda xi'iin chjen nga tsie kjoanima kjoa'atio, kojo nga sa'inch'o xta xi xchaá, kojo já nguitokoo chinámij, kojo já chjiniekjoakitii, kó katsáya nga chjen nga si'anck'ien, kó nga xi ma ján nixtin kjoa'ályaa.

²³ Kó bí katsoó ngayeje xtaa:

—Tsi tjín xí mejeén tsjienguína, ngats'enchíyá yojoo, nga kjíbe kroo ndyiojón ndyiojón, kó s'e ngatjandiba tjiinguina. ²⁴ Ngat'a ngayeje xi mejeén k'oxié'a kjoamindyioon, sa'inchaja, kó ngayeje xi sa'inchaja kjoamindyioon tangat'anij an, kuí xí k'oxié'a. ²⁵ Ngat'a ¿mí chjínií tsi ngo nda kuijeen ngayeje ni xi tjín kuí ngasondiee, tsi sa'inchaja kojo tsi ndajín sa'iín yojoo?

²⁶ Ngat'a ngayeje xta xi soboaá kamaa kjoaa an kojo kjoaa énna, ti boá ti ts'lén ndií nda xi'iin soboaá kamaa kjoaa kui, kji'a nga kjo'e'éjo kjoaje ts'i'e, kojo kjoajee Na'mij, kojo tsi'e ndítsjee. ²⁷ Tanga jakoxi ni xi xiánjnú'un nga tjín xí síndojojinná k'íee xi koyajín ngaskande nga skuié nga kotíxoma Néná.

Bí ts'én kasasikjo ąsieén Kjisoo

(*Matiq 17:1-8; Marko 9:2-8*)

²⁸ Kó ma rā jin nixtin jaskan nga ínjimi kui eén, Kjisoo kijínijínguí ngo tjiinguí nínga kijichjiaá Néná, kó nijan kijijo Peé, Sandiyaá kojo Juaa.

²⁹ Kó tjienga ts'enchjiaá Néná, kje'e kis'íe kjen, kó njño xi yajá tiboa xó xó kamá. ³⁰ Kó kia jatokját'aa jó já xí tsichjianijmíjo. Moisee kojo Elíaa boá, ³¹ kui jaá ja'atjiyajooon kjoajee Néná, kó tsichjianijmi kjoaa kjoaboya xi sakoo Kjisoo kia naxindá Jerusalen. ³² Tanga Peé kojo já xí nijan tjiimájo achichí je njnáá tanga kis'iyofejín, kó kamábe kjoajee Kjisoo, kojo ngajó já xí nijan tikónjo. ³³ Kó nguije ndyifí kui jaá, Peé bí katsoó Kjisoo:

—Mostro', ta nda kji'i nga k'ie tindyionxtín!, kama si'anda jáñ ndi'aánk'ién: ngo tse, ngo tsí'e Moisee, s'e ngo tsí'e Elíaa.

Ngat'a nde bejín mí xí katso Peé. ³⁴Kó tjienga ts'enchjia kui nii, ngo ndi jatjo xi í'má kui jaá, kó achichí katsakjonní nga kamámejeén ts'as'ienjin nguijijin kui ndii. ³⁵Kó nguijijin kui ndii kanda'yá ngo nda xi bi katsó:

—Kuxí'bi xi ndi tjóna, kui nda'yajnú!

³⁶Kó nguije nguijijin kanda'yajnú kui ndaa, Kjisoo kis'ijña soboá. Kó kui jaá ta 'yajnú xi katsáyaá ni xi kamábe kui nixtin jan.

Bi ts'én kats'éndaya Kjisoo ngo nda xi tjíijin ngo asién nixtin xindajín

(Matiq 17:14-21; Marko 9:14-29)

³⁷Kó nga kamánguindyiojón, nga kjindibájaya ni tjinguii, achichí má xta xi kijíkja'ýayndiya Kjisoo. ³⁸Kó nguijijin xta kjiín kanda'yá ni ngo nda xi 'niú tsichjiajo Kjisoo nga bi katsó:

—Mostro', 'niú mí'aá, tsitsíjinchíi ndina, ngat'a ngo chií má, ³⁹ngo asién nixtiin xindajín xi kjíbe, kó ts'enkjádayá, kó ts'enkjátsié, kó nisién xó má si'a ts'oa, kó ts'en'oón, kó ta'ya mejeén tsjiuen, ⁴⁰kó je 'niú tsí'áa xta tse, tsí'e nga k'oxié kui asién nixtiin, tanga kamájín.

⁴¹Kó Kjisoo bi katsó:

—Xta xi s'ijinjíin kojo xi ndajín! ¿Ngaskande kji'á ní nga chjien nga kotíjnjajónun? ¿Ngaskande kji'á ní nga ta kó sa'íncjíkjoajnúun? Ndibéje ní ndii.

⁴²Kó tanga tjienga kui ndaa ts'énfíkóntiña Qjisoo, xindajín ts'ajmitójó t'ananguii, kó kats'énkjatsiéchán, tanga Kjisoo kats'énxchánjo kui asién nixtin xi ndajín tsí'e nga jatjo, kó tjien má kamándaya kui ndaa, s'e kats'énkjíkón nguiini na'mii. ⁴³Kó ngayeje xta tsí'e kijíndikoón ni xi kats'én Néná.

Bi ts'én katsáya nguiní Kjisoo xi ma jó ndiya nga koya

(Matiq 17:22-23; Marko 9:30-32)

Kó tjienga ngayeje xtaa kijíndikoón ni xi tjíts'én Kjisoo, kó kuí bi katsoó xta tsí'e:

⁴⁴—Nda má tasiénnijonjnú kui nii kó nga ni'anchíyajínjnú, ngat'a ndií nda xi'ljin nguiya tsja xtaa si'ank'as'ien.

⁴⁵Tanga kui jaá kamákjíniín kui eén, ngat'a Néná í'maá tsí'e nga kamakjíniín ni xi kama, kó katsakjonní nga asíyaá Kjisoo tsí'e nga kotsoya chan chan ni xi tjítsó.

Bi ts'én katsáya Kjisoo 'yání xi nk'a ngase nínga botixómá Néná

(Matiq 18:1-5; Marko 9:33-37)

⁴⁶Kó boa ts'én xta tsí'e Kjisoo íts'iyanií nga askjoyá 'yání xi 'niú nk'a ngase nguijijin kui jaá. ⁴⁷Kó nga kamákjíín Kjisoo kjoaq ni xi ndyits'énkjó nguijin inimiq kui jaá, iskjíbe ngo ndachí xi ijnát'aq yojoq, ⁴⁸kó bi katsoó:

—Ta'yaní xi skjíbe ní ja'énna kui ndachí xikoó xí^lbi, tí ts'enkjíbéna án nga, kó ta'yaní xi skíbena, ts'enkjíbé xi katsanguiyana, ngat'a kui xi 'niú chichí nguijiin jún, kuí xí 'niú je ngase.

Bí ts'én katsáya Kjisoo kjoaa nga xtä xi kondrañajín, kjoanda tsañá tikón

(Marko 9:38-40)

⁴⁹Kó s'e Juaa bí katsoó Kjisoo:

—Mostro!, ngo nda kamáya jin xi ja'én tsé ts'én'boxié xindajín, kó ik'íchjáne ngat'a jmí tsi k'ie tso'bátjinguiná.

⁵⁰Kó Kjisoo bí katsoó kui ndaq:

—Ngata 'bíchjajínjnú, ngat'a xi kondrañajín tikón, kjoanda tsañá tikón.

Kjisoo bí ts'én kats'énxchánjo Sandiyaá kojo Juaa

⁵¹Kó nguije kjimatiña nixtin nga Kjisoo koeje nk'a jan, katsjaá kon nga kijí naxíndá Jerusalen. ⁵²Kó katsanguiyatjón xtä xi kats'énka'a eén, xi kijí ngo ndi nanguí xi chjiani nanguí Samaria tsí'e nga kongasendiee néngá sa'ínkjal'yá, ⁵³tanga xta xi chjiani nanguí Samaria kats'énjo'ójín nga kia jachó Kjisoo, ngat'a kamákjiín nga xtijien naxíndá Jerusalen ts'én fí. ⁵⁴Kó nga kamábe kui nii xta tsí'e xi 'mí Sandiyaá kojo Juaa, bí katsoó Kjisoo:

—Ndia!, ¿a mejeén nga chjial'a jin nga kjindibájén ndi'lí ndi'ak'ajmi jan, kó ngats'énkjié ngayeje kui xtaa?

⁵⁵Tanga Kjisoo asko'á kui jaá, kó kats'énxchánjo nga bí katsoó:

—Jún yajímjnú mí Asién nixtin xi ndokjoajnú, ⁵⁶ngat'a ndií nda xí'iin jmí tsi je'e tsí'e nga sa'íncchaja inímaa xtaa, tasá tsí'e nga k'oxié'á.

Kó kijí kje'e ndi nanguí.

Bí ts'én tsíchjiajo Kjisoo xtä xi kamámejeén kijítjinguii

(Matiq 8:18-22)

⁵⁷Kó tjienga ndyifí nguiya ndiyaá, ngo nda bí katsoó:

—Ndia!, mejénna kjuintjinguií tā néngá k'uín.

⁵⁸Kó Kjisoo bí katsoó:

—Xaññaá tixa tjiín néngá 'bíndo'yá, kó nisiee ndoboq tjiín néngá 'bíndo, tanga ndií nda xí'iin jmíjiín nguindie néngá sa'ínkja'yá toko.

⁵⁹Kó Kjisoo ingo xi bí katsó nguiini:

—Ndibétjinguiná.

Tanga kui ndaq bí katsó:

—Ndia!, te'é ndié ma ra ní nga tjón kjuinkánijín an na'mina.

⁶⁰Kó Kjisoo bí katsoó:

—Te'éndiée nga xtä xi xikoó tsi je jesooón nga kui koónijín xtaa xi je jesón, kó jí t'enk'ínjimi tajñaní kjoaa néngá botixómá Néná.

⁶¹Kó kje'e nda xi bi katsoó:

—Ndia! mejénna kjuintjinguií, tanga tjón te'é ndié ma ra ní nga je ts'én fí an xiáan xtä xi síndo ndi'ana.

⁶²Tanga Kjisoo bí katsoó:

—Nde ngojín xtá xi je íjñasoón tsja kíchá xi bokjan nanguíi kó kotsijen nguiní ngaxton, xi nda kamaā nga k'os'ien nínga botixómá Néná.

Bí ts'én katsanguiya Kjisoo já xí ichítie kojo tie joó

10 Jaskan nguije kamá kui nii, Ndianá boá tì ts'én ja'ájin ngui ichítie kojo kan jó já, kó jó jó katsanguiyatjón ngayeje naxindá nínga koeje kui. ²Kó bí katsoó:

—Nga jakoxí achichí kamá ni xi kamáxchaá, tanga chiboa tsí má xtá xi ndyits'énxaá, kuí ni nga 'niú chjia'ájnú Ndíá xi tsí'e ni xi kamáxchaá tsí'e nga sanguíya ngase xtá xi sa'ínxá nguijin jnoo. ³Tanguínjnú, k'lé ts'séntsanguiyajnú'un xikó maá chotsanga xi tjimá nguijiín choloboo. ⁴Ngata jmí stsa ch'ajínjnú, tì nde stsaton, tì nde jmí ndiéjtíboá ch'ajínjnú, kó nga ta 'yájín xi ni'ántindejnú nguiya ndiyaá. ⁵Kó kji'a nga kuitjás'ienjnú ngo ndi'a, tjón tì'antindejnú, nga bí k'uijnjnú: "Ngat'ieé kjoaxió kui ndi'aq." ⁶Kó tsi kiaq tikón ngo xta xi tjiín kjoaxió, kui kjoaxió xi ndyi'míjnú k'uieé kui, tanga tsi jmí, kui kjoaxioó kjindibákón nguiníjnú. ⁷Kó tì kui ndi'aq tìndyonyjnú, kó chiniejnú, kó t'iojnú tā ni xi tjínrí xi tsajjnú kui xtaā, ngat'a nda xi ts'énxaá tjínrí kjoanda nga kamachjií. Ngata xki ndi'ajín mintjajnú. ⁸Kó tā naxindá nínga kuitjás'ienjnú, kó nga sìl'ank'as'iéjnú, chiniejnú ni xi koe'éjnú, ⁹kó tì'andayajnú xtá xi oon xi síndo kui nguindiee, kó bí t'íjnjnú: "Je tsá kotíxomajnú Néná." ¹⁰Tanga tajña naxindá nínga kuitjás'ienjnú, kó tsi ndajín sìl'anjojnú, tijtaxiejnú nguiya ndiyátieé, kó bí t'íjnjnú: ¹¹"Ngaskande xaā ndie xi tjín kuí naxindájnú xi tsajón ndsakojojne, 'bítisaniejne kondra tsajún. Tanga ngatamayaajnú kui nii, nga je tsá kotíxomajnú Néná." ¹²Kó xiyájnú'un nga kui nixtin jan, nga kui naxindaá tsie ngase jé xí sakoó, tā boajínni naxindá Sodoma.

Bí ts'én katsáya Kjisoo kjoaā xtá xi tsint'ié'énjín

(Matiq 11:20-24)

¹³'Níma xó jún xtá xi chjiani Korasín! ¡Níma xó jún xtá xi chjiani Betsaida!, ngat'a tsi kia nanguí Tiro kojo Sidon nínga kamá kjoandikón xi kamá nguijiín xtajnú, ant'e rā na je kats'énk'oyá yojoo kui xtaā kjoaā ni xi ndajín xi kats'én, je rā tsajá njño tokjuie kó je rā indyiaá ndiso toko tsí'e nga akó nga nguiti mejéjniín sa'ínjé. ¹⁴Tanga nixtin nga kamajé tsie ngase jé xi sakojojnú tā boajínni xtá xi chjiani Tiro kojo Sidon. ¹⁵Kó jún xtá xi chjiani Kapernaum, a berií takónjnú nga ngaskande ndi'ak'ajmii xchjanínk'ajnú, jmí, tasá xiyájnú'un nga ngaskande ndoboank'ieen sìl'ankjatjajéjnú.

¹⁶'Kui xi kuint'iejnú jún, ndyint'iena án, kó xi sa'ínc'h'oijnú jún, tì tjíts'ench'óna an, kó xi tjíts'ench'óna an, tjíts'ench'ó xi katsanguiyana.

Bí ts'én je'e'oyá nguini já xí ichítie kojo tie joó

¹⁷Kó achichí tsja kamaá nga je'e nguini já xí ichítie kojo kanjoó, kó bí katsó:

—¡Ndia!, ngaskande xindajín nt'ié'énjnē nga ndokjoajne ja'éen.

¹⁸Kó Kjisoo bí katsó:

—An kamábe an nga xindajín Satanaaq ts'áka ni ndi'ak'ajmi jan xikó maá nga foa'at'e.

¹⁹Tsitsíjenjnú nga án xi katsajnú'un nga'niú tsí'lé nga káma konguínjinjnú ye kojo chondáya, kojo tsí'lé nga sí'ájnúú ngayeje nga'niuú kondraaq, kó jmí ni kámájínjnú jún. ²⁰Tanga nga tsajín majnú kjoaa nga asién nixtiin xindajín kuint'ié'énjnú, tsja ngatamájnú kjoaa nga ja'énjnú je kjit'a ndi'ak'ajmi jan.

Bí ts'én tsja kamaá Kjisoo

(Matiq 11:25-27; 13:16-17)

²¹Tí kui chiboa Asién Nixtiin Néná achichí tsjats'én íjñá inimaa Kjisoo, kó bí katsó:

—An tjíts'entsjajoo Na'mi!, ndiaa ndi'ak'ajmíi kojo t'ananguii, ngat'a kui nii ik'líjni'míi xtakjinkón kojo xi makjiín kó akakee já kjindií. Joon, Na'mi!, ngat'a boaa ts'én kamátsjaá jí.

²²'Ngayeje nií Na'mina xí kats'énk'as'ienna, kó tā 'yájín xi be 'yání xi ndií, ta kuí tsí Na'míi, kó tā 'yájín xi be 'yání xi Na'míi, ta kuí tsí ndií, kojo xta xi kui ndií mejeén kotsoyaa.

²³Kó xín tsíchjiajo soboá nguini xta tsí'lé nga bí katsoó:

—Achichí ra tsjaaq ndyikonjnú nga ndyibe ni xi ndiyajnjú, ²⁴ngat'a xi yájnú'un nga achichí má já chjinie'én kojo já re xi kamámejeén nga skuie ni xi ndiyajnjú ngot'e, tanga kamábejín, kó kamámejeén tsint'ié, ni xi ndyinda'yájnú, tanga kamájín tsint'ié.

Bí ts'én íjñá chiboa Kjisoo kjoaa nda nda xi chijani Samaria

²⁵Kó ngo nda chjiniekjoäkitii jastjíen kó bí katsoó tsí'lé nga skót'ayákón:

—Mostro!, ¿mí ni xi sa'in an tsí'lé nga sakóna kjoamindyion ngatsjé nixtiin?

²⁶Kó Kjisoo bí katsoó:

—¿Mí ni xi kjit'a kjoäkitii? ¿Kó ts'en ni'ínye ji?

²⁷Kó kui nda chjiniekjoäkitii bí katsó:

—“Tí'intjé ji Ndiaa kui xi Neé ngayeje inimaa, ngayeje nixtin nga kuindyin, kojo ngayeje nga'niúú, kojo tí'intjé ji xta xinguí xikó ts'en tjoó yojoo.”

²⁸S'e Kjisoo bí katsoó:

—Nda ts'én kandokjoe, tsi si'in ji kui nii kó kuindyin ji.

²⁹Tanga nda chjiniekjoakitii, kamámejeén nga akó yojoo nga kixi tikón nguindyíkon Néná, kó bì katsoó Kjisoo:

—¿Kó 'yá ni xi xta xinguí án?

³⁰S'e Kjisoo bì katsoó:

—Ngo nda kijijaya ni ndiya xi chjiani naxindá Jerusalen, xtjién naxindá Jeriko, kó já chejé kasakoo kó kats'énchejeé kó ngaskande njñoo kachjeéxiín, kó kini'ánkijen'on, s'e kijí kui já chejeé, kó kia yíjná nga mején kats'énk'ién. ³¹Ta kji'lá má ja'a tì kui ndiyáá ngo chiná'mi, tànga nga kamábe kui ndaq askotsijeen s'e kijí ndojó. ³²Ti ja'a kui nguindiee ngo nda lebita, kó nga kamábe, askotsijeen kó tì kijí ndojó. ³³Tanga ngo nda xi chjiani nangui Samaria, xi ja'a tì kui ndiyaá, nga kamábe, njmá kamaá, ³⁴kijíkóntiñaa kui ndaq, aniéjón nínga oon nga indyaá isti kojo bin, s'e ítsakjajón njño. S'e jaskan kats'énk'íjñasoón ndijee, kó kijijo nínga tikón ngo ndi'a nínga tsjayojoo kó askoon. ³⁵Kó nga kamánguindyiojón, nda xi chjiani nangui Samaria, ts'axié jó ton ndenario, kó katsjaá nda xi konda ndi'a nínga tsjayojoo, s'e bì katsoó: "Chíñ kui ndaq, kó tsi tsie ngase ton kjuiée, nga kjoé'e nguiñá an k'uichjí." ³⁶Ja, j'yáni nga ján kui jaá, xi xta xkjín kats'én kui nda xi kini'ánchezee?

³⁷Nda chjiniekjoakitii bì katsó:

—Kui nda xi kamánima.

S'e Kjisoo bì katsó:

—Ja, t'en ji, kó tì tì'in ji kui nii nga.

Kjisoo bì ts'én kijítsabekoón Namartaá kojo Nariyaa

³⁸Kó tjienga ndyifí nguiya ndiyáá, Kjisoo ts'as'ien ngo ndi nangui, kó ngo na xi 'mí Namartaá katsjaá nguindie nínga kats'énkja'yá. ³⁹Namartaá kis'iee ngo ndichja xi 'mí Nariya, kui xi kis'ijñat'a se Kjisoo ts'i'e nga tsint'ieé ni xi katsó. ⁴⁰Tanga Namartaá achichí nda kamaá xá xí kats'én, kó kijíkóntiñaa Kjisoo, s'e bì katsoó:

—Ndia!, ja ndajín maá nga ndichjá án ijñá soboána nga an tjíts'ensén an? Boa t'iín nga koskojóna.

⁴¹Kó Kjisoo bì katsoó:

—Namarta, Namarta, achichí nda kjimaá kjoaa kjín ni, ⁴²tanga ta ngo tsí ni xi 'niú ndasen ngase, kó Nariyaa je ja'ájin ni xi ndaq, kó jmíjín xi kjoa'áxiín.

Bì ts'én akóyá Kjisoo kjoaa kóts'en kondókjoaa Néná

(Matiq 6:9-15; 7:7-11)

11 Kó ngo ndiya nga tikón Kjisoo ngo nguindie nga ts'énchjiaa Néná, kó nguije kamaá, ngo xta ts'i'e bì katsoó:

—Ji Ndia!, takoyéjne kóts'en kondókjoajne Néná, xikó ts'en akóyaá Juua xta ts'i'e.

²Kó bì katsoó kui jaá:

—Kji'a nga kondókjoajnú Néná b̄i t'ínjnú:

Ji Na'mi tsajin xi tindyin ji ndi'ak'ajmi jan,
ngatamatsjie ja'éen.

Ngatama ni xi mejeén k'ie t'ananguui xikó kjima ndi'ak'ajmi jan.

³ Te'éjne ngot'e ni xi xiniejin ndyiojón ndyiojón.

⁴ Kó t̄i'injetakínjne jéjne, ngat'a jin t̄i ni'lánjetakónjne ngayeje xta xi tjitjieén tsajin.

Kó ngata boe'éndiejin ji nga chját'ayákónjne, kó xín t̄i'inkje'ejne ni xi ndajín.

⁵ Kó Kjisoo b̄i katsó ngase:

—¿'Yá jún xi tikoón ngo amingoo, xi kjokoón nga masien nixtjien kó b̄i katsoo: "Ji amingo", t̄i'inkíyen jáñ pān, "ngat'a ngo nda amingona kjin kjindibáni kó ndi'ana jachó, kó jmíjnna ni xi tsjaá?" ⁷Kó kui amingoo b̄i katsoo nga tikón nguiya ndi'aa: "Ngata ni'línxtijín ní, je ichjá an ngantjoana, kó ndina kojo an je ndyitsjayojeféjne, kamájín kjostjén an nga ngo ni tsjaá" ⁸Xiyájnú'un, nga kui ndaq nda tsi kjostjénjín nga tsjaá ngo ni ngat'a amingoo ma, tsjaá ngat'a 'niú ts'énmí'aá kó tsjaá ngayeje ni xi chjiegén. ⁹Kó kuí ni nga b̄i xiánjnú'un: Chjia'ajnú, kó koe'éjné, t̄indyiséjné, kó sakojnú, ndokjoajnú t'a ngo ngantjoa, kó chjáx'ajnú. ¹⁰Ngat'a ngayeje xta xi kuí'a, koe'eé, kó xi kongase, sakoó, kó xi kuichjia t'a ngo ngantjoa, chjáx'aá.

¹¹ ¿A tjín nguijinjnú ngo na'mi, xi tsi ndií kuí'aá ngo pān, kó ngo ndijo tsjaá? ¿Kojo tsi ngo tjió kuí'a kó ngo ye tsjaá? ¹² ¿Axá tsi ngo chjø kuí'aá kó ngo chondáya tsjaá? ¹³Ngat'a nda tsi jún ndajínjnú xta, majnú boe'éjnú ngo ni xi nda ndijnú, jakja'mí rā nga Na'mijnú xi tikón ndi'ak'ajmi jan tsjajiín Asién Nixtiín tsi tjín xí kuí'aá!

B̄i ts'én tsíchjia Kjisoo kjoaa nga ngo ndi'a xi t̄i kui tsakjanga

(Matio 12:22-30; Marko 3:20-27)

¹⁴ Kó ngo ndiya nga Kjisoo ts'én'boxié ngo asién nixtin xindajín xi tjíjiin ngo nda xi kamájín tsíchjia, kó nguije ts'axié kui asién nixtin xindajíin, nda xi majin chjiaa, tsíchjia, kó xtaa kijíndikoón kui nii. ¹⁵T̄anga tjín xí b̄i katsó:

—Nga'niuú nda nguitokoo xindajín xi 'mí Belsebuu xí ts'énkjén Kjisoo nga 'boxié asién nixtiín xindajín.

¹⁶ Kó kje'e xta xi kamámejeén askot'ayákón Kjisoo, tsí'áá ngo chibooaa ndi'ak'ajmii. ¹⁷T̄anga Kjisoo xi je be ni xi kats'énkjó kui jaá, b̄i katsoó:

—Ngayeje nguindie nínga botixómá ngo nda re tsi jó tjín kama nga skjánjo xkjín, je s'ijña soboá, kó tsi xta xi síndo ngo ndi'a tsi jó tjín kama, nguijí kámájíin k'uijná ngase. ¹⁸Kó tsi xindajín tsakjanga yojoo, ¿kóts'en k'uijná ngase nguindie nínga botixómá? Ngat'a jún ndyi'mijnú nga nga'niuú xindajín Belsebuu ts'enkjien án nga 'boxié an xindajín. ¹⁹Ngat'a tsi an tangat'anii xindajín Belsebuu nga 'boxié an xindajín, ¿kó xtajnú kjoaa 'yáni 'boxié kuí? Kuí ni nga, t̄i kuí ní xi Ne ndi'amasiénjnú kama. ²⁰Ngat'a tsi

tangat'anii nga'niuú Néná, nga 'boxié an asién nixtiín xindajín, jákoxí nga Néná je kotíxomajnú.

²¹ 'Kji'a nga ngo nda xi tjingá'niuú kojo xi tjíndaq yojoo nga skjan xi ts'énkoón ndi'a_a, jmíjín xi sa'ínjo ni xi tjiín. ²² Tanga kji'a nga ndibá ingo nda xi tjín ngaseé nga'niú, kó tsi sa'iín, kjoá'áxiín ni xi ts'énkjién nga kján xi kamá'niátakón, kó ni xi sákoo sa'ínkabisón.

²³ Xta xi kjoandanajín tikón, kondra tsá'an tikón, kó xi ánjín kjoá'átkójona ngo ni, ts'énkjítjónsón.

Bí ts'én katsáya Kjisoo kjoaa kui Asién nixtin xindajín xi foe'e'oyá nguinií
(*Matiq 12:43-45*)

²⁴ 'Kji'a nga ngo asién nixtin xi ndajín fotjoo ngo nda, nguindie nínga kixí fotso'bá nga mongase nguindie, kó nga sakójíín s'e bí ts'én ts'énkjó: "Kjuin'oyánguiñá an ndi'a nínga jatjo an." ²⁵ Kó nguije fochó nguiní, je akatíchá kui nguindiee kó je kini'ánchoon. ²⁶ Kó s'e fí kó 'bitíkó ngui yito asién nixtin xi 'niú ndajín ngase tā boajíín kui, kó 'bos'ienjin ngunií kui ndaa, kó kia 'bíndo, kó kui ndaa ch'o ngase ts'én 'bíjñá tā boajíín ngas'e.

Bí ts'én katsáya Kjisoo kjoaa xtā xi jákoxí nga achichí rā tsjaá

²⁷ Tjienga Kjisoo katsó kui nii, ngo xtachjoón xi jatjo nguijiin xtā kjiín askandáyá má nga bí katsó:

— Achichí rā tsjaá xtachjoón xi ye'eé kojo xi katsjaá chiki xi akaki ji!

²⁸ Kó Kjisoo bí katsoó:

— Tasá tjón ma ra achichí rā tsjaá xtā xi nt'ié eén Néná, kó ts'enkjátjosón!

Bí ts'én tsíchjía Kjisoo kjoaa xtā xi mejeén skuie ngo kjoandikón
(*Matiq 12:38-42; Marko 8:12*)

²⁹ Kó xtā kjiín kamátikót'aá Kjisoo, kó kui íts'iyanií nga bí katsó:

— Ndajín xtā xi tjín kuí nixtiín, ngat'a ngo chiboa ndyimí'á, tānga jmí chiboa koe'éjiín, tā kuí tsí chiboa nda xi 'mí Jonaá. ³⁰ Ngat'a xikó ts'en Jonaá chiboa kamaá xtā xi chijani naxindá Nníbee, tī boaq tī ts'én chiboa kamaaq ndíi nda xi'l'iin xtā xi tjín kuí nixtiín. ³¹ Kó ná reina xi atíxomaq nanguí Sabá kjostjíen kondraaq kui xta xi'l'bí kó tī kotíjeé, ngat'a ngaskande nínga fet'anii t'ananguí kjindibáni nga tsint'ieé kjoakjíntakoón Salomoo, kó ngot'e k'ie tikónjojnú ngo nda xi nk'a ngase xaá tā boajíín Salomoo.

³² Xtā xi chijani naxindá Nníbee kjostjíen nixtin nga si'anjeé kui xtaaq, kó kui xi sa'ínjeé kui xtaaq, ngat'a nga tsint'ieé ni xi ínijmi Jonaá kats'énk'oyá yojoo, kó ngot'e k'ie tikónjojnú ngo nda xi nk'a ngase xaá tā boajíín Jonaá.

Bí ts'én akóyá Kjisoo kjoaa ndi'ixoó yojoná
(*Matiq 5:15; 6:22-23*)

³³ 'Ngojín xtā xi kui'ítí ngo ndi'ixó tsí'e nga ngo nguindiee ngo kojo kui'íjñá, kojo tsi nguindiee ngo koxa, a mí tsí tāsá nk'a kui'íjñá, tsí'e nga

sa'íntsijeen xt̄a xi k'os'ien nguiya ndi'aq. ³⁴ Ndi'ixoó yojoná kuí xí ndyikón, kó kji'a nga nda ndyikin, kojo ngayeje yojoo nga k'uiéé ndi'i, t̄anga kji'a nga ndajín ndyikin, kojo yojoo nga tikónjñó. ³⁵ Chíin nga jnójín kama kui ndi'i xí tjiín. ³⁶ Joon, kuí ni nga, tsi ngayeje yojoo tjiín ndi'i, kó tsi jmíjíin chíi nínga jnó, ngayeje nga k'uijñá 'na 'na, xikó maá kji'a nga ngo ndi'ixó ts'entsijen xo xo ndi'ií.

Kjisoo bi ts'én yínguítain já fariseo kojo já chjiniekjoakitií

(Matio 23:1-36; Marko 12:38-40; Rk 20:45-47)

³⁷ Kó nguije kamá nga tsíchjia Kjisoo, ngo nda fariseo 'niú tsí'áa tsí'e nga koejekjiniejo nñó ndi'aq, kó nguije ts'as'ien Kjisoo, kis'ijñat'a yamíxá. ³⁸ Kó s'e nda fariseo nga kamábe, ta bi ta kamaá nga Kjisoo aníejónjín tsja nguindiee nga skjinie ni chinie. ³⁹ S'e Ndiáa bi katsoó kui ndaa:

—Jún já fariseo, nií'ántsiejnú ngaxton t̄iboa kojo bosojnú, t̄anga nguiyaa inímajnú tjiktsie má ni xi kasakojnú tangat'anii kjoachejéjnú kojo kjoandajínjñú. ⁴⁰ ¡Já kitikjoa! ¿A yajínjníu nga xi kats'enda ngaxton kui nii, t̄i kuí ní xi kats'enda nguiyaa nga? ⁴¹ Tanga te'éjnú chjie ni xi tjjíin inímajnú, kó s'e boá ts'én nga tsjie kama ngayeje nií nguindyíkón Néná.

⁴² ¡Níma xó jún já fariseo!, nga boe'éjnú ngo tíkjaá xka mentaa, xka puchaá, kojo ngayeje xka xi maxchájnú, t̄anga ch'áxkijíjnú kjoakixii kojo kjoatjoó Néná. Chjen nga si'ánjníu kui nii, t̄anga t̄i chjen nga si'an ni xi ingoo.

⁴³ ¡Níma xó jún já fariseo!, nga tjojnú kui yaxíríe xi tjón síndo ndi'a nínga ndokjoa eén Néná, kojo mejénjníu nga ndikón ts'én si'antindéjnú nditseen.

⁴⁴ ¡Níma xó jún já chjiniekjoakiti, kojo já fariseo, jókjen!, nga jún boá kónjníu xikó maá ngo ngatsjo xi tji'má, xi xtaa ndyitsjánié nga nde bejín.

⁴⁵ Ngo nda chjiniekjoakitií, bi katsoó Kjisoo:

—Mostro!, kji'a nga boá t'íse ji, ngaskande jin ch'o t'ísejne.

⁴⁶ Kó s'e Kjisoo bi katsó:

—¡Níma xó jún ndatsa jún já chjiniekjoakiti!, ngat'a xtaa 'bíniejnú ch'a xí ee xi kajiín, t̄anga jún nde ngo ndsajnú ni'ánjojínjñú.

⁴⁷ ¡Níma xó jún já chjiniekjoakiti, ngat'a ni'ándajnú ngatsjoó já chjinie'eén Néná kui xi t̄i kui xt̄a xi xchájnú kats'énkjesón! ⁴⁸ Kui ni nga chistikojnú kojo nda kamájnú ni xi kats'én xt̄a xi xchájnú, ngat'a kuí xí kats'énkjesón já chjinie'eén Néná, kó jún kini'ándajnú ngatsjoó.

⁴⁹ Kuí ni nga Néná bi katsó nga kats'énkjién kjoakjíntakoón: “An sanguiyajnú'un já chjinie'eén Néná kojo já apostro, kó kui xtaa tjín xí si'an'ien, kó t̄i tjín xí kuiyotjinguií.” ⁵⁰ Tsí'e nga Néná kui'aq xki xt̄a xi síndo ngot'e kjoaqá jín xi iskjitjón ngayeje já chjinie'eén Néná ndeskande nga íts'iyanií nga kats'enda kui ngasondiee, ⁵¹ ndeskande jiín nga kini'ánk'ien Abeé, ngaskande nga kini'ánk'ien Sakariaq, kui nda xi kini'ánk'ien nguindyioó t'a nchandikoón kojo nangoxii Néná. Kuí ni nga xiyájnú'un nga

Néná kui'a xki xta xi síndo ngot'e kjoaa nga kini'ánk'ién kui já chjinié'eén Néná.

⁵²'Níma xó jún já chjiniékjoakiti!!, ngat'a kachja'áxinjnú yibii kjoakjínkoón, tanga tí nde jún ikitjas'ienjínjnú, kó xta xi ts'as'ien katse'éndiejínjnú nga k'os'ien.

⁵³Nguije katsó kui nij Kjisoo, já chjiniékjoakiti kojo já fariseoo achichí kats'énxchán, s'e íts'iyanij nga kjín ni asíyaá tsi'e nga kats'énxtí Kjisoo,

⁵⁴íjñáa chjaya, tsi'e nga tsi ta'a ngo ni xi ndajín kji'i kuichchia tsi'e nga koónguíta'in.

Bi ts'én tsíchchia Kjisoo kjoaa kjoajókjeen

12 Tjienga achichí kjín mi xta kamátikót'aq Kjisoo, kó ngaskande katsjánié má xkjín, Kjisoo íts'iyanij nga tjón bi katsoó xta tsi'e:

—Chónjnú yojojnú kjoaq nisaan nda'yo paan já fariseoo, ngat'a kuí nii xi kjoajókjeen. ²Ngat'a jmíjín ni xi tji'má, xi xchajín mí nij boa, ti nde jmíjín ni xi tikón'má xi xchajín. ³Kó kuí ni nga, ngayeje ni xi je kandokjoajnú nínga jñoó, kondal'yá nínga tsijeen, kó ni xi kandokjoajnú nguiya'maa, ngaskande nk'aq ngo ndi'a 'niú kondókjoa.

Bi ts'én akóyá Kjisoo kjoaa 'yá xi kondokon ní

(Matiq 10:26-31)

⁴'Já kuí ni nga bi xiánjnú'un já amingo nga ngata ndakonjín majnú xi ts'enk'ién yojoná, s'e nguti jmí ni ts'énjín nguijee. ⁵K'ie kokojnú'un 'yání xi kama kondokonjín: Tindakonjín kui xi nguije ja'áxínná kui kjoamindyioo, tjiín nga'níu nga kamaa sa'ínkjíná ndoboank'ieen. Joon kuí xi'ba xi tindakonjín.

⁶'¿A kuijenjiín jó ndi ton ún ndi nisie? Kó nde ngojín kui nisiee xi kichiyá nguindyikon Néná. ⁷Ngat'a ngaskande nga ngo nga tsja xi tjiín tokó tjiixkí. Já kuí ní ngata ndakonjín majnú, ngat'a jún chjí ngasenij jún ta boajiín kjín nisie.

Bi ts'én katsáya Kjisoo kjoaa xta xi kotsoya nga kia tjimá tjinguii

(Matiq 10:32-33; 12:32; 10:19-20)

⁸'Xiyájnú'un nga ngayeje xta xi kotsoya nga bena nguindyikon xtaa, ti boa ti ts'én ndií nda xi'iin kotsoya nguindyikon ndítsjiee Néná nga be kui.

⁹Tanga xi kotsoya nga bejínna nguindyikon xtaa, ti boa ti ts'én xiyá an nga bejín an kui nguindyikon ndítsjiee Néná.

¹⁰'Ngayeje xta xi ch'o katsoo ndií nda xi'iin, si'anjetakoón, tanga xi ch'o katso kondraa Asién Nixtiin Néná si'anjetakónjiín.

¹¹'Kó kji'a nga konguínjojnú ndi'a nínga ndokjoa eén Néná, kojo tsi nguindyikon ne ndi'amasién, kojo tsi nguindyikon xtaxá, ngata ndajín majnú kjoaq ni xi kondókjoajnú, kojo tsi ni xi k'uinjnú, ¹²ngat'a Asién Nixtiin Néná kokóyajnú ti kuij chiboa ni xi k'uinjnú.

Bí ts'én íjñá chiboa Kjisoo kjoaa énkjiín nda chon chini

¹³ S'e ngo nda jatjojin nguijiin xtä kjiín xi bí katsoó Kjisoo:

—Mostro! boä t'iin nts'ié án nga kokjángá kó nga tsjana ni xi tsoboána xi kis'iee na'mina.

¹⁴ Kó Kjisoo bí katsoó:

—Ji nda, ¿yá xí katsjána xá nga Ne ndi'amasién kojo nga tsi an xi kokjangájnú'un nijnú?

¹⁵ Kó s'e bí katsó ngase:

—Tsitsíjenjnú, kó chónjnú yojojnú kjoaa ngayeje kjoaxkí'átoon, ngat'a kui kjoamindyioon xtaaq jmí tsi tsil'e nga kjín ni k'uiée nga síndo.

¹⁶ S'e katsáya kui énkjín xi bí tsoó:

—Ngo nda chon kis'ijñaq ngo t'anangui xi achichí ni katsjá. ¹⁷ Kó kui nda choon bí ts'én kats'énkjó: “¿Mí xi sa'in an ngat'a jmíjínna nínga kjoa'atjó an ngayeje ni xi kamá xchána?” ¹⁸ Kó bí katsoó yojoó: “Kui niij xi sa'in an: sa'inkixondó án ndi'a nínga foa'atjó an ni xi maxchána, kó ndi'a xi yi'i ngase xi sa'inda an, kia kamaa nga kia kjoa'atjó an ni xi kama xchána kojo ni xi tjínna, ¹⁹ s'e nguijee bí xiáan yojona: Ji nda!, achichí ni je tikontjoó, kó kjín nó kjochókjoaa, ti'inkja'yé'né, chini, t'l, kó tsjats'lén tindiyin.”

²⁰ Tanga Néná bí katsoó: “Chini”, a yéjín nga kui nixtjien koye jí, kó ni xi je kachje'etjé, ¿yá xí tsil'e kamaa?” ²¹ Boä maa kui xtä xi tsie kjoachon 'bitíkoó yojoó, tænga achichí nimá síndo nguindyikón Néná.

Bí ts'én akóyá Kjisoo kjoaa nga Néná koon ndií

(Matiq 6:25-34)

²² S'e jaskan Kjisoo bí katsoó xtä tsil'e:

—Kuí ni nga bí xiánjnú'un: Ngata ndajín majnú kjoamindyionjnú, kjoaa mí ni xi xiniejnú, kojo kjoaa yojojnú kojo kjoaa njño xi xchajájnú. ²³ Ngat'a kjoamindyioon chjí ngasenii tå boajiín ni chiniee, kó yojoná chjí ngasenii tå boajiín njño xi chajaá. ²⁴ Tsitsíjen chiboa yajnú nisiee nga jmí ni 'bitiejín, jmí ni maxchájíin, tå nde jmíjín nínga foa'atjó ni xi kjinie, kó Néná tsjaá ni xi kjinie. ¿Kó a chjí ngasenii jún tå boajiín nisiee? ²⁵ ¿'Yá ní jún xi kamaa nga masien metro sa'ín nk'a ngase yojoo nga nda kamaa? ²⁶ Jä tsi majínjnú ni'anjnú ngo ni xi chichí, ¿mí kjoaa nga nda kjimajnú kjoaa ni xi ngasee?

²⁷ Tsitsíjen chiboa yajnú naxó xí tjín nguijin k'ijñáa, kóts'en kjimaxchá, kó ts'énxájín tå nde jmí njño kjóyajín, tænga xiyájnú'un nga nde nda re Salomoo, nda tsi tsie kjoaje kis'iee, kamájíin tsajá ngo njño xikoó xi boajá naxoó. ²⁸ Kó tsi kui k'ijñá xí ngot'e tikón nguijin k'ijñáa kó ndyiojón ngo nguiyaa ngo orjno je kití, boä ts'én ts'énkjájá njño Néná, ¿ja kó kjí'i ngase ni xi sa'ín Néná kjoaa jún? ¡Ánní nga tá chiboa s'ijinjnú! ²⁹ Kó kuí ni nga ngata ndasenjín mindyiónjnú nga kuindiséjnú mí ni xi xiniejnú, kojo mí ni xi s'lojnú. ³⁰ Ngat'a ngayeje kui niij xi mongase xtaaq kui ngasondiee, tænga

jún tikónjnú ngo Na'mi xi je be mí ni xi chjiénjnú. ³¹T̄anga t̄asá t̄indiyiséjnú kjoabotíxomaq Néná kó ngayeje kui nii, ta s'isonrií nga sakojnú.

Bí ts'én akóyá Kjisoo kjoaa kjoachoon ndi'ak'ajmii

(Matiq 6:19-21)

³²'Ngat̄a ndakonjín majnú, jún chotsanga xi tsaq'an xi chiboa majnú, ngat'a Na'mijnú, tangat'a qjoandaq, je boaq katsó nga tsajinú nguindie nínga botixómá. ³³Tatíñajnú ngayeje ni xi tjínjnú, kó tqon tonchje t̄i'ánjnú nga koe'ejnú xt̄a xi chjieén, t̄i'andajnú stsa xi kama xchajín, kó chjal'átjójnú ndi'ak'ajmi jan kjoachon xi kjuejín, nínga chejeé kjochójín, kojo nínga cho'indaq kámájíiñ sa'ínkjié. ³⁴Ngat'a nínga tikón kjoachonjnú, t̄i kia k'uijñá inimajnú nga.

Bí ts'én akóyá Kjisoo kjoaa ngo moso xi nda kondaa

³⁵'T'íjñandajnú yojojnú, kó t̄íti síkijíjnú ndi'íjnú, ³⁶kó jún boaq t̄i t̄il'ánjnú xikoó moso xi koyaq ndiaxi tsil'e xaá nga kjo'e tsi ngo ndi'ibixan kijí, nga sa'ínkjanie ngantjoa, kó kui mosoo tatra skjix'a. ³⁷Achichí r̄a tsjaá moso xi kji'iféjín nga kjochó ndiaa, jakoxi nga t̄i kui ndiaa sa'ínk'ijñát'a yamíxá kó t̄i kui sa'ínséen. ³⁸Kó nda tsi masien nixtjién kojo nda tsi ndiba'ásieén kjo'e, kó skuié mosoo nga kji'iféjín, achichí r̄a tsjaá kui mosoo. ³⁹T̄anga ngatamakjíjnú kui nii: Tsi nda xi tsil'e ndi'aq skuié mí chiboa nga kjochó chejeé ndi'aq, jakoxi nga nde kjoféjín, kó tsjandiejiín chejeé nga k'os'i'en. ⁴⁰Já kuí ní, jún chjien nga kuindiyondájnú, ngat'a nde xchajíjnú, mí chiboa nga kjo'e ndií nda xil'in.

Bí ts'én akóyá Kjisoo kjoaa moso xi majín 'niátakoón

(Matiq 24:43-51)

⁴¹S'e bí katsó Peé:

—Ndia!, ¿A jin xí kini'ínkakínjne kui énkjiín, axa ngayeje xtaa?

⁴²Kó Ndiaa bí katsó:

—¿'Yá moso xi kixi kojo xi 'niátakón xi kamaa si'ankjatjosón, kji'a nga ndiaa sa'ínkonda ndi'aq tsil'e nga chiboaqa má tsjaá ni chinie xtaa? ⁴³Achichí r̄a tsjaá nda moso xi nga kjo'e ndia tsil'e tjits'éñ xá xi katse'eé. ⁴⁴Jakoxi ni xi xiánjnú'un nga kui mosoo kuí xí sa'ínkonda ngayeje ni xi tjiín ndiaa.

⁴⁵T̄anga tsi kui mosoo bí ts'én sa'ínkjó inimaa: K'ondiyárií ndiaa nga kjo'e, kó kui'ítsiya ni nga ko'on moso xi ngase xi xil'in kojo xi ínchjiín, kó skjinie kojo k'uí, kó kama ch'i, ⁴⁶kó nixtin kojo chiboa nga skoyájín kui mosoo nga kjochó ndiaa, kó nga skuié kui nii, achichí ko'on kui mosoo, kó kia nínga síndo xta xi ma 'niátakónjín sanguíya.

⁴⁷'Kui moso xi je be mí ni xi mejeén ndiaa, kó kis'ijñandajín, t̄i nde kats'énjín ni xi mejeén, achichí kjín n'iú kjoaa. ⁴⁸T̄anga kui moso xi bejín mí ni xi mejeén ndiaa, kó kats'én ni xi be nga kjoánií, chiboa

tsí n'iñiú kjoaá, ngat'a ngayeje xi tsie katse'eé, tsie chjia'aa, kó xi tsie kini'án'niátakón, tsie ngase chjia'aa.

Bí ts'én katsáya Kjisoo nga tangat'anii kui nga kokjanga xtaa

(Matiq 10:34-36)

⁴⁹'Jé'ek'itíngá án kui ngasondiee, jkó achichí mejénna nga je kuitinga!

⁵⁰Tanga tjón ma ra ngo kjoanima xi 'niú kjoa'ajin an, jkó achichí nda kjimana ngaskande nga kjomosón! ⁵¹¿A ndyini'ánkjójnú nga kjoaxió jé'ejoo kui t'ananguii? Xiyájnú'un nga jmí, jé'ekakjangá án. ⁵²Ngat'a ngot'e kui'ítisiyanii nga nínga síndo ún xta ngo ndi'a, kokjanga, jáñ kama xi kondra k'uíndonij xi ngui joó, kó xi joó kondra k'uíndonij xi ngui jaán. ⁵³Na'lmií kondra kamaa ndií, kó ndií kondra kamaa na'lmií, naaá kondra kamaa ndi chjoón, kó ndi chjoón kondra kamaa naaa, nchi'yaá kondra kamaa kjandaa, kó kjandaa kondra kamaa nchi'yaá.

Bí ts'én katsáya Kjisoo kjoaqá nga kóts'en nga yájín kui nixtiin

(Matiq 16:1-4; Marko 8:11-13)

⁵⁴Bí katsoó Kjisoo xta kjiín nga:

—Kji'a nga yájnú ndi xi ndibaní nínga 'botjé ts'ueé, tjien má bí 'míjnú: Stsé koa'a, kó boä ma. ⁵⁵Kó nga foa'a tjo xi ndibaní xtjién nanguii, bí 'míjnú: Sibé kama, kó boä ma. ⁵⁶¡Xta jókjén! ¿Ánní nga yajnú nga nda, axa ndajín kama nixtiin nga tsitsijenjú kó kji'i nk'a jan kojo t'ananguii, kó ánní nga makjínjínjní kui nixtiin?

Bí ts'én akóyá Kjisoo kjoaqá nga tsá si'andajinjnú kjoaxti xi

tjínjnú jún kojo kondrajinú

(Matiq 5:25-26)

⁵⁷¿Ánní nga tì júnjín xi boä 'míjnú mí ni xi kixijín? ⁵⁸Tsi tjín xi kotjéjtá'íín kó tsi nguindyikón jáxaá k'uínje, tì'in ji ngo kjoaq'niiu nga t'índeje kui ndaá nguindiee nga kjóchójnú nínga tikón ne ndi'amasieen, ngat'a tsi k'uíndajínjnú nguindiee, ne ndi'amasieen sa'ínk'as'ieen ji ngo ndajun xi kjojoo ndoboya. ⁵⁹Kó xiyaá nga kjomosón ji ngaskande nga ik'íchjí jí ngayeje ton xi tjtjíeén.

Bí ts'én akóyá Kjisoo kjoaqá nga sa'ínk'oyá inímaa xtaa, axa xchaja

13 Tí kuij nixtin, tjín já xí katsáyaá Kjisoo nga nda xtitjón xi chjiani Roma xi 'mí Pilatoo, kjín xó má xta xi chjiani nangu Galilea xi kats'énk'ién, kó jiín kia xó kats'énk'ájiín cho xi kats'énk'ién nga kats'énk'as'ien kjoatjó. ²Kó Kjisoo bí katsó:

—¿A berií takónjnú nga kui xta galilea xi boä kamaá jesón kjoaqá nga 'niú kis'ié ngasee já, ta boajiín ngayeje xta galilea xi ngasee? ³Xiyájnú'un nga, jmí, tanga tsi si'anck'oyájínjnú yojojnú tsil'e nga si'anckjatjosónjnú Néná, tì boä tì ts'én koyajnú ngayejejnú. ⁴¿Axá a berií takónjnú nga xta xi tji'únján

xi jesón nga ts'ákanieé tarié kia Siloë nga tsie ngase jé kis'iee tā boajiín ngayeje xtā xi chjiani naxindá Jerusalén? ⁵ Xiyánjú'un nga, jmí, tānga tsi sīank'oyájinjú yojonjú tsī'e nga sīankjatjosónjú Néná, tī boá tī ts'én koyajnú ngayejejnú.

Bí ts'én íjñá chiboa Kjisoo kjoaqá énkjiín yá igo xi jmí to boajájiín

⁶S'ē katsáya Kjisoo kui énkjiín:

—Ngo ndā kis'ijñaq ngo yá igo nguijin nínga 'bitjie tostsijeé, kó kijíkatsijeen tsi ta'a yajaá igo, tānga nde ngo kasakojiín. ⁷Kó bí katsoó ndā xi ts'énkonda kui nguindiee: "Je ján nónií nga foé'ekatsijeen kui yaá tsi ta'a yajaá igo, tānga nde kjie ngo ndiya sakóna too, kó kuí ni nga tásá tiché jí, ¿mítsjá nga t'anangui ts'én'bix'iān?" ⁸S'ē kui ndā xi konda kui nguindiee bí katsó: "Ji Ndíia, ngat'íjña ra kui noó, ngaskande nga kjonguit'a an nínga sikón, kó kuindyámáraa abono tsī'e nga tsjanga'aniuú. ⁹Kó tsi tsjaá to, ngat'íjña, tānga tsi jmí to tsjajín, kama ngatichá nguijee."

Bí ts'én kats'endaya Kjisoo ngo xtachjoón nga nixtin ndikón

¹⁰Ngo nixtin ndikón Kjisoo ts'énbokoyá nguiya ndi'a nínga ndokjoá eén Néná, ¹¹kó kia kis'ifña ngo xtachjoón xi tji'únján nónií nga kis'ijñajíin ngo aşıén nixtin xi ndajín xi katsjaá ngo chil'in, kó ta kistsol'bá nñá, kó nde kamájín kis'ínakixi. ¹²Nga kamábe Kjisoo, tsichjiaq kó bí katsó:

—Xtachjoón, je íjñandeé chil'in.

¹³Kó Kjisoo íjñasoón tsja kui xtachjoón, kó tjién má kis'ijñakixi, kó kui xtachjoón íts'íyaníi nga katsjaá kjoaje Néná. ¹⁴Tānga ndā nguitókoo ndi'a nínga ndokjoá eén Néná, kats'énxchán ngat'á Kjisoo kats'endaya nga nixtin ndikón, kó bí katsoó xtaa:

—Jun nixtin tjiín xomanaa nga ma ni'lánxá, s'ē ngo nixtin nga ni'lánkja'yá. Jún chjien nga nixtin nga ni'lánxá nga kjindibájnú nga kamandayajnú, jmí tsi nga nixtin nga ni'lánkja'yá.

¹⁵S'ē Ndíaa bí katsó:

—Xtā jókjën, ¿a 'naxiejínjú nguiindie nínga síndo choyojojnú kojo bórrojnú tsī'e nga koejek'i ndójoa nga nixtin ndikón? ¹⁶Kó kuí xtachjoón xi xta tjiée Abraam, kui xi xindajín Satanaa tji'únján nónií nga tjitá'niuú nga kats'én'oón, ¿a kamájín kachjándó nga íjñandé nga nixtin ndikón?

¹⁷Nga katsó Kjisoo kui nii, achichí soboá kamaá xtā xi kondraa, tānga ngayeje xtā naxindaá achichí tsja kamaá kjoaa kjoaje xi kats'én Kjisoo.

Bí ts'én íjñá chiboa Kjisoo kjoaqá énkjiín xojmaá mostasaá

(Matig 13:31-32; Marko 4:30-32)

¹⁸Kó Kjisoo bi katsó nga:

—¿Mí ni xi k'uijñáchiboañijnú'un nínga botixómá Néná, kó mí ni xi boá má kji'i? ¹⁹Xikó maá ngo ndi xojmaá mostasaá xi ngo ndā iskjíbe kó ítjie

nguijin jnoo, kó kamá xchá, kó kamá je kó nisié xi tjín nk'a jan kia índo ndoboaa tjaáa yaá.

Bí ts'én íjñá chiboa Kjisoo kjoaa énkjiín nisan xi mindyiakátjo paan
(Matiq 13:33)

²⁰Kó tí bí tí katsó nguiní:

—¿Mí ni xi kama k'uijñáchiboa yajnú'un, nínga botixómá Néná? ²¹Xikó maá nisan xi mindyiaa nda'yo paan, xi jáñ chiboa iskjíbe ngo xtachjoón s'e kia indyiaá ndsokoan nñoo ngaskande nga kaxongatjo ngayejee.

Bí ts'én akóyá Kjisoo kjoaa ngantjoa xkjoó
(Matiq 7:13-14, 21-23)

²²Kó Kjisoo kijí ngayeje naxindá, kojo nangui xixi nga akóyá eén Néná, kó nga kijí naxindá Jerusalen. ²³Ngo xi bí katsoó:

—Ndia!, ¿a chiboa tsí má xi fotjo'aá?

Kó s'e Kjisoo bí katsó:

²⁴—Tíl'ánjní ngo kjoa'niu nga kuitjás'ienjní ngantjoa xkjoó, ngat'a xiyájnú'un nga achichí má xta xi kámamejeén k'os'ien, kó kámájiín. ²⁵Nguije jastjíen ndiaa ndi'aá kó nguije kui'l'ichjá ngantjoaa, kó nguije tindyajní nditsen jan nga si'anckjaniejnú ngantjoaa nga bí k'uinjní: “Ndia!, Ndia!, chjáx'ejne”, kó nga kuichjia kui, bí katsojnú: “Bejín an ñá kjindibájnú.” ²⁶Kó s'e bí k'uinjní: “Nguindyikin ji nga kichinie kojo nga ki'yójne, kó akakayé ji nínga síndo nditsenjne.” ²⁷Kó bí katsojnú: “Bejín an ñá kjindibájnú, tixión boa'ájnú, ngat'a xta xi ndajíjnú.” ²⁸Kia xcha'ájnú kojo kjonie n'niujní, kji'a nga xchajní Abraám, Isaá, Jakob kojo ngayeje já chjinie'eén Néná nga síndo nínga botixómá Néná, kó jún nditsen kuindyiónjní. ²⁹Kó nga nijún tjinguii ngasondiee nga kjindibáni xtaa, kó k'uíndot'a yamíxaá nínga botixómá Néná. ³⁰Kó k'íee, nga xta xi kjuiet'aá kui xi tjón kama, kó xi tjoón kui xi kjuiet'aá kama.

Bí ts'én kamándaseen Kjisoo kjoaa xta naxindá Jerusalen
(Matiq 23:37-39)

³¹Tí kuii chiboa jachó já fariseeo xi bí katsoó Kjisoo:

—Tjatje ji Kjisoo, xín t'en ji ngat'a Erodee mejeén sa'ínk'ieén.

³²Kó Kjisoo bí katsóo kui jaá:

—Tanguínjní kó bí t'ínjní kui xanñaá: “Nga k'oxié an xindajín xi tjíjíin xtaa, kó sa'indaya an ngot'e kojo ndyiojón, kó xi ma jáñ nixtin kama ni xi sa'in an.” ³³Tanga chjen nga ngot'e kojo ndyiojón, kojo nguij kjuin rá an ndiyana ngaskande nga kjócho an naxindá Jerusalen, ngat'a kámájín tsi xín nangui koya ngo nda chjinie'eén Néná.

³⁴Jún xta naxindá Jerusalen, jún xta naxindá Jerusalen, xi ni'ánk'iéñjní já chjinie'eén Néná kó ndijo foyájnú xta xi nanguiyajnú! ¡Kó tjín ndiya kamámejénna itikojní'un, xikó ts'en 'bitfkó ndií xandá naa nguindie ngaa,

kó kamámezénjínjnú! ³⁵ Ngot'e'ne, nguindiejnú k'uijñámasien, kó xiyaá nga nguiti xchejín ní, ngaskande nga kjochó nixtin nga bí k'uijnjnú: “Ngatama chikonñé xi ndibaní ngajoo Ndianá.”

Bí ts'én kats'éndaya Kjisoo ngo nda xi ma ske yojoo

14 Kó ngo nixtin ndikón, Kjisoo kijíkjinie ñño ndi'aq ngo nda xi tjiín xá xi nda fariseo, kó já fariseo xi ngasee askotsijen ndá ndaá ni xi kats'lén Kjisoo. ²Kó ngo nda xi ske yojo kis'iñña nguindyíkon Kjisoo. ³Kó Kjisoo bí katsoó já chjiniekjoakitií kojo já fariseo:

—¿A tsjandié kjoakitií nga káma, axá kamájín sílandayá ngo xi oon nga nixtin ndikón?

⁴Xió kis'indo kui jaá, s'e Kjisoo kats'éndaya nda xi oon, s'e kats'énkjí. ⁵Kó Kjisoo bí katsoó kui jaá:

—Tsi ngo ndijnú kojo tsi choyojojnú k'okayá ngo ndaích'i, ¿a mí tsí tí kji'a ko'naxiéjnú nda tsi nixtin ndikón?

⁶Kó nde jmíjín xi kamákón nga tsíchjia ngase.

Bí ts'én tsíchjia Kjisoo kjoaa xtä xi fí ngo ndi'ibixan

⁷Kjisoo kamábe kóts'en foa'ájin yaxíré xi tjón síndo t'a yamíxa, kó bi katsoó nga ínjimií kui énkjiín:

⁸—Kji'a nga tjín xí kotsoyaa tsí'e nga k'uín jí ngo ndi'ibixan, ngata jíjín tjón mindyint'e ji yamíxá, ngat'a tsi kjochó ngo xi ndikón ngase tā boajíin ji, ⁹kó tsi kjochó xi katsáyaá kó bí katsoo: “Teléndiée nga k'uijñá kui nguindiee kui xi'bí”, kó achichí soboá kámaq nga kuijndiyin ji nguindie xi fet'aq. ¹⁰Tasá kji'a nga tjín xí kotsoyaa tsí'e nga k'uín jí ngo ndi'ibixan, t'en ji, kó ngaskande nguindie nínga fet'aq tíndiyin, tsí'e nga, nga skuiee xi tsí'e s'ueé, bí katsoo: “Nda amingo', jabí'in tasá k'ie tíndiyin nínga tikón kui nguindie xi tjón xi'bí”, kó kji'a nga k'uiéé kjoaje nguindyíkon xtä xi níjan síndojoó t'a yamíxa. ¹¹Ngat'a ngayeje xtä xi nk'a k'oxié yojoo, nguindié jan síank'íjñá, kó xi nguindié jan kuijñá yojoo, kuí boá xi nk'a síank'íjñá.

¹²Kjisoo tí bí tí katsoó nda xi katsáyaá s'ué xí kats'én:

—Kji'a nga síl'in jí ngo s'ué kojo tsi ni chinie kqe'ée xtaa, ngata 'míyejíin já amingoo, kojo já nts'ie, kojo xingui, kojo xtä t'a ndi'aq xi choon, ngat'a kui xtaa kotsoya nguinií ni xi sa'ín kó tsja'lóyá nguinií ni xi tiboe'ée.

¹³Tasá kji'a nga ngo s'ué síl'in, íyéé xtä nímaq, xtä xi níma tsja, xtä xi majín fí, kojo xtä xi tíka, ¹⁴kó achichí tsja ngatamaa, ngat'a kui xtaa kamájíin kuijñá, tanga kji'a nga kjoa'á yaá xtä xi kixi.

Bí ts'én íjñá chibqa Kjisoo kjoaa énkjiín nga chinie ñño nga jñoó

¹⁵Nga tsint'íe kui nii, ngo nda xi tikont'ajo yamíxa Kjisoo, bí katsó:

—Achichí rä tsjaq xi skjinie ni chinie nguiyaq nínga botixómá Néná.

¹⁶S'e Kjisoo bí katsoó kui ndaq:

—Ngo ndá kats'énda ni chinie nga jñoó, kó achichí xtá katsáyaá. ¹⁷Kó nga jachó chiboa nga xinie kui nii, katsanguiya ndá mosoo nga bi katsoo xtá xi katsáyaá: “Ndibájnú ngat'a je tikónda ngayeje nii.” ¹⁸Kó ngayeje xtaa íts'yanii nga tsí'á ngo kjoani'lánjetakón, ngat'a kijijín, kó xi tjoón bi katsó: “Kjoaqá ngo nangui ts'atsie an, kó chjien nga kjuinkátsijeen, tl'injetakín ní.” ¹⁹Ingo xi bi katsó: “Kjoaqá ún 'niú choyojo xi'in xi ni'ánxájo ts'atsie an, kó kuí ts'enfíkjit'oyájo an, tl'injetakín ní.” ²⁰Kó ingo xi bi katsó: “Ngot'e maá ixán an kó majín fí an.” ²¹Nga jachó nguini mosoo katsáyaá ndia xi tjits'én s'ueé, kó achichí kats'énxchán kuí ndaa, s'e bi katsoó mosoo: “T'en ji ngayeje nínga síndo nditsen, kojo ndiyatié, kó ndibéje ngayeje xtá nima, xtá xi níma tsja, xtá xi níma se, kojo xtá xi tika.” ²²Kó ndá mosoo bi katsó: “Ndia!, je kats'en an ngayeje ni xi kase ní, kó ta kó tjín ngase nguindie.” ²³Kó bi katsoó mosoo ndia xi tsí'e s'ueé: “T'en ji ngayeje ndiyanguí, kojo ndiya k'lijná, kó ndibéje kjoa'niu ngayeje xta, tsí'e nga stsie ndi'ana.” ²⁴Ngat'a xiyaá nga nde ngojín xtá xi xá katsáyaá xi skót'a ni chinie xi kachján ndi'ana.

Bí ts'én tsíchjia Kjisoo kjoaa nga xtaa chjí s'inguii nga fítjinguii Kristoo

²⁵Achichí xtá xi tjimájo Kjisoo, s'e tatra kasasien, kó bi katsoó ngayeje xtaa: ²⁶—Tsi tjín xí mejeén koejetjinguina kó tsi 'niú tjó ngasee na'mii, naaa, chjoón, ndií, nts'ie, ndichja kojo ngaskande yojoo, kámajín xtána káma. ²⁷Kó xi mejéniín nga koyát'a ngo kroo, s'e koejetjinguina, kámajín xtá tsá'an káma. ²⁸¿'Yá jún xi tsi ngo tarié si'andajnú, nga tjónjin xchísonjnú kó tjín ton kjojo, tsí'e nga xchajnú tsi kjochó'á kojo tsi jmí? ²⁹Tsí'e nga tsi ta nguije íts'yanii xoó kó tsi kámandojojiín, ngayeje xtaa kojnokeijnú, ³⁰nga bi katsó: “Kui ndaa íts'yanii nga kats'énda ngo tarié, kó kamándojojiín.” ³¹¿'Axa 'yá ndá re xi koejekjánjo kje'e ndá ree, kó tjónjin má ra skósón tsi sa'ín, nga tie mi ma jajuún, kó kan mi ma jajuún ndá re xi kondraa? ³²Kó tsi kámajiín, nga s'e kjin ts'endibá ndá re xi kondraa, tasá nga tsanguiyaá xtá tsí'e nga koejekí'a kjoaxió. ³³Boa ts'én, ngayeje jún xi tjónjin k'uijñámasienjnú ngayeje ni xi tjínjnú, kámajín xtána káma.

Bí ts'én ijná chiboa Kjisoo kjoaa naxaa

(Matig 5:13; Marko 9:50)

³⁴'Nda naxaa, tanga tsi nguiti ndiájín káma, ¿kóts'en kámandiá nguiní? ³⁵Tasá kuijchíjmi ngat'a nguiti kámachjienjin tsí'e orjnoo, ti nde tsí'e nga káma k'uítí ye'ee choo. Xi tjín tjibonijon nga kuint'ie, ngatint'ie kuí eén.

Bí ts'én ijná chiboa Kjisoo kjoaa énkjiín chotsanga xi kichajaá

(Matig 18:10-14)

15 Achichí xta xi foa'á'yá ton xi machjítjé ni kojo xtajé kijíkóntiñaa Kjisoo, tsí'e nga tsint'ié ni xi tsíchjia, ²kó já fariseoq kojo já chjiniekjoakitii, bi katsó nga tsíchjijata'in Kjisoo:

—Kui ndaa achichí nda ya'a xtajé, kó ngaskande nño kjiniejo.

³Kó s'e Kjisoo katsáyaá kui énkiín:

⁴—Yá nda xi tsi úchan má chotsanga xi tjiín, kó tsi ngo xchajaa, nga k'uijnámasienjín xi ngui ichítie kojo yichán nijaan nangui kjitiyaá, tsíe nga koejengase xi ngoó ngaskande nga sakoo? ⁵Kó nguije sakoo, ngaskande tsja ma kamaā nga ngasón tjiaā kuijñásón, ⁶kó nga kjochó ndi'aq, kuijítikó xtá xi nda ya'a kojo xtá t'a ndi'aq kó bi katsoo: “Tsja ngatamájnú, ngat'a je kasakona chotsanga xi kichajána.” ⁷Já boá t'íxian an nga tsie ngase kjoatsja k'uié ndi'ak'ajmi jan tangat'aniī nga ngo xtajé xi sa'ínk'oyá yojoo, ta boajiín xi ngui ichítie kojo yichán nijan xi kixi xi chjénniín nga sa'ínk'oyá yojoo.

Bí ts'én íjñá chiboa Kjisoo kjoaa énkiín ton xi kichajaá

⁸¿Axa 'yá xtachjoón xi tsi tie ton tikoón, kó tsi ngo xchajaa, nga kuijítijín ngo ndi'ixó kojo kotichá ndi'aq, kó kongase chan chan ngaskande nga sakoo? ⁹Kó nguije sakoo, kuijítikó xtá xi nda ya'a kojo xtá t'a ndi'aq kó bi katsoo: “Tsja ngatamájnú, ngat'a je kasakona ton xi kichajána.” ¹⁰Já boá t'íxian an nga 'bé kjoatsja nguindyíkon ndítsjee Néná nga ngo xtajé xí sa'ínk'oyá yojoo.

Bí ts'én íjñá chiboa Kjisoo kjoaa énkiín ngo ndi xi taxkiya kats'énkié ni xi katsjaá na'mii

¹¹Tí bi tí katsó Kjisoo nga:

—Ngo ndā kis'íjñaa jó ndi xi'in. ¹²Kó ndi xí kjindií bi katsoó na'mii:

“Na'mii!, te'é ní xi tsoboána, ni xi tjiín.” Kó na'mii katsjaá ni xi tsoboáā kui ndií. ¹³Kó nguije ja'a chiboa nixtin, kui ndaā ítikó ngayeje ni xi katse'eé s'e kijí kje'e naxindá kjin, kó kia kis'íjña nga taxkiya kats'énkié ngayeje toon nga kats'éntsjajo yojoo. ¹⁴Nguije kats'énkié ngayeje toon, kjindibá ngo kjindiá kui nguindíee, kó kui ndaā, its'iyaniī nga ja'a kjindiá ndatsa kui. ¹⁵Kó kijí, s'e tsangasexáā ngo ndā xi chjiani kui nguindíee, xi kats'énkjí nínga choon chinga. ¹⁶Kó kui ndaā kamámejeén iskjiniie ni chiniee chingaa, tanga jmíjín xi katsjaá. ¹⁷S'e tichaan kamákjíin kui niī, s'e bi katsó: “¡Achichí kjín mosoo na'mina xi tjiín ni chinie ndi'ana, kó án kji'me kjindiá án! ¹⁸Tasá kjuin nguiñá an ndi'ana, kó bi xiáan na'mina: Na'mii!, je kats'enjé án kondraā ndi'ak'ajmiī kojo kats'enjé án nguindyíkin. ¹⁹Ngaskande nguiti kamájín ndií sé ní, te'lexéní xikoó ngo mosoo.” ²⁰S'e kijí nguiní ndi'aq na'mii.

¹⁹Tí s'e kjin ts'endibání nga kamábe na'mii kó níma kamaá, s'e kijíkja'ayindiya, janíkjá kó atíndsoa'á. ²¹Kó kui ndaā bi katsó: “Na'mii!, je kats'enjé án kondraā ndi'ak'ajmiī kojo kats'enjé án nguindyíkin, kó ngaskande nguiti kamájín ndií sé ní.” ²²Tangá na'mii bi katsoó mosoo: “Naxiéjnú ngo njño xi tsja kji'i, kó t'ilankajajnú ndina kó t'íjñájnú ngo stingaro tsja, kojo tjayájnú ndié. ²³Kó ndibájojnú choyojo xi 'niú jee, s'e t'ilank'ienjnú, xinie kó tsja ngat'iená, ²⁴ngat'a kui ndina k'ien katsaki, kó ja'á'yaá, kichajá katsaki, kó kasakona.” Kó its'iyaniī nga kats'én s'ué.

²⁵ 'Ndá xi xchaá xingaá nguijin jno tjíts'enxá, kó nga jachótíñá ndi'aa tsint'ieé só kó kamábe nga tjichá, ²⁶ kó tsíchjiaa ngo mosoo na'mii, kó asýaá mí ni xi kjima. ²⁷ S'e bi katsó kui mosoo: "Nts'ie je'e, kó na'mii ngo choyojo xi 'niú je kats'énk'ién, kjoaa nga nda je'e ndií kó nga jmí chi'injiín." ²⁸ S'e kats'énxchán kui ndá xi xchaá kó kamámejéñiín ts'as'ien. S'e jataxie na'mii kó índaseen tsí'e nga ts'as'ien. ²⁹ T̄anga kui ndá xi xchaá bi katsóó na'mii: "Tsitsíjin na'mi", kó tjín nónií nga tjíts'enxájoo, kó ngatsjé nixtin tjíts'enkjatjosoón, kó nde ngo ndi chotsangá boe'éjinní tsí'e nga sa'in an ngo s'ué kó skjínjeo an já amingona. ³⁰ T̄anga nga je'e ndií, xi je kats'énkjé ngayeje ton xi katse'eé ndoboa ínchjínmasién, kini'línk'iín ngo choyojo xi 'niú je." ³¹ S'e bi katsó na'mii: "Jí ndi", ngatsjé nixtin tindiyinjení, kó ngayeje ni xi tjínna je jí tse. ³² T̄anga chijien nga kats'en an kui s'ueé tsí'e nga tsja kamána, ngat'a nts'ie je k'ien katsaki, t̄anga ngot'e je ja'ályáá, kichajá katsaki, t̄anga je kasakona."

Bí ts'én ijñá chiboa Kjisoo kjoaa énkjiín moso xi majín 'niátakón

16 Kjisoo bi katsóó xta tsí'e:

—Ngo ndiya kis'ijñá ngo ndá chon xi kis'ieé ngo moso xi askoon ngayeje nii kojo xi kats'énxájo toon, kó kui ndá choon tsint'ie nga mosoo kats'énkjíén toon. ² Kó kui ndá choon tsíchjiaa kó bi katsóó: "¿Mí kjoa nga bi kjili ni xi ts'énnt'ie an kjoaa ji? Tí'ink'as'ínni xki kjoaa ngayeje ni kojo ton xi tjínna ngat'a je nguiti kamájín nga mosona kama ngase ji." ³ Kó s'e ndá mosoo bi ts'én kats'énkjó: "¿Mí xi sa'in an? Ngat'a nguiti tsjaxájínna ndiana, kamájínna tsi t'ananguí kokjan an, kó achichí soboána nga tonchjíe ku'u an. ⁴ Je be an mí ni xi sa'in an tsí'e nga nguije kongatjinguina ndiana kjoaa xá moso xi tjíts'en an, ngayeje xta skjíx'ana ngantjoa ndi'aq." ⁵ Kó tsíchjiaa ngayeje xta xi tjitjieén toon ndiaa, kó bi katsóó xi tjoón: "¿Kó tjín tjitjieén tsí'e ndiana?" ⁶ Bi katsó kui ndaa: "Úchan barri isti." S'e bi katsó mosoo: "Jí'ín chjábe xojon nínga kjit'a xkii, kó ichítie tsí t'ijñíi." ⁷ S'e bi katsóó kje'e xi tjitjieén nga: "Kó jí, ¿kó tjín tjitjieén?" S'e bi katsó kui ndaa: "Tie mi koxta to ndsokoan nño." Kó bi katsó mosoo: "Jí'ín chjábe xojon nínga kjit'a xkii, kó jin mi koxta t'ijñíi." ⁸ Nga kamábe kui nii ndá xi tsí'e xaá, achichí kats'éntsjajo kui moso xi ndajiín ngat'a ta nisién kjínkón kamá nga kats'en kui nii, ngat'a xta xi tjín kuí ngasondiee, maña ngase ts'énjo xta xkíjín t̄a boajiín xta xi chjíani ndi'ií.

⁹ Kó án bi xiánjnú'un jún: Ti'ankjenjnú kjoachon xi tjín kuí ngasondiee nga kosikojójnú xtaa, tsí'e nga kjín ngase amingo k'uiéjnú, kia kama nga kjue kui kjoachoon, Néná tsajjnú nguindie xi tikón ngatsjé nixtin.

¹⁰ Xta xi nda ma 'niátakón nga skoón ni xi chiboa, t̄i kama'niátakón nga skoón ni xi tsie, kó xta xi kixijín nga ni xi chiboa, t̄i boá t̄i ts'én ni xi tsiee kixijín kama. ¹¹ Ja tsi kjoachon xi kixijín kamá'niátakónjínjnú, ¿yá xí kama'niátakónjníu ni xi jakoxii? ¹² Kó tsi ni xi tsí'e kje'e xta kamá'niátakónjínjnú nga kamájín kichonjnú, ¿yá xí tsajjnú ni xi tsajún?

¹³ 'Nde ngojín moso xi jó ndia sa'ínseén, ngat'a ngo ch'o kámaa, kó xi ingoo tjó kámaa, kojo tsi ngo ndasen kámaa, kó xi ingoo ndasenjín kámaa. Kámajín mosoo Néná kojo mosoo kjoachoon kámajín.

¹⁴ Kó tsint'ié kui nii já fariseoo, kui xtä xi achichí tsja kamaá toon, kó tsajnókie Kjisoo. ¹⁵ Kó Kjisoo bï katsoó kui jaá:

—Jún nguindyikón xtaa kixi majnú yojognú, tanga Néná be kó kji'i inimajnú, ngat'a ni xi achichí je maá xtaa, tanga Néná ni xi ta nisién 'niú ch'o kji'i maq kui.

Bí ts'én akóyá Kjisoo kjoaq kjoakitií kojo nínga botixómá Néná

¹⁶ 'Kjoakitií kojo ni xi kats'én'indó já chjini'eén Néná jet'a ni ngaskande nga kis'ijña Jua Bautista, kó ndeskande koó kji'a tji'bínjimi éntjátsiee nínga botixómá Néná, kó ngayeje xtaa xi ts'én ngo kjoa'niu ts'ié nga k'os'ien kui nguindiee.

¹⁷ Tanga nde chií ni'línjín tsi kjuie ndi'ak'ajmij kojo t'ananguii, ta boajiín nga xchajat'a chií ni xi kji'ta xojon kjoakitií Néná.

Bí ts'én akóyá Kjisoo kjoaq xta xi je ixán kó 'bíndo xkjín

(Matiq 19:1-12; Marko 10:1-12)

¹⁸ Ta'yaní xi kui'líjñá chjoón, kó tsi kje'e chjoón kuixanjo, tjíts'ent'arií kjoa chjoón, kó xi kuixanjo chjoón xi je ik'líjñáa, ti tjíts'ent'arií kjoa chjoón.

Bí ts'én ijñá chibqo Kjisoo kjoaq nda choon kojo Laá

¹⁹ 'Ngo nda choon kis'ijña xi achichí tsjakon njño tsajá, kó ndyiojón ndyiojón kats'én s'ué nga katsjá ni chinie xi chjí. ²⁰ Ngantjoa ndi'aq kui nda choon kis'ijña ngo nda nimá xi ts'iá chjíe xi 'mí Laá xi tsajaá ndo,

²¹ kó achichí bojó kamaá kui ndaa kó kamámején maá iskjinie ni xi ixónguií yamíxaá nda choon, kó ngaskande nñaa katomájón má ndoo Laá.

²² Tichaqan jachó nixtin nga k'ien Laá, kó ndítsjee Néná kijijo nínga tikón nguindie ndikoón Abraam, kó ti k'ien nda choon, kó akjanijín kuí. ²³ Kó nda choon ndoboank'ieen kini'lánkjí, kó achichí kjoanímá kini'lánkj'a'a kiaa, s'e tichaqan kamábe nínga tikón Abraam kó Laá kia tikont'aa. ²⁴ Kó s'e nda choon tsichjiaa Abraam nga bi katsoó: "Na'mi Abraam, ngatama nimaa an, kó nanguíye ji Laá ts'ié nga kui'língandá ndójoa tokotsja kó s'e ngats'enk'andyi naijen án, ngat'a achichí kjoanímá ts'énfoa'atio an nguijin kui ndi'ií." ²⁵ Tanga Abraam bi katsoó: "Ji ndi', ngatja'átsjeeen nga kji'a nga kixindiyin ji ngasondie achichí ni katse'eé, kó Laá achichí ni xi ndajín xi katse'eé kui, tanga ngo'e ne Laá achichí tjínl'ándajoon k'íee, kó jí achichí tsie kjoanímá titbitjatí. ²⁶ Kó kjoaq ngayeje kui nii, ngo tixa nangá tikón kó achichí kjin tindyonña xingui, kó majín tsi ngo xi k'ie koeje ni jánján, kojo tsi ngo xi jánján kjindibáni nga kjindibá k'íee." ²⁷ S'e bi katsó kui nda choon: "Niú mí'aá na'mi', ts'ié nga konanguíye ji Laá ndi'aq na'mina,

²⁸ ngat'a ún má nts'ié án xí kotsoyaq ts'ié nga ti k'iejin kjindibá k'íee kui

nguindie nínga tsie kjoanímá bitjatioó.”²⁹ S'e Abraam bi katsoó: “Je tikoón kjoakitií Moiseé kojo ni xi kats'én'indó já chjinie'eén Néná, ¡Ngatint'ié'én kuí jaá!”³⁰ S'e bi katsó nguiní kui nda choon: “Jmí na'lmi Abraam, tanga tsi ngo xi je k'ien koejekoon kui jaá, sa'ínk'oyá yojoó kjoaa ni xi ndajín kji'i xi ndyits'en.”³¹ Tanga bi katsó Abraam: “Tsi nt'iéjiín kjoakiti xi kats'énda Moiseé kojo ni xi kats'én'indó já chjinie'eén Néná, tì boá tì ts'én nde s'ijinjiín nga ngo xtá xi je k'ien xi kjoá'á'yaá.”

Bi ts'én akóyá Kjisoo kjoaa xtá xi tangat'anii kui nga ts'én já xtá xi ngasee

(Matig 18:6-7, 21-22; Marko 9:42)

17

S'e Kjisoo bi katsoó nga tsichjiajo xtá tsí'e:

—Achichí ni'in kji'i nga jmíjín xi stinguí kjoaa nga ngo já sa'ín, jtanga níma xó xi sa'ín ngo ni tsí'e nga kje'e xí sa'ínjé!² Tásá ngo ndijoo molino ngatít'a kjásén, s'e ngat'ajmijin yojoo nguijin ndachíkoón, ta boajiín tsi ngo ni sa'ín tsí'e nga ngo kui já kjindií sa'ínjé.³ Kuí ni nga, ¡Chónjnú ngayeje ni xi sílánjnú!

Tsi ngo nts'ie sa'ín ngo já, ti'inxchínje, kó tsi sa'ínk'oyá yojoo nga nguiti boajín sa'ín, ti'inetakíin.⁴ Tsi yito ndiya sa'ínjé kondrá tse nga ngo nixtiín, kó tsi yito ndiya bi katsoó: “Sa'ínk'oyá an yojona, ti'inetakín ní”, ti'inetakíin.

Bi ts'én akóyá Kjisoo kjoa kjoas'ijiín

⁵Kó já apostroo bi katsoó:

—Ndia!, tasíkejnejé tsí'e nga 'niú ngase s'ijinjne.

⁶S'e Kjisoo bi katsó:

—Tsi s'ijin chijinú xikó maá ngo xojmaá mostasa, kama bi k'uínjnú kui yá sikómoroó: “Ngatjoniyá ji, kó nguijin ndachíkoón ngamatatjie ji”, kó kuint'ié'én kui yaá.

Bi ts'én ijná chiboa Kjisoo kjoaa moso xi ts'enkjátjosón xaá

⁷?Yá ni jún xi tsi ngo moso tikónjnú kó nguije kijíts'énxá nguijin jnoo kojo tsi cho askoón, nguije kjindibá, bi k'uínjnú: “Titjé, kó tñdyint'e ji yamíxaq”?⁸ A mí tsí tásá bi k'uínjnú: “Ti'inde ní ni chinie, kó t'inde yojoo kó ti'insenní nga t'íyéní ni xi skjínie an kojo ni xi k'uí an, kó nguije kamána kama xini ji kojo s'i ji”?⁹ A koe'éjnú ndok'óchji kui mosoo kjoaa nga je kats'én ni xi ki'mífi? Jmí rä xián án.¹⁰ Tí boá tì ts'én jún, nguije kini'ánjnú ngayeje ni xi ki'míjnú, kama bi k'uínjnú: “Moso xi nde jmí ni chjíjiín ná, ngat'a tā kuí tsi ni xi tsoboáná xi kini'án.”

Bi ts'én kats'éndaya Kjisoo tie já xí tjiín chi'in xi ts'enkjátsón tjixin yojoná

¹¹Kó kji'a nga kijí Kjisoo naxindá Jerusalen kó nga ja'a xtien nangui Samaria kojo nangui Galilea.¹² Kó nga ts'as'ien ngo ndi nangui, jachókoón

tie já xí tjiín chi'in xi ts'enkjátsón tjixín yojoná, kó tā kjin kasasien, ¹³kó 'niú askandáya nga bī katsó:

—Kjiso', Mostro', ngatama nimaq̄a jin!

¹⁴Nga kamábe Kjisoo kui jaá, bī katsoó:

—Tanguínjnú kó takojnū yojojnú chiná'mij.

Kó tjienga ndyífi nguiya ndiyaá kamátsjie nga katjo'óxiín chi'iin. ¹⁵Kó s'e ngo kui jaá, nga kamábe nga je kamándaya, kijí'oyá nguini nínga tikón Kjisoo, kó askandáya má nga katsjaá kjoaje Néná, ¹⁶kó nga jachókoón Kjisoo, aşıén tikoón, ngaskande nga jachót'aq kjen t'ananguij̄ nga katsjaá ndok'óchji, kui ndaa kia chjiani nangui Samaria. ¹⁷S'e Kjisoo bī katsoó kui ndaa:

—¿A tiejín majnú xi kamátsjieón chi'injnú? ¿Kó xi ngui nijaan ñá síndo?

¹⁸¿A jmíjín ngase xi kjindibátsjaá kjoaje Néná, a ta kuí tsi nda xi chjiani nangui Samaria?

¹⁹Kó Kjisoo bī katsoó kui ndaa:

—Tisítjin, kó t'en'ne, kjoas'ijiin xi je ts'axié'aá.

Bī ts'en katsáya Kjisoo kjoaa nixtin nga kotíxoma Néná

(Matio 24:23-28, 36-41)

²⁰Já fariseoo asíyaá Kjisoo kjoaa kji'a ní nga kjindibá nixtin nga kotíxoma Néná, kó Kjisoo bī katsoó:

—Jmí tsi tsijen kama kji'a nga kotíxoma Néná, ²¹jmíjín xi bī katso: “K'ie tikón”, kojo tsi “jánján tikón”, ngat'a Néná je ts'enbotixómá nguijinjnú.

²²Kó s'e bī katsoó xta ts'e:

—Kjochó ngo nixtin nga kāmamejénjnú nga nde tā ngo nixtin xchajnú ndií nda xi'iin, kó xchajínjnú. ²³Kó tjín xi bī katsojnú: “¡K'ie tikón!” kojo tsi “jánján tikón!”, tanga ngata monguinjínjnú, tī nde ngata monguintjinguijínjnú. ²⁴Ngat'a xikó maá nga foa'at'e nga 'nā ma ndeskande ngo ngande ngaskande xi ingo ngandee ndi'ak'ajmij, bōa má kama nixtin nga kjo'e ndií nda xi'iin. ²⁵Tanga tjón ma ra achichí kjoanima kjoal'atio, kó ngayeje xta xi'bī xi sa'inch'o. ²⁶Kó xikó kamá nixtin nga kis'ijña Noee, bōa má kama nixtin nga kjo'e ndií nda xi'iin. ²⁷Iskjinie, kats'e, ixán, kojo kats'énkixan xkjín kui xtaa, ngaskande nga Noee ts'as'ien nguiya tjotso jee, s'e kjindibá stsé'niuú kó kats'énkjié ngayeje xtaa. ²⁸Tí bōa tī kama xikó kamá nga kis'ijña Lot, iskjinie, kats'e, ts'atsie, atíñá, ítjje kojo kats'énda ndi'a, ²⁹tanga nixtin nga jatjo Lot naxindá Sodoma, kji'a ixó ni ndií kojo asufre ndi'ak'ajmij, kó kats'énkjié ngayeje xtaa. ³⁰Bōa má kama nga kokó yojoo ndií nda xi'iin.

³¹'Kui nixtin jan, xi tikón nk'aq ndi'aq, kó s'e nii nguiya ndi'aq ndyia, ngata fotjajénjn ts'e nga skibe, kó xi nguijin jnoo tso'bá, ngata fí'oyájín.

³²Ngat'a átsjienjnú ni xi kamaá chjoón Lot. ³³Ngat'a ngayeje xi mejeén k'oxié'a kjoamindyioon, sa'inchaja, kó ngayeje xi sa'inchaja, kjojtjo'a.

³⁴’Xiyájnú'un jún nga kui nixtjeen tsi jó xta xi kjiyojo ngo ngasón nchán, ngo chjábe, s'e ngo k'uijná. ³⁵Tsi jó ínchjín xi nijan k'ó, ngo chjábe, s'e ngo k'uijná. ³⁶Tsi jó já ndyits'énxá nguijin jnoo, ngo konguínjo, kó ngo k'uijná.

³⁷Kó bí katsó xtaq Kjisoo:

—¿Ná ní nga boa kama Ndia?

S'e Kjisoo bí katsó:

—Nínga tikón yojo k'ieen, kia kamatikó ríkieé.

**Bí ts'én íjñá chiboa Kjisoo kjoaa énkjiín xtachjoón k'án
xi je k'ien xi'ljin kojo Ne ndi'amasién xi kixijiín**

18 Kjisoo ínijmií kui énkjiín xtaa, kjoaa nga chjen nga kuichjia Néná ngatsjé nixtin, kó nga koyayajín, ²bí katsoó:

—Ngo naxindá kis'ijña ngo ne ndi'amasién xi katsakjonjín Néná, kó kamábendikónjín xtaa. ³Kó ngo xtachjoón k'án xi je k'ien xi'ljin kis'ijña ti kui naxindaá, kui xtachjoón ngotjón ngotjón kijkoón kui ne ndi'amasiéen nga bí katsoó: “Kixi tilinsenní kjoaa ni xi tjínna an kojo kondrana.” ⁴Kó kjín nixtin nga kamámejénjín kui ne ndi'amasiéen nga kats'énseén, tanga ticháqan bí ts'én yíjin kon: “Nda tsi tsakjonjín an Néná, kó ti bendikónjín an xtaa, ⁵tanga, kui xtachjoón tjíts'enxtína, tasá kixi sa'inseen, ngat'a tsi ngotjón ngotjón kjindibákonna, ticháqan sa'ínxtdindana.”

⁶Kó bí katsó Ndia:

—Nda'yájnú ni xi katsó ne ndi'amasiéen xi kixijiín. ⁷¿Kó Néná a kixijín sa'inseen xta xi je ja'ájin, xi nga jñó kojo nga nixtjién ndyichjia? ¿A sa'ínk'andiyarií nga kosíkojo kui xtaa? ⁸Xiyájnú'un nga Néná tsá kojo kixi ts'én sa'ínxseén xtaa. Tanga nga kjoe'e ndíí nda xi'ljin k'ie t'ananguii, ¿a sakórií kjoas'ijin k'ie t'ananguii?

**Bí ts'én íjñá chiboa Kjisoo kjoaa énkjiín nda fariseoo
kojo nda xi foa'ächjí ton machjítjé nii**

⁹Ngo ndiya, Kjisoo tsíchjiajo kui énkjiín xta xi, xi ti kui s'ijin yojoo nga xta kixi kó nga ts'ench'ó xta xi ngasee, kó bí katsó nga tsíchjiajo kui énkjiín:

¹⁰—Jó já kijí nangoxii nga tsíchjiaq Néná, ngo xi nda fariseo kó ngo xi nda xi foa'á'yá ton xi machjítjé ni. ¹¹Nda xi fariseoo, kasasien kixi, kó bí katsó nga tsíchjiaq Néná: “Nam!, tsjaa ndok'óchji ngat'a an jmí tsi boa kon an xikoó xta xi ngasee nga chejé, nga kixijín, nga ndyits'ent'aq kjoa xkjin, tinde boajín kon an xikoó kui nda xi foa'á'yá ton xi machjítjé nii, ¹²jó ndiya ts'enkj'a'a an kjindiá yojona nga ngo xomanq, kó tsja an chje ngo tíkjá ton xi ts'en an.” ¹³Tanga nda xi foa'á'yá ton xi machjítjé nii, kjin kis'ijña, nde kamámejénjín askotsijen ndi'ak'ajmi jan, kó taa soboá tjin ye'eé niseen nga bi katsoó Néná: “Nam!, ngatama nimaa an, ngat'a xtajé án.” ¹⁴Xiyájnú'un nga kji'a nga jachó ndi'aq kui nda xi foa'á'yá ton xi machjítjé nii je kixi tikón nguindykon Néná taa boajiín nda xi ingoo, ngat'a

ngayeje xta xi nk'a k'oxié yojoo, nimá si'anjo, kó xi nimá síndo, kuí xí nk'a ko'naxié.

Kjisoo bi ts'én kats'énchikonné jakjíndí xixii

(*Matiq 19:13-15; Marko 10:13-16*)

¹⁵ Jachóchinií Kjisoo jakjíndí xixi, tsi'e nga sa'línjo, tanga xta tsi'e kats'énchánjo xta xi jachójo kui já kjindií. ¹⁶ Tanga Kjisoo tsíchjiaa xtaa kó bi katsoó:

—Te'léndiéjnú kui já kjindií nga kjoe'ekónna, kó ngata 'bíchajínjú, ngat'a nínga botíxomaq Néná kuí xí kama k'os'ien xi xikoó kui já kjindií. ¹⁷ Jakoxi ni xi xiánjnú'un, nga xi k'os'ienjín nínga botixómá Néná xikoó ngo jakjíndí, kamájín k'os'ien.

Bi ts'én tsíchjiajo Kjisoo ngo nda chon xongo

(*Matiq 19:16-30; Marko 10:17-31*)

¹⁸ Kó ngo nda nguitokoo bi katsó nga asíyaá Kjisoo:

—Mostro nda!, ¿mí ni xi sa'in an tsi'e nga sakóna kjoamindyion ngatsjé nixtiin?

¹⁹ Kó Kjisoo bi katsoó:

—¿Mí kjoa nga nda sé ní? Ta'yajín xi nda, ta ngototo Néná. ²⁰ Je yé ji kjoabotíxomaq Néná xi bi tsoó: "Kamájín si'int'ee kjoa chjoón, kamájín si'ink'in ji xta, kamájín si'inchejé, kamájín k'uindíséta'in ji ngo xta, chendikín jí na'mil kojo naaa."

²¹ S'e bi katsó kui ndaq:

—Ngayeje kui nij je kats'énkijatjosón an ndeskande koó nga ndachí an.

²² Nga tsint'ié Kjisoo kui nij, bi katsó:

—Ingo ni chajaq: tatíní ngayeje ni xi tjiín, kó toon kui nij xta nimaa te'ee, kó boqa ts'én nga k'uié ngo kjoachon ndi'ak'ajmi jan, s'e ndibétjinguini nguijee.

²³ Kó s'e kui ndaa nga tsint'ié kui nij, achichí ndasen kamaá, ngat'a achichí chon kamá. ²⁴ Nga kamábe Kjisoo nga ndasen kis'ijña kui ndaq, bi katsó:

—Achichí ni'in kji'i nga xta xi tsie kjoachon tjiín nga k'os'ien nínga botíxomaq Néná! ²⁵ Ngat'a tasá ni'ínjín kji'i nga ngo cho to'oyits'en kjoa'aya ngo tixaqa ngo ndo, ta boqajiín nga ngo nda chon k'os'ien nínga botíxomaq Néná.

²⁶ Kó xta xi tsint'ié kui nij bi katsó:

—Ja, ¿yání xi kjoto'a tsoboq?

²⁷ S'e Kjisoo bi katsó:

—Ni xi kamájín sa'lín ngo xta, kamarií Néná.

²⁸ Kó s'e bi katsó Peé:

—Ja je yé, nga jin ngayeje ni xi tjínjne ik'íjñámasienjne, kó k'ie tima tjinguijne.

²⁹Kó s'e Kjisoo bi katsó:

—Jákoxi ni xi xiánjnú'un nga jmíjín ngo xtā xi íjñá ndi'aq, xi xchaá, nts'ie, chjoón kojo ndií, tangat'anii ningá botixómá Néná, ³⁰xi sakójín tsie ngase ni kui ngasondie xi'bí kó ngasondie xi s'e ndibaá sakoo kjoamindyion ngatsjé nixtiín.

Kjisoo bi ts'en katsáya nguiní xi ma jaán ndiya nga koya

(*Matiq 20:17-19; Marko 10:32-34*)

³¹S'e Kjisoo tsichjajot'axín já xí tiejoó, kó bi katoó:

—Tsitsíjenjní nga k'ie ndyimonguíñijíngui xtijen naxindá Jerusalen, kó kjotjosón ngayeje ni xi kats'en'indó já chjinie'eén Néná kjoaq ndií nda xi'iin. ³²Ngat'a si'anck'as'ien nguiya tsja xtā xi judijoín, kó kojnocha, ch'o k'uiín kojo kotítiajón. ³³Kó nguije kjoaá, si'anck'ien, tanga xi ma ján nixtin kjoa'á'yaá.

³⁴Kó kui jaá nde chií kamákjínjiín kui nii, kó kui eén akja'maq, kó kamákjínjiín ni xi ki'mií.

Bi ts'en kats'endaya Kjisoo ngo nda tika

(*Matiq 20:29-34; Marko 10:46-52*)

³⁵Nguije makjachó má Kjisoo naxindá Jeriko, ngo nda tika tikondo t'a ndiyyáá nga ts'en mí'á tonchjíe. ³⁶Kó nga tsint'ie nga xtā kjiín xi ndyifoal'a, asíya mí ni xi kjima. ³⁷Kó kí'míyaá nga Kjisoo xi chjiani naxindá Nasaret xi kjoa'a. ³⁸Kó s'e nda tikaq bi katsó nga askandáya:

—Kjisoo, ji xi xtā tjíee Ndabij, ngatama nimaa an!

³⁹Kó xtā xi tjimátjoón Kjisoo kats'enxchánjo tsí'e nga nguijí skandáyajín, tanga kui nda tikaq tásá má 'niú askandáya ngase nga bi katsó nguiní:

—Xta tjíee Ndabi!, ngatama nimaa an!

⁴⁰Kó s'e Kjisoo kasasien kó tsí'a tsí'e nga kjochóchinií nda tikaq, kó nguije jachó, bi katoó Kjisoo:

⁴¹—¿Mí ni xi mejeén nga sa'iin?

Kó nda tikaq bi katsó:

—Ndia!, mejénna nga kámatsijenna.

⁴²Kó Kjisoo bi katoó:

—Ngatama tsijeen ji, kjoas'ijiin xí je ts'axié'aá.

⁴³Tí kji'a kamátsijen nguiinií nda tikaq, kó kijítjinguií nga katsjaá kjoaje Néná, kó ngayeje xtā naxindá xí kamábe kui nii kats'entsjajo Néná.

Bi ts'en ts'as'ien Kjisoo ndi'aa nda xi 'mí Sakeeo

19 Kjisoo jachó naxindá Jeriko kó nga ja'ajin kui naxindaá. ²Kó kia kis'ijña ngo nda chon xi 'mí Sakeo, kó nguitokoo já xí foal'á'yá ton xi machjítjé ni kamá, ³kó Sakeoo kamámejeén kamábe 'yání xi Kjisoo, tanga kamájiín ngat'a achichí xtā tjín, kó kato kamá kui ndaa. ⁴Kó tsangá

má kijítjón nínga kjoa'a Kjisoo, s'e kijíkijin ngo yá sikómoro tsil'e nga skuié.

⁵ Nga ja'a Kjisoo kui nguindiee, askotsijen nk'a jan, kó bi katsoó kui ndaa:

—Sakeo!, tsá titjajen, ngat'a chijien nga ndil'áa kjojña an ngot'e.

—Kó achichí tsá jatjajen, kó achichí tsja kamaá nga Kjisoo kis'iñña ndi'aa.

⁷ Kó nga kamábe, ngayeje xtaa, bi katsoó xkjín: ndi'aq ngo nda je k'uijñá.

⁸ Kó s'e Sakeo kasasien kixi, kó bi katsoó Ndiaa:

—Ngo't'e'ne Ndia!, masien ni xi tjínna tsjaa ngayeje xta nimaa, kó tsi tjín xi kats'enchejée, nijún boq kji'i tsja'oyáa.

⁹ S'e Kjisoo bi katsó:

—Ngo't'e je jatjo'a xtaa kui ndi'aa, ngat'a ti xta tjié Abraam xi'bi.

¹⁰ Ngat'a ndií nda xi'iin je'ek'axié'á xtä xi je ndiya kichajá tjemá.

Bí ts'én ijñá chiboa Kjisoo kjoaq énkjiín toon

(Matig 25:14-30)

¹¹ Nguije tsint'ié kui eén xtaa, Kjisoo katsáya kui énkjiín, ngat'a je tikón tiña naxindá Jerusalen, kó kui jaá kats'énkjó nga Néná je kotíxoma chán chán. ¹² S'e Kjisoo bi katsó:

—Ngo ndií nda chon kijí ngo naxindá xi achichí kjin tsil'e nga kia koe'eé ngo nguindie nínga botíxoma s'e kjoe'e'oyá nguiní. ¹³ Kó nguije tsichjiaa tie mosoo, katsjaa ton, kó bi katsoó: “Tí'anxájojnú kui toon, ngaskande nga kjoé'e an.” ¹⁴ Tanga xtä xi chijiani kui naxindaá ch'o kamaá kui ndaa, kó katsanguiyaq xtaxchá tsil'e nga bi katsoo: “Mejénjínjné nga kui ndaa kotíxomajne.” ¹⁵ Kó nguije je'e nguiní kui ndaa nguije re kamá, katsanguiyakja'á kuí já moso xi katsjaa ton, tsil'e nga kotsoyaq kóts'en kats'énxájo toon. ¹⁶ Jachó nda xi tjoón kó bi katsoó: “Ndia! ton xi katse'éní kats'énxájo an kó tie boq kji'i askjasón.” ¹⁷ Kó bi katsó nda ree: “Nda kini'ín, moso nda, kjoaq nga chiboa ton xi kamá'niátakón ji nga kichiin, tie naxindá kotíxomee.” ¹⁸ Jachó xi ingo mosoo, kó bi katsó: “Ndia! ton xi katse'éní ún boq kji'i askjasón.” ¹⁹ Kó ti bi ti katsoó kui ndaa: “Ji ti ún naxindá kotíxomee.” ²⁰ Kó jachókoón xi ingoo, kó bi katsoó: “Ndia! k'ie tikón toon, ngo poño ixtie án kó ja'atjó an, ²¹ ngat'a katsakjonñaa ji, ngat'a be án nga nda xi ta nisién tajá jí, ngat'a chjábe jí ni xi jmí tsi ji ik'ijní, kó ch'ijin jí ni xi ijín ik'ítjje.” ²² Kó s'e bi katsó kui nda ree: “Moso xi ndajín ji, ti kuii ndso'boe xi kotijénaá. Ja boq je yé nga tajá án, nga kjibe án ni xi ijnajín an, kojo nga 'bojen an ni xi itiejín an, ²³ kó s'e, ja kó mí kjoa nga bankojín ik'ijní tonna, tsil'e nga kji'a nga kjoé'e nguiñá an kjoa'achjí án ndyikon?” ²⁴ Kó kui nda ree bi katsoó xtä xi síndo kiaa: “Chje'éxínjnúu toon kui ndaa, kó xi je tie kamá tsil'e kui te'éjníu.” ²⁵ S'e bi katsó kui jaá: “Ndia! tanga kui ndaa je tie boq kji'i ma tsil'e.” ²⁶ Tanga bi katsó nda ree: “An xi yájní'un nga ngayeje xi tjiín, koe'eé, tanga xi jmíjní, ngaskande ni xi tjiín xi chje'éxiín. ²⁷ Tanga xta kondrana xi kamámejénjiín nga ree kama an, ndibájojnú'un k'iee kó nguindyikón án tichásenjnú nga si'ank'iénjnú.”

Bí ts'én ts'as'ien Kjisoo naxindá Jerusalen

(*Matiq 21:1-11; Marko 11:1-11; Jua 12:12-19*)

²⁸Kó nguije tsíchjia kui nii, Kjisoo kijítjoón xtaa naxindá Jerusalen. ²⁹Kó nguije makjachó má ngo nangui xi 'mí Betfajé kojo Betanía, t'a k'ijñá nínga tjín yá oliboo, katsanguiya jó xta tsí'e, ³⁰xi bí katsoó:

—Tanguínjnú kui ndi nangui xi tikón kjeen, kó nguije kuitjás'ienjnú kui nguindiee, kia sakojnú ngo ndi bórro xi nde kjie ngo xta xi 'bíjñasoon, chjándojuń kó ndibájojnú'un k'iee. ³¹Kó tsi tjín xí bí katsojnú nga kosiyajnú: ¿Ánní nga ndyichjándojuń? bí tlínjnú jún: Kjoaa nga Ndíaa xí chjieén.

³²S'e kijí kui jaá kó kasakoó bórroó xikó ki'mií. ³³Kó nguije ndyikjíndó bórroó, ndíaa choo bí katsoó:

—¿Ánní nga ndyichjándojuń bórroó?

³⁴Kó s'e bí katsó kui jaá:

—Kjoaa nga Ndíaa xí chjieén.

³⁵Kó tsanguínjoo Kjisoo, kó nguije ísoón njñoo bórroó, kini'ánk'íjñasón Kjisoo. ³⁶Tjienga ndyifí, ngayeje xtaa yítie njñoo nguiya ndiyaá. ³⁷Kó nguije makjachó tiña xtjien nga fíjaya nínga tikón k'ijñá nínga tjín yá oliboo, ngayeje xta tsí'e Kjisoo tsja kamaá kó íts'iyanii nga kats'éntsajó Néná kjoaa ngayeje kjoandikón xí je kamábe, ³⁸bí katsó nga askandáya:

—¡Ngatama chikonñé nda re xi kjindibáni ngajoo Ndíaná, xió ngatja'bé ndi'ak'ajmii, kó ngat'ieé kjoaje Néná nk'a jan!

³⁹Kó nguijiin xta tsí'e kis'intsoja já fariseo xi bí katsoó Kjisoo:

—Mostro', tlínchínje xtaa ánní nga boá ndyitsó.

⁴⁰Kó Kjisoo bí katsoó kui xtaa:

—Bí xiánjnú'un jún tsi xió k'uindo kui xtaa, ndíoo xí skandáya.

⁴¹Kó nguije makjachó tiña naxindá Jerusalen, nga askotsijen Kjisoo, askandá kjoaa kui naxindaá, ⁴²kó bí katsó:

—¡Tsi yera ni nda tsi ta kuí tsí nixtiń ni xi kjoaxióo!, tanga ngot'e tji'márií ndyikin kui nii. ⁴³Ngat'a, s'e ndibaá nixtin xi ndajín, kji'a nga kondraa skinínk'a nga ngo foa'atijiyoón ngo xó xí kui'ichjá'yaá, kó ngayeje nguindie nga skjánjoo, ⁴⁴kó k'oymii ji kojo ndíi nguiyaá xó xí tjichjá'yáni ji, kó nde ngojín ndijo kui'índo xi s'indosoón xkjín, ngat'a kamáyejín ji nixtin nga je'ekoón Néná.

Bí ts'én ts'axié Kjisoo já xí ndyibotiňá cho nditseen nangoxii

(*Matiq 21:12-17; Marko 11:15-19; Jua 2:13-22*)

⁴⁵Kó nga ts'as'ien Kjisoo nangoxii, íts'iyanii nga tsanga tjinguii ngayeje xta xi ndyibotiňá kojo xi ndyibotsie ni, ⁴⁶kó bí katsoó:

—Je kjit'a xojoón nga bí tsó: “Ndíana, ndí'a nínga kondókjoaa Néná boá, tanga jún ndoboaa chejé je kini'ánjnú.”

⁴⁷Kó ndyiojón ndyiojón akóyá Kjisoo kia nangoxii, tanga já nguitokoo chiná'mii, já chjiniekjoakitii kojo já nguitokoo naxindaá kamájeén

kats'énk'ién. ⁴⁸Kó kasakondiéjiín kóts'en sa'ínk'ién, ngat'a ngayeje xta naxindaá tsint'ié ndá ndaá ni xi tsíchjia.

Bí kamá nga já xaá asíyaá Kjisoo 'yá xí katsjáxaá

(*Matiq 21:23-27; Marko 11:27-33*)

20 Kó ngo ndiya nga Kjisoo akóyá kojo ínijmií éntjátsiee Néná xta naxindaá nguiya nangoxii, jachókóntiñaá já nguitokoo chiná'mii, já chjiniekjоqkitii, kojo xta xi xchaá, ²kó bí katsoó nga tsíchjiajo:

—T'íyéjnē, ¿mí xá xí tjiín nga kui nii ni'lín, axa, 'yá xí katsjaá kui xaá?

³S'e Kjisoo bí katsoó:

—Tí boaq tì ts'én kosíyajnú'un kó t'íyajnú'un: ⁴¿'Yá xí katsanguiya Jua Bautistaä nga atíndá? ¿A Néná axa xtaa?

⁵Kó s'e kui jaá íts'iyaniíi nga bí katsoó xkjín:

—Tsi Néná xí katsanguiya tsi k'uín, kó: "Ánní nga kis'ijinjínjnú", katsoná.

⁶Kó tsi xtaa xí katsanguiya tsi k'uín, ngayeje xtaa ndijo k'oyaná, ngat'a ngayejeé nga s'iijiíi nga Jua Bautistaä xi nda chjinie'eén Néná.

⁷Kó bí katsó kui jaá:

—Yajínjnē 'yá xi katsanguiya.

⁸Kó s'e Kjisoo bí katsó:

—Ja tí xiyájínjnú'un mí xá xi tjínna nga ts'en an kui nii.

Bí ts'én ijñá chiboa Kjisoo kjoaa énkjiín moso xi ndajiín

(*Matiq 21:33-44; Marko 12:1-11*)

⁹Kó s'e Kjisoo íts'iyaniíi nga katsáyaá kui xta naxindaá kui énkjín xi bí tsoó:

—Ngo nda ijñanda ngo jno nínga maxchá tostsije, kó katsjá chjinánguií já xí ts'én xá jno, s'e kjin kijí nga tsie ts'andíyaá. ¹⁰Kó nga jachó nixtiin nga kamáxchaá kui too, katsanguiya mosoo kui ndaa nínga síndo já xí katsja chjinánguií jno tostsijeé, tsí'e nga kokjángá kó tsjaá to xi tsoboáa nda xi tsí'e kui nguindiee, tænga kui jaá xi ts'enxájin nguijin jnoo kats'énkijen'on kui mosoo, kó jmí ni íyatsjajín. ¹¹Kó katsanguiya nguinií ingo moso, tænga tí ik'ié nguinií, ch'o ki'l'mií, kó tí jmí ni ik'íyatsjajín nguinií. ¹²Kó tí katsanguiya nguinií xi ma jáñ mosoo, kó kui jaá tí kats'én'oón nguinií, s'e ts'axié kui nguindiee.

¹³Kó s'e bí katsó ndia xi tsí'e kui nguindiee: "¿Mí xí sa'in an? Tásá ndi tjóna sanguiya an, tsi ta'a nga skuié kui, skuiéndikón." ¹⁴Tænga nga kamábe já xí ts'enxá nguijin jnoo, bí katsoó xkjín: "Kuí xi'bí xi tsí'e kama ngayeje kui nguindiee, tasá s'lank'ién, kia kamaaá nga tsaná kama ngayeje kui nii."

¹⁵Kó kats'énk'ién ndií ndia xi tsí'e kui nguindiee, s'e ts'axié nínga tjitjie tostsijeé.

Kó s'e Kjisoo asíya:

—¿Kó mí xí sa'in ndia xi tsí'e kui jno tostsijeé? ¹⁶A kjindibá kó sa'ínkjié ngayeje já xí ts'enxájin nguijin jnoo, kó s'e kje'e xi tsjaá kui nguindiee.

Nga tsint'ié kui nii kui xtaaq, bi katsó:

—¡Néná xín ngats'énkja'aná kui nii!

¹⁷Kjisoo askotsijen ndá ndaá xtaaq, s'e bi katsó:

—¿Mí xi mejeén tsó ni xi bi tsó xi tjít'a xojoon:

Ndijo xi kats'ench'o já chjinieexoó,

kuí xí ndijo nga'niuuú ndi'aq kamá?

¹⁸Ngayeje xta xi k'okasón kui ndijoo kamaxi, kó tsi tjín xi k'okanieé kui ndijoo kama ndsokoan.

Bi ts'én akóyá Kjisoo kjoaa 'yá xí tjiín nga kui'ichjítjé ni

(*Matiq* 21:45-46; 22:15-22; *Marko* 12:12-17)

¹⁹Kó já chjiniekjoakitii kojo já nguitokoo chiná'mii, kamámejeén nga ti kui chiboa stsoboaa, ngat'a kamákjiín nga kui énkjiín, tangat'anii kui nga kandokjoa, tanga katsakjonní xta naxindaá. ²⁰Kó kananguiyachoón xta xi askondá xi tix'ian xta kixi sa'lín yojoo, tsil'e nga kuint'ie ngo én xí ndajín xi katsó, kó boq ts'lén sa'ínk'as'ien Kjisoo nguiya nga'niuuú kojo xaá nda xi xtitjoón kui nguindiee. ²¹Kó bi k'ilmií nga asíyaá:

—Mostro', je yajné nga kixi ni xi se kojo ni xi bokoyé ji, kojo nga jmí tsi skján ni'línje xtaa, nga tásá jakoxii ndiya xí tsil'e Néná xí tibokoyé ji. ²²¿A tsjandié kjoakitii, axa tsjandiejin nga k'uichjíjne ton xi machjítjé ni nda xtitjón xi 'mí Sesaa?

²³Tanga Kjisoo kamákjiín kjoamañaq kui jaá, s'e bi katsoo:

—Ánní nga an ndyichjat'ayákónjnú'un? ²⁴Takojnú'un ngo ton. ¿'Yá tsil'e kui asién kojo kui ja'éni xi kjit'a kui toon?

Kó bi katsó kui jaá:

—Tsil'e nda xtitjón xi 'mí Sesaa boá.

²⁵Kó s'e Kjisoo bi katsó:

—Ja te'éjní nda xtitjón xi 'mí Sesaa ni xi tsil'e nda xtitjoón, kó ni xi tsil'e Néná, Néná te'éjní.

²⁶Kó nde kamákjiín kui jaá nga tsint'ieé Kjisoo nga tsíchjia ngo én xí ndajín tsó nguindyikón xtaa, tásá achichí kijíndikoón kjoaa ni xi katsó, kó tásá xió kis'inđo.

Bi ts'én katsáya Kjisoo kjoaa xta xi foa'á'yá nguinií nguije fesón

(*Matiq* 22:23-33; *Marko* 12:18-27)

²⁷Kó s'e jachókóntiñaq já saduseoo xi tsó nga nguiti foa'á'yájín xoó xta xi je jesón, bi katsó nga asíyaá:

²⁸—Mostro', Moisee ít'aná ngo xojon, nga tsi ngo xó nts'ie koya xí tjiín chjoón kó tsi jmí ndijín xoó, nts'ie xó kuí ndaa chjen nga kui kuijanjo kui xtachjoón tsil'e nga xchajájín tjíee nts'ie xi k'ieen. ²⁹Ngo ndiya kis'inđo yito já xí ta ngo nts'ie kamá, nda xi tjoón kis'iee chjoón kó k'ien, kó jmí ndi kis'iejiín. ³⁰Kó nts'ie xi ma joó ixánjo kui xtachjoón, kó ti k'ien nguinií, kó ti jmí ndi kis'iejiín nga. ³¹Nda xi ma jaán ixánjo nguinií kui xtachjoón, kó boq

ts'én boa kamaá nga yitoo, kó jesón kó nde ngojín xi kis'iee ndi. ³²Nga fet'a k'iен kui xtachjoón. ³³Nguije kjoa'l'yaá ngayeje xtaaq, ja, ¿yání nga yito kui jaá xi xil'in kui xtachjoón kama, ngat'a ngayeje nga kis'indojo?

³⁴Kó s'e Kjisoo bí katsó:

—Xta xi tjín kuí nixtin xil'bí bixan kó ts'enkixán xkjín, ³⁵tanga xta xi sakoó nga k'uíndo kui ngasondie xil'bá, kó nga kjoa'l'yaá xta xi je jesóón, tí nde nguiti kuixanjín tí nde nguiti sa'ínkixanjín xkjín, ³⁶ngat'a nguiti kamájiín koya, ngat'a xikónií ndítsjee Néná káma, kó ndíi Néná boá, ngat'a kjoa'l'yaá nguinií. ³⁷Tanga kjoa ngaá tsi foa'l'yaá nguinií xta xi je jesón, ngaskande Moisee akóyá nga katsáya énkjín yá sarsaa, nga bí tsóo Ndianá, Nee Abraám, Nee Isaá kojo Nee Jakob. ³⁸Ngat'a Néná jmí tsi Nee xta xi je jesón, Nee xta xi síndo boá, ngat'a tangat'aníí Néná nga tindyión ngasondiee.

³⁹Tjín já chjiniekjoakitií xi bí katsó:

—Mostro! nda kase.

⁴⁰Kó nguiti ingojín xta xi asíya ngasee kje'e ni.

Bí ts'én akasíyaá Kjisoo kjoaa 'yání xi xta tjee Kristoo

(Matio 22:41-46; Marko 12:35-37)

⁴¹Kó s'e Kjisoo bí katsoó kui xtaaq:

—¿Kó ts'en nga xtaaq tsó nga Kristoo xta tjee Ndabii xó? ⁴²Ngat'a tí kuí ni Ndabii bí tsó nínga ít'a xojon Salmo:

Ndianá bí katsoó Ndiana:

“Tindyint'ení nga fojnína,

⁴³ngaskande nga kjoé'ejoog nguindie ndsáki kondraaq.”

⁴⁴Ndabii Ndiana katsoó. ¿Ja kóts'en nga Ndabii xta tjee ma Kristoo?

Kjisoo bí ts'én yínguítai'n já chjiniekjoakitií

(Matio 23:1-36; Marko 12:38-40; Rka 11:37-54)

⁴⁵Nga tsint'ieé ngayeje xta naxindaá, Kjisoo bí katsoó xta tsí'e:

⁴⁶—Chónjnú já chjiniekjoakitií, ngat'a achichí tsjamaa nga 'bít sama nga boajá njñondio tsjakon, kó ts'entjó nga níl'ántinde nínga síndo ndítsen, kó tsjamaa nga 'bíndonié yaxíríe xi tjón síndo nguiya ndi'a nínga ndokjoa eén Néná, kó tsjamaa nga kui tjón 'bíndo nguindie xi tjón síndooyamíxá nínga chinie nñño, ⁴⁷kó kuí jaá xi ts'enchéjeé ni xi tjiín ínchjín k'án xi je k'iен xi'l'in, kó achichí xó tsí Néná chjiaa 'ne jama, tsí'e nga skuiendikón xtaaq. Kui xta xil'bá xi tsie ngase kamajeé.

Bí ts'én akóyá Kjisoo kjoaa tonchjee

(Marko 12:41-44)

21 Kjisoo askotsijeen xta chon xi indiyá tonchjee nguiya koxa tonchjee. ²Kó tí kamábe ngo xtachjoón k'án xi je k'iен xil'in xi indiyá nguiya koxa tonchjee jó ndi tón xi chiboa chjií. ³Kó bí katsó:

—Jakoxí ni xi xiánjnú'un nga kui xtachjoón k'aán tsie ngase katsjá ta boajiín ngayeje xtā xi ngasee. ⁴ Ngat'a ngayeje xtā xi ngasee ton xi 'bonguií xí indyiá, tanga kui xtachjoón indyiá ngayeje ton xi skjinie kojo xi k'uí ní nga k'uijná ngasondie.

Bí ts'én katsáya Kjisoo kjoaaq nga kuixondo nangoxii

(Matig 24:1-2; Marko 13:1-2)

⁵ Kó tjín xtaq xi tsíchjia kjoaaq nangoxii nga achichí ndijo tsjakon tjiín kojo nga chjie xi katsjá xtaq xi kini'lanchon nii, tanga Kjisoo bí katsó:

⁶ —Kjooa ngayeje ni xi yajnú k'iee, kjochó nixtin nga kuixondo kó ngaskande nde ngo ndijo k'uíndosónjíin xkjín xi kjotsonjín.

Bí ts'én katsáya Kjisoo kjoaaq chiboa xi s'ijña nguindiee nga kjuie ngasondiee

(Matig 24:3-28; Marko 13:3-23)

⁷ Kó bí ki'mií Kjisoo:

—Mostro!, ¿kji'á ní nga kama kui nii? ¿Kó mí chiboa xi s'ijña nguije ma kama kui nii?

⁸ Kó s'e Kjisoo bí katsó:

—Tsitsíjenjní nga jmíjín xi k'onchajojnú, ngat'a achichí má xtā xi sa'ínkjién ja'éenna nga bí katso: "Án xí Kristoo", kó: "Je kjimatiña nixtiin", tanga nga kuijín xi monguintjinguijnú. ⁹ Kó kji'a nga kond'a'yájnú nga je kjima kjoaxchán, nguije tjibixkán, ngata ndakonjín majnú, ngat'a chjen nga tjón kui nii kama, tanga jmí tsi tsá kjuie ngasondiee.

¹⁰ Kó s'e bí katsó ngase:

—Naxindaá skjánjo xkjín kojo já ree skjánjo xkjín, ¹¹ kó k'uié kjoandíkon xi 'niú, kjín tokoya nguindiee k'uié kjindiá kojo chi'in, achichí ni xi kondákon k'uié kó a xixi yí'i chiboaq ndi'ak'ajmíi xi k'uié.

¹² Tanga nguindiee nga boá kama, tjón ma ra kuiyotjinguijnú kojo kondoboajnú, kó si'anek'as'iénjnú ndi'a nínga ndokjoa eén Néná kojo si'anek'as'iénjnú ndoboya, kó konguínjojnú nguindyíkon ree kojo xtitjón tangat'anii ja'éenna. ¹³ Kó kuí nii xi kama si'ankjíenjní nga kondókjoajnú kjooaq an. ¹⁴ T'íjñájnú inímajnú nga si'ankjójíenjní kjooaq mí ni xi k'uínjnú nga ko'naxié'ájnú yojojnú, ¹⁵ ngat'a tì ánní xi tsja an én kojo kjoakjíntakón, kui xi nde ngojín xi sa'iín ngayeje xtā xi kondrajnú. ¹⁶ Tanga tì kuí xí si'anek'as'iénjnú, kó xi xchájnú, nts'iéjnú, xinguijnú, amingojnú xi boá sa'lín, kó tjín jún xi si'anek'iénjnú, ¹⁷ kó ngayeje xtā sa'ínc'lojnú tangat'anii ja'éenna. ¹⁸ Kó nde ngojín tsjatokójnú xi xchaja. ¹⁹ Niú tindiyajnú tsí'e nga kjotjo'ájnú.

²⁰ Tanga kji'a nga xchajnú nga naxindaá Jerusalen je ja'atjiyajoon jajún, ja je yajnú nga je jachó nixtin nga je si'ankjie. ²¹ Kó s'e kji'á boá nga kui xtā xi síndo nangui Judea ngatanga nguijin k'ijñá jan, kó xi síndo nguiya naxindaá, ngatjatjo, kó xi nguijin k'ijñá jan síndo ngata 'bos'ienjín naxindaá. ²² Ngat'a nixtin nga kámangajo boá kui nixtiin, tsí'e nga kjotjosón ngayeje ni xi je kji'ta xojoon. ²³ ¡Níma xó ndi ínchjín

xí ndi ndyiya'a kojo xi ndi ndy_{its'}énxchá kui n_{ix}tin xílba!, ngat'a achichí kjoanimá k'uié kuí t'ananguii, kó kjoaxchaán Néná k'okanieé kui xta naxindaá.²⁴ Kó tjín xí kíchá si'anck'ien ni, kó tjín xí konguínjo'niú ngayeje naxindá kó naxindá Jerusalen tsjanié tsjáfe xt_a xi judiojín ngaskande nga kjotjosón nixtiin kui xt_a xi judiojiín.

Bí kama nixtin nga kjoe'e ndií nda xíljin

(Matiq 24:29-35; 42-44; Marko 13:24-37)

²⁵ 'Kó s'e tjín chiboa xi k'uiéé ts'sueé, saá kojo nñoo, kó k'ie t'ananguii boa kamaa ngayeje xtaa, ta bi ta kamaa nga kjonie kojo nga'niuú ndachíkoón,²⁶ xtaa ngaskande koyayá má nga stsakjon ní kjoaa ni ch'o xi kama ngasondiee, ngat'a kjotsie yejé nga'niú xí tjín ndi'ak'ajmi jan.²⁷ Kó s'e kji'lá boá nga xchajnú ndií nda xíljin nga ngo ndi kijindibásón nga kjoe'éjo nga'niuú kojo kjoajee Néná.²⁸ Kji'a nga kui'ítsiya ni nga kama ngayeje kui nii, tindiyondajnú, kó chjanínk'ájnú kjenjnú ngat'a kjoa'naxié'ájnú je tikón tiña.

²⁹ Kjisoo ti katsáyaá ingo énkjín xi bi tsó:

—Tsitsíjenjnú yá xi boajaá to igoó kojo yá xi ngasee,³⁰ kji'a nga ya nga fotjoo xka, tijúnni xi je yajnú nga je tikón tiña chondoboáá.³¹ Ti boá ti ts'én jún, nguije xchajnú nga kjima kui nii, ja je yajnú nga nixtin nga kotíxoma Néná je tikón tiña.

³² 'Jákoxi ni xi xiánjnú'un jún nga kjié koyajín xt_a xi síndo ngot'e tsi tjónjín kjotjosón kui nii.³³ Ndi'ak'ajmii kojo t'ananguii kjoa'a, t_anga énna kjoa'atiyajín.

³⁴ 'Chónjnú yojjnú, ngata 'bíjinjíjnú inijmajnú, kjoaxki'aá, kjoach'ii, kjoaa nii kui ngasondiee, ts'i'e nga kui nixtin jan tsájín k'okaniéjnú,³⁵ ngat'a nga kijindibá xikó maá ngo chjaya xi k'uijnaá ngayeje xtaa t'ananguii.³⁶ Tindiyonda síkijjnú kó ndokjoajnú Néná ts'i'e nga kjotjo'ájnú yojjnú kjoaa ngayeje ni xi s'e kamaa kó ts'i'e nga kia kjóchójnú nguindyíkon ndií nda xíljin.

³⁷ Xki nga nixtiin akóyá Kjisoo nguiya nangoxii kó nga jñoó kijí nínga tikón k'ijñá nínga tjín yá oliboo.³⁸ Kó ngayeje xta naxindaá kijí nangoxii nga tajñoó nga kijínt'ieé ni xi tsíchjiaá Kjisoo.

Bí ts'én ñda jáxaá ts'i'e nga si'anck'ien Kjisoo

(Matiq 26:1-5, 14-16; Marko 14:1-2, 10-11; Juq 11:45-53)

22 Nguije makjachó nixtiin s'ueé pan xi jmí nisanjiín, xi 'mí s'ué paskuaa.² Kó já nguitokoo chiná'mii kojo já chjiniekjoakitii tsangasee kóts'en nga sa'ínk'ien Kjisoo, t_anga katsakjonií xt_a naxindaá.

³ Kó s'e xindajín Satanaa ts'as'ienjin yojoo Judaa, ngo nda apostroo Kjisoo xi Iskariotee ki'mii nga, kui xi ngo já xí tiejoó.⁴ Kó kijí Judaa kó tsíchjiajo já nguitokoo chiná'mii kojo já nguitokoo jajún xi konda nangoxii, kó ñda kóts'en sa'ínk'as'ien Kjisoo.⁵ Kó kui jaá achichí tsja kamaá, kó índajo

nga ton koe'eé Judaa. ⁶Kó Judaa kats'énjo'o, kó tsangasendie kóts'en nga sa'ínk'as'ien Kjisoo ngaxton xta naxindaá.

Kjisoo bi ts'én iskjiniejo ngase nño xta

(*Matiq 26:17-29; Marko 14:12-25; Juq 13:21-30; 1 Co. 11:23-26*)

⁷Tichaan jachó nixtin nga chinie pan xi jmí nisan mindyiajiín, kji'a nga chjen nga ni'lánk'lién ngo chotsanga tsi'e s'ué paskuaa, ⁸Kó Kjisoo katsanguiya Peé kojo Juaa nga bi katsoó:

—Tanguínjnu kó t'íñjandajnu ni xi xinié nga kama s'ué paskuaa.

⁹S'e bi katsó kui jaá:

—¿Ná ní nga mejeén nga k'uijñándajne?

¹⁰S'e Kjisoo bi katsoó kui jaá:

—K'ié xiyájnú'un, nga kuitjás'ienjnú naxindaá kia sakojnú ngo nda xi ts'énja'a ngo nisa ndójoa, kó kui tanguíntjinguijnú ngaskande ndi'a nínga k'os'ien, ¹¹kó bi t'ínjnu ndiaa ndi'a: “Bi tsó nda Mostroo nga bosiya: ¿Ná xó tikón nguindie nínga skjiniejo nño xta tsi'e nixtiin s'ué paskuaa?” ¹²Kó s'e kui ndaa kokojnú ngo nguiya tiyá nk'aa ngo ndi'a xi je tikónda, kia t'íñjandajnu nii.

¹³Nguije kijí kui jaá, boq ts'én kasakoo xikó katsoó Kjisoo, kó kia kats'enda ni chinie tsi'e s'ué paskuaa.

¹⁴Kó nga jachó chiboa, Kjisoo kojo já apostroo kis'inđot'a yamíxa. ¹⁵Kó bi katsoó kui jaá:

—Achichí kamámejénna nga skjínijojnú'un ngase nño kui s'ué paskuaa guindiee nga kjoa'atío an kjoanima. ¹⁶Ngat'a xiyájnú'un nga nguiti skjiniejín an ngase nño ngaskande nga kjojosón nixtin nga kotíxoma Néná.

¹⁷Kó iskjíbe ngo chitsen, katsjá ndok'óchji, kó bi katsó:

—Chjábejnú kui nii, kó ti'angasónjnú xinguijnú, ¹⁸ngat'a xiyájnú'un nga nguiti k'uijín an ndaa tostsijeé, ngaskande nixtin nga kotíxoma Néná.

¹⁹Kó Kjisoo iskjíbe paan, katsjá ndok'óchji, akjángá, nga bi katsoó:

—Kuí xi'bí xi yojona, kui xi si'anck'ien tangat'anii nga kjojoo'ájnú, ti'ájnú kui nii nga kjoa'átsjienjnú an.

²⁰Kó ti boq ti ts'én iskjíbe chitseén nguije iskjinie nño jnoó, kó bi katsó:

—Kuí xi'bí xi chitsen nínga tji'bínda ngo kjoatjatsie tsi'e Néná kojo jún, jín xi xtjoón tangat'anii kjoandaq kjín xta.

²¹Tanga ngot'e, tsja nda xi sa'ínk'as'ienenna k'ié tikónt'ana yamíxa. ²²Kó jakoxi nga ndíi nda xi lijin chjen nga boq kamaa xikó ts'en je kis'inda, tanga jinima xó kui nda xi tangat'anii kui nga si'anck'as'ien!

²³Kó kui jaá íts'iyanií nga askjoyájo xkjín 'yá kuií xi sa'ín kui nii.

Bi ts'én katsáya Kjisoo kjoaa 'yá kuií xi nk'a ngase xaá

²⁴S'e kui jaá askjotíjo xkjín kjoaa 'yá kuií xi nk'a ngase xaá. ²⁵Tanga Kjisoo bi katsoó:

—Já ree xi botixómaá naxindaá, tsjandiéjiín xtaaq nga taxkiya sa'ín ngo ní tsi tsja kjoajíin kó xtaxaá kuí boá xi ndats'én tsó xtaaq.²⁶ Tanga jún nga boajín ni'lánjnú, tasá xi nk'a xaá chjen nga xikoó tsi ngo xi nguindie xaá sa'ín, kó kui xi nguitokojnú chjen nga kui xi sa'ínseén xtaaq kama.

²⁷ Ngat'a, ¿'yá ni xi nk'a ngase xaá, a xi tikón t'a yamíxaá, axá moso xi ts'én'biyá ni chiniee? ¿A kujín xi tikón t'a yamíxaá? Tanga k'ie tikónjin an ngamasienjnú xikoó ngo moso xi tjíts'ensénjnú.

²⁸ Tanga jún boá xi ngatsjé nixtin tindyionjojnú'un nga ja'a an ngayeje kjoachit'ayákón. ²⁹ Kó kuí ni nga an tsjajnú'un nga kotixomajnú, xikó ts'en katsjána Na'mina,³⁰ tsí'e nga xiniejnú kojo s'lojnú t'a yamíxaá kji'a nga kotixoma an, kó kotixomajnú, tsí'e nga si'anjéjnú nga tiejó tjíee xta xi chjiáni naxindá Israel.

Bí ts'én katsáyatjón Kjisoo nga Peé kiajín tso'bájo an Kjisoo katsó

(Matiq 26:30-35; Marko 14:27-31; Juá 13:36-38)

³¹ Kó Ndíaaq tí bí tì katsoó Peé nga:

—Ximo!, Ximo!, xindajín Satanaa tsí'á kjoa, tsí'e kui'lítsanleyajnú xikoó to ndsokoan nñño nga skít'ayakonjnú.³² Tanga an je 'niú tsí'á Néná tsí'e nga s'ijin raá an, kó ji, kji'a nga kosikje yojoo, te'énega'niúu já nts'ie.

³³ Tanga Peé bí katsó:

—Ndíaa, k'ie tikónjoo nga tikónda an, kó jmí tsi ta ndoboya tsí nga nijan konguín, ngaskande nda tsi si'ank'ienna.

³⁴ Kó Kjisoo bí katsó:

—Pé!, xiyaá nga ngot'e nguindiee nga skandáya xanda xi'iin, ján ndiya je kiajín tso'bájo an Kjisoo se jí.

Bí ts'én katsáya Kjisoo kjoaa stsaá, ni chiniee kojo kichaa

³⁵ Kó Kjisoo bí katsoó kui jaá:

—Kji'a nga katsanguiyajnú'un jmí stsa ton, kojo jmí ni chinie kojo jmí ndié kich'ajínjnú kó, ¿a tjín ni xi kichajájnú?

—Tajmíjín ni.

Katsó kui jaá.

³⁶ S'e bí katsó Kjisoo:

—Tanga ngot'e xi tjiín stsa kojo ni chinie nga kjíbe, kó xi jmíjiín kichaa espada, ngatatiá nñño xi bót'a ngaxton, s'e ngat'atsie ngo.³⁷ Ngat'a xiyájnú'un nga chjen nga kjotjosón ngayeje ni xi je kjit'a xojon eén Néná kjoaa an nínga bí tsoó: "Kó nguijiin xtä xi ndajín kamá xki", ngat'a kjoaa ni xi kjit'a kjoaa an je tikoón kóts'en kjuiet'a.

³⁸ S'e bí katsó kui jaá:

—Ndíaa!, jé'en, k'ie tikón jó kichaa espada.

Kó Kjisoo bí katsó:

—Je nda kji'i.

Kjisoo bi ts'én tsíchjiaa Néná*(Matiq 26:36-46; Marko 14:32-42)*

³⁹Kó nguije jataxie Kjisoo kui naxindaá, xikó ts'en síkijí, kijí nínga tikón k'ijñá nínga síndo yá to oliboo, kó kia kijítjinguii xta tsi'e. ⁴⁰Kó nga ts'as'ien kui nguindiee, bi katsoó kui jaá:

—Ndokjoajnú Néná tsi'e nga chját'ayákónjínjnú.

⁴¹Kó Kjisoo kijíboa'á, mejeén xikó kji'i kjin fochóná nga bichijjmí ngo ndijo, kó kia asién tikoó, s'e tsíchjiaa Néná, ⁴²nga bi katsó:

—Na'mi!, tsi mejeén, chje'éxín boe'éní kuí kjoanimaá, tanga jmí tsi ni xi xian an ni xi kama, taśá ngatama ni xi mejeén jí.

⁴³Kó s'e ngo ndítsjie xi chjani ndi'ak'ajmi jan jatokját'aq xi katsjáng'a'niuú. ⁴⁴Kó kji'l'a nga achichí ndá kamaá Kjisoo, taśá má 'niú ngase tsíchjiaa Néná, kó ndandóboaá kitín xikó maá tsi jín xi tjítín ngasón t'ananguii.

⁴⁵Kó nguije jastjíen nga tsíchjiaa Néná, kijíkoón xta tsi'e, kó kamábe nga kjiyojofé tangat'anii kjoandaseen, ⁴⁶kó bi katsoó kui jaá:

—¿Ánní nga ndyitsafejnú? Tisítjenjnú kó ndokjoajnú Néná, tsi'e nga chját'ayákónjínjnú.

Bi ts'én kandobá Kjisoo*(Matiq 26:47-56; Marko 14:43-50; Juq 18:2-11)*

⁴⁷Kó ti ts'enchjia ngase Kjisoo nga jachó ngo sen xta, kojo nda xi 'mí Judaq ngo nda xi tiejó xtaa Kjisoo, kui kijítjoón kui jaá kó kijíkóntiñaá Kjisoo tsi'e nga kotíndsoa'á. ⁴⁸Kó s'e Kjisoo bi katsoó:

—Juda!, ¿a ngo ndsó ni'ínk'as'in ni ji ndíi nda xi'l'in?

⁴⁹Nga kamábe kui já xí síndojo Kjisoo ni xi kamaá, bi katsó:

—Ndia!, ¿a ko'naxiéne kichajne?

⁵⁰Kó ngo kui xtaa Kjisoo kats'én'oón nga tsatíe tjibonijon kixii ngo nda mosoo chiná'mi xi 'niú nk'a xaá. ⁵¹Kó s'e Kjisoo bi katsó:

—Je nda kji'i, xióchonjnú'ne.

Kó s'e Kjisoo kats'énjo tjibonijon, s'e kats'éndaya. ⁵²Kó Kjisoo bi katsoó já nguitokoo chiná'mii, já nguitokoo jajún xi konda nangoxii kojo xta xi xchá xi jachótsoboá Kjisoo:

—¿A chejé án nga kichá espada kojo nga yá kich'lájnú nga jé'e ndoboájnú'un? ⁵³Ndyiojón ndyiojón kis'ijñajojnú'un kia nangoxii, kó ikjiénjínjnú ndsajnú nga kandobájnú'un, tanga kuí xi'bí xi orajnú, kó je kotíxoma nga jñoó.

Bi katsó Peé nga bejín Kjisoo*(Matiq 26:57-58, 69-75; Marko 14:53-54, 66-72; Juq 18:12-18, 25-27)*

⁵⁴Nguije kandobá Kjisoo, tsanguinjo ndi'aq chiná'mi xi 'niú nk'a xaá. Kó Peé nkjin nkjin kijítjinguii Kjisoo. ⁵⁵Kó nguije ítsié ndi'í ngamasieen nditseen,

kia kis'indot'a, kó Peé kia ngamasieen kui jaá kis'ijñajin. ⁵⁶Nga kamábe ngo na chjinie'boo nga Peé kia tikón t'a ndí'ií, askotsijen ndá ndaá s'e bí katsó:

—Kojo kui xtaa xi kistso'bájo Kjisoo nga.

⁵⁷Tanga Peé bí katsó:

—¡Ji xtachjoón, bejín án 'yá kui boq!

⁵⁸Kó nguichí sájín, ngo ndaá kamábe nguiní kó bí katsoó:

—¡Kojo ji kia ndokjoe ni kui jaá!

Tanga Peé bí katsó:

—¡Jmí nda', ánjin boq!

⁵⁹Kó nguije ja'a ma ra tsi ta ngo ora, ingo ndaá bí katsó nguiní:

—Jakoxi nga kui ndaa kia kistso'bájo Kjisoo, ngat'a Galilea chjiani.

⁶⁰Kó bí katsó Peé:

—Ji nda', bejín an ni xi t'íse ji.

Kó nguije boa katsó, tí kji'a askandáya xanda xilijn. ⁶¹Kó s'e Ndíaa kji'a má asko'a Peé, kó Peé ja'átsjieen ni xi katsó Ndíaa nga bí katsoó: "Nguindiee nga skandáya xanda xilijn, ján ndiya je: kijín tso'bájo an Kjisoo, se jí." ⁶²Kó Peé jataxie nditsen jan, kó achichí askandá.

Bí ts'én akajnóchá kojo akjaq Kjisoo

(*Matiq* 26:67-68; *Marko* 14:65)

⁶³Kó kui já xí askondá Kjisoo tsajnókie kojo tsa'on. ⁶⁴Kó yí'má ndyíkon Kjisoo, tsat'a t'anijon s'e bí katsoó nga asíyaá:

—Tíyetjén ji, ¿yání xi ye'eé?

⁶⁵Kó achichí kijín én ch'o tsó xi ki'mií Kjisoo.

Bí ts'én tsanguínjo Kjisoo nguindyíkon jáxaá

(*Matiq* 26:59-66; *Marko* 14:55-64; *Jua* 18:19-24)

⁶⁶Nga kisisieén, kamátkó ngayeje xtaa xi xchaá kui naxindaá, kojo já nguitokqoo chiná'mii kojo já chjiniekjoo'kitií kó kijíjo Kjisoo nínga kamátkó já xí tjiín xá, kó bí katsoó:

⁶⁷—Tsi ji xi Kristoo, t'íyéjne.

Kó Kjisoo bí katsoó kui jaá:

—Tsi xiyájnú'un, s'ijinjímnú, ⁶⁸kó tsi ngo ni kosiyajnú'un, kondókjoajojíjnú'un, tí nde kuintjoenjíjnú'un. ⁶⁹Tanga ndeskande ngot'e kui'ítsiya ni nga ndií ndaá xilijn k'uijñá nga kixii Néná xí tsí'e ngayeje nga'niú xí tjiín.

⁷⁰S'e ngayeje xtaa bí katsó xtín:

—¿A jí tsóboq xi ndií Néná?

S'e Kjisoo bí katsó:

—Tí jún ní xi boq ndyí'míjnú.

⁷¹Kó s'e bí katsó kui jaá:

—Je nde nguiti jmí chistikoo chjénjínná. Ngat'a ñá má xi kanda'yá nga tsíchjia ts'oa.

Bí ts'én tsanguínjo Kjisoo nguindyíkon Pilatoo*(Matiq 27:1-2, 11-14; Marko 15:1-5; Juq 18:28-38)*

23 Kó nga jastjéen ngayeje xtá kjiín, tsanguínjo Kjisoo nguindyíkon Pilatoo.² Kó íts'iyanii xtaaq nga yínguítal'in Kjisoo nga bí katsó:

—Kui ndaa kamáyajne nga indiyátsabeé xtá naxindaá, kó íchjaá xtaa tsi'e nga tsjaá ton xi machjítjé niij nda xtitjón Sesaa, kó kanda'yájnë nga kuí xó xi Kristoo, ngo nda re, katsó.

³Kó s'e Pilatoo bí katsó nga asíyaá:

—¿A jí xí nda Ree xta judioo?

Kó Kjisoo bí katsó:

—Ja jí xí boaq se.

⁴Kó s'e Pilatoo bí katsoó já nguitokoo chiná'mii kojo xtaa:

—Sakójinna mí kjoaq nga si'anjénií kui ndaa.

⁵Tanga kui jaá 'niú kats'én nga bí katsó:

—Indiyátsabeé xtá naxindaá, nga akóyá ngayeje nangui Judea, nga íts'iyanii nangui Galilea ngaskande k'iee.

Bí ts'én kis'ijña Kjisoo nguindyíkon Erodee

“Kó Pilatoo nga tsint'ié kuí nii, asíya tsi nangui Galilea chjiani kui ndaa, ⁷kó nga tsint'ié nga Kjisoo kia chjiani nangui xi botixómaá nda re Erodee, kui katsanguiyakoon, ngat'a kui nixtiin naxindá Jerusalen tikón Erodee.

⁸Kó nda re Erodee nga kamábe Kjisoo achichí tsja kamaá, ngat'a ant'ena nga kamámejeén kamábe 'yá kuí xí Kjisoo, ngat'a achichí ni tsint'ié kjoaq kui, kó ts'énkoyaq nga skuié nga sa'ín ngo kjoandikón. ⁹Kó achichí ni xi asíyaá, tanga jmí nixtin tsíchjia Kjisoo. ¹⁰Kó já nguitokoo chiná'mii kojo já chjiniekjoaktii, achichí 'niú yínguítal'in. ¹¹Kó s'e Erodee kojo jajuún, kats'ench'o kojo tsajnókie Kjisoo, kó ngo njño xi tsja kji'i kats'énkajá, s'e katsanguiya'oyá nguinií Pilatoo. ¹²Kó Erodee kojo Pilatoo kamátjoó xkjín kuí nixtiin, ngat'a kamách'orií xkjín ngas'e.

Bí ts'én katse'éjeé nga si'anck'ien Kjisoo*(Matiq 27:15-26; Marko 15:6-15; Juq 18:38—19:16)*

¹³Kó s'e Pilatoo ítikó ngayeje já nguitokoo chiná'mii, kojo já xí botixómaá nangui kojo xtá naxindaá, ¹⁴kó bí katsoó kui jaá:

—Jún jé'echinijnú'un kui ndaq nga kuí xí ts'énmindyátsabeé xtá naxindaá, tanga je asíyaá nguindyikónjní kó jmí jéjiín kjoaq ngayeje ni xi akjanguita'linjnú kui. ¹⁵Kó ti nde Erodee kats'énjéjiín ngat'a katsanguiya'oyána, kó ja je yajnú, jmí jéjiín xi kama si'anck'ien ma ni, ¹⁶nguije kjoaqá, s'e kuintjoen.

¹⁷Xki nga ma s'ueé ngo xi tji'yá ndoboya xi 'naxié. ¹⁸Tanga ngayeje xtaa ta ngo nda kamá nga bí katsó nga askandáya:

—¡Nga ni'lánk'ién kui ndaa, kó chjándejnë Barrabaa!

¹⁹Kui ndá xi 'mí Barrabaa ndóboya kananguis'ien ngat'a kjoaxchán kats'én naxindaá, kojo kjoaa nga ngo ndá kats'énk'ién. ²⁰Pilatoq ingo ndiya tsíchjiajo nguini xta naxindaá, nga kamámejeén tsintjoen Kjisoo. ²¹Tanga kui xtaa achichí 'niú tsí'á nga bi katsó nga askandáya:

—¡Tjat'e ji kro, tjat'e ji kro!

²²Tanga Pilatoq xi ma jáñ ndiya tsíchjiajo xta naxindaá, kó bi katsoó:

—Ja, ¿mí ni xi ndajín xi kats'én? Nde ngojín ni xi kats'én xi kama si'anck'ien ni, nguije kjoaa, kuintjoen an.

²³Tanga xta naxindaá 'niú askandáya nga tsí'á tsí'e nga akjat'a kro, kó ndaa xtaa tásá má 'niú kanda'yá ngase. ²⁴Kó s'e Pilatoq katsjá kjoa tsí'e nga kama ni xi tsí'á xta naxindaá, ²⁵kó ijñandé kui ndá xi kananguis'ien ndóboya ngat'a kjoaxchán ts'axieé kojo ngo ndá kats'énk'ién, kó kats'énk'as'ien Kjisoo xikó ts'en kamámejeén kui jaá.

Bí ts'én akjat'a kro Kjisoo

(Matio 27:32-55; Marko 15:21-32; Jua 19:17-27)

²⁶Kó nguije tjiffjo Kjisoo, ngo nda xi kjo'e ni nguijin jnoo xi 'mí Ximo, xi chjiani naxindá Sirene, kini'aán kjoa'niu nga tsa'anijín kroo nga kijítjinguii Kjisoo.

²⁷Kó achichí má xta kjiín xi kijítjinguii, kojo kjiín ínchjín xi achichí askandá nga on kamaá ni xi kini'ánjo Kjisoo. ²⁸Tanga Kjisoo asko'á kui ínchjiín kó bi katsoó:

—Jún boa ínchjiín Jerusalen, ngata ánjin cha'ájnú'un, tásá ti jún xi cha'átjénú yojojnú kojo ndijnú xi cha'átjénú, ²⁹ngat'a s'e kjindibá nixtin nga bi katsó xtaa: “¡Achichí rā tsjaá ínchjín xi ndí kamá, kojo ndoboandi xí jmí ndi kis'eyajín, kojo chiki xi jmí ndi kats'énchajín!” ³⁰Kó s'e kui'ítsiya ni nga xtaa bi katsoo k'ijñaa: “Ngat'ákaniejné yojojnú kojo naxii, kó ngata'májnē.” ³¹Ngat'a tsi kui nií ni'ánjo yá xkjuieén, ¿mí ni xi si'anjo ngase xi kixi?

³²Nguijó kui já xí ndajiín nijan tsanguínjo kojo Kjisoo tsí'e nga si'anck'ien nga. ³³Kó nga jachó ngo nguindie xi 'mí ndatoko inimaa kia akjat'a kro Kjisoo kojo ngajó kui já xí ndajiín, ngo nga fojnií kojo ngo nga skoón.

³⁴Tanga Kjisoo bi katsó:

—Na'mi!, tijinjetakíin kui xtaa, ngat'a bejín ni xi ndyits'en.

Kó jajuún katsatonjo kjoach'áñcha njñoo. ³⁵Kó ngayeje xta naxindaá kia síndo nga askotsijen ndá ndaá ni xi kamá kó ngaskande jáxaá tsajnókie Kjisoo nga bi katsó:

—Ts'axié'á kje'e xta, ngat'axié'á soboa yojoo tsi kui xi Kristoo, ndá xi ja'ájin Néná.

³⁶Kojo jajuún kijíboa'át'aa tsí'e nga tsajnókie, kó bino san katsjaá, ³⁷kó bi katsoó:

—Tsi ji xi ndá ree xta judioo, 'naxié'é soboe ji yojoo.

³⁸Kó toko kroo^q kisit'a ngo yátie xi bí tsó: "KUÍ XI'BI XI NDA REE XTA JUDIOO."

³⁹Ngo nda xi nijan tjienboa'a íts'iyanii nga ch'o katsó nga bí katsooó:

—Tsi ji xi Kristoo, 'naxié'é yojoó kó 'naxié'éjne jín nga.

⁴⁰Kó nga tsíchjia^q nda xi ingoo kats'énxchánjo nda xi tsíchjiaa nga bí katsooó:

—¿A nde Néná ndakinjín ji nga tí kui jé ti'bíchjí jí? ⁴¹Ñá, nga jakoxi, nda kji'i nga kini'ánjéná ngat'a ni xi tsoboáná kjoaq ni xi kini'án kuí xí tjisákoná, tanga Kjisoo jmí ni kats'énjín.

⁴²Kó kui ndaa^q bí katsooó Kjisoo:

—Ngatja'átsjíeen an nga kjindibé ni nguindie nínga botíxome.

⁴³Kó Kjisoo^q bí katsooó:

—Jakoxi ni xi xian, nga ngot'e kuindinye ní ndi'ak'ajmii.

⁴⁴Kó nga kamándis'ueé, ngaskande nga kamá chiboa^q jáñ nga kamánguixón, ngayeje ngasondiee nga kamá jñó, ⁴⁵ts'ueé kamá jñó, kó njñoxo'bäa^q nangoxii jó tjín kamá nga katjondiyá. ⁴⁶Kó s'e Kjisoo achichí 'niú askandáya nga bí katsó:

—¡Na'mi!, nguiya ndse 'bíjñá an inimana!

Nguiye boa katsó, je'etsí'oón s'e k'ien.

⁴⁷Nga kamábe nda nguitokoo jajuún ngayeje kui ni xi kamaá, katsjaá kjoaje Néná nga bí katsó:

—Jakoxi nga nda kixi kamá kui ndaa^q.

⁴⁸Kó ngayeje xtákjín xi kamátkó kuí nguindiee xi kamábe ni xi kamaá, nga kijí ndi'a^q ngaskande ye'é maá niseen. ⁴⁹Ngayeje xtä xi nda kamábe Kjisoo, kojo ínchjín xi tsajátjinguii ndeskande nangui Galilea, ta kjín kixindyia nga askotsijen ni xi kamaá.

Bí ts'en akjanijín Kjisoo

(Matiq 27:57-61; Marko 15:42-47; Iug 19:38-42)

⁵⁰Kó ngo nda xi 'mí Kosie, xi chjiani naxindá Arimatea^q ngo ndi nangui xi chjiani Judea, xi tjiín xá, xi ndaxta kojo xi kixi, ⁵¹kui ndaa^q, tí ts'énkoya^q nga kojíxoma Néná, kó ndsejenjín kamá kui jaá kjoaa ni xi kats'en, ⁵²kijíkoón Pilatoo, kó tsí'aá yojo k'ieen Kjisoo, ⁵³kó nguiye ts'engengui kroo^q yojo k'ieen Kjisoo ítsakjájón ngo njñontjibeé s'e íjñá yojoó Kjisoo ngo nguiya ngatsjo xi tikón ngo naxi xi kjie jmíjín xi fonijín. ⁵⁴Nixtin nga pirjñe má nga boa kamá, kó je ma makjíts'iyanii nixtin ndikoón.

⁵⁵Ínchjín xi tsajátjinguii Kjisoo ndeskande nangui Galilea kamábe ngatsjoó kojo kóts'en akjajña yojo k'ieen Kjisoo. ⁵⁶Kui ínchjíin kijí ndi'a^q kó íjñanda ndasíjen kojo tosijen, kó kats'énkja'yá nixtin ndikoón ngat'a boa ts'én kjit'a kjoabotíxomaa.

Bí ts'én ja'á'yaá Kjisoo

(*Matiq 28:1-10; Marko 16:1-8; Jugu 20:1-10*)

24 Nixtin tjoón xomanaa, kji'a nga tajñóya ngasee, kijí kui ínchjiín kojo kje'e ngasee ínchjín nínga tikón ngatsjoó Kjisoo, kó ndyiya'a nisijen xi íjñanda. ²Kó kamábe nga ndijo xi kji'lixtioo ngatsjoó je kamátifaá, ³kó nga ts'as'iен nguiyaa, nguiti kasakojiín yojoo Ndia Kjisoo. ⁴Kó ta bi ta kamaá kjoaa kui niij, kó jó já ja'a t'a tiñaq xi ndiyijayá njño xi 'na, ⁵kó achichí katsakjonní, kó ít'a maá kjen t'ananguii, s'e bi ki'mií kui ínchjiín:

—¿Mí kjoa nga nguijii xta xi jesón ndyimindyiséjnú kui xi tikoón?

⁶K'iejin tikón, je ja'á'yaá. Ngatja'átsjienjnú ni xi tsíchjia ngas'e nga kis'ijña nangui Galilea, ⁷nga bi katsó: Chjen nga ndíi nda xi ijin si'ank'as'iен nguiya tsja xtajé, s'e kjót'a kro, kó xi ma ján nixtin kjoa'á'yaá.

⁸Kó kui ínchjiín ja'átsjieen én xí tsíchjia Kjisoo. ⁹Kó nguije jataxie ngatsjoó, katsáyaá kui niij nga tiengo já apostroo kojo ngayeje xta xi ngasee. ¹⁰Nariya Lena, Najuaá, kojo Nariya naaa Sandiyaá, kojo ínchjiín xi ngasee boá xi katsáyaá kui niij já apostroo. ¹¹Tanga kui jaá ta kjoatsabé kamaá ni xi katsáya kui ínchjiín, kó kis'ijinjiín.

¹²Tanga Peé jastjén, tsangá má kijí nínga tikón ngatsjoó, kó nga askotsijen nguiyaa, kamábe nga ta njñoo xí síndo, kó kijí ndi'aa nga kijíndikoón ni xi kamaá.

Kjisoo bí ts'én tsíchjiajo jó xtäq xi ndyifí ndiya Emau

(*Marko 16:12-13*)

¹³Kó ti kui nixtin jó já kijí xtjeen ngo ndi nangui xi 'mí Emau, xi ma ra tie ngo kilometro tikónnii naxindá Jerusalen, ¹⁴kó kui jaá ndyichjiajo xkjín kjoaa ni xi kamaá. ¹⁵Kó tjienga ndyichjiajo kojo ndyichjiatiyo xkjín, ti kui Kjisoo kijíkóntiña, kó nijan kitsjien nga kijí kojo kui jaá, ¹⁶tængä kui jaá akja'maa ndyikon tsil'e nga skuijén tsi Kjisoo. ¹⁷Kó s'e Kjisoo bí katsoó kui jaá:

—¿Mí ni xi ndyindokjoajnú tjienga ndyimonguínjnú, kó mí kjoaa nga ndasen tindyionjnú?

¹⁸S'e bi katsó nda xi 'mí Kleofaa:

—¿A ta jí tsí nda xi kiajín ndokjoe ni naxindá Jerusalen xi bejín ngayeje ni xi kamá kui nixtiin?

¹⁹Kó Kjisoo bí katsoó kui jaá:

—¿Mí ni xi kamá?

S'e bi katsó kui jaá:

—Kjoaa Kjisoo nda xi chjiani naxindá Nasaret, nda chjinie'eén Néná, xi nk'a kamá xaá kjoaa ngayeje ni xi kats'én, kojo ni xi akóyá kó kamáyandikón nguindyikon Néná kojo ngayeje xta naxindaá, ²⁰kojo kóts'en kini'ánk'as'ieen já nguitokoo chiná'mii kojo já xí botixómaá tsil'e nga kini'ánk'ién nga akjat'a kro. ²¹Tængä jin kichiyájne nga kui xi k'oxié'a

ngayeje xtá xi chjiani naxindá Israel, kó je jáñ nixtinnii nga kamá ngayeje kui nii. ²²Kó kjín má ínchjín xi ndokjoanijin xi kijíndikoón ngoye tajñó nga kijí ngatsjoó, ²³kó nga kasakojíñ yojoo Kjisoo, ndyitsó nga akako xoó ndítsee Néná xi katsáya xoó nga tikón Kjisoo. ²⁴Kó kijí já xí ndokjoanijin kia ngatsjoó, kó xikó má kji'i ni xi katsó ínchjiín boá má kji'i ni xi kamábe, tanga kamábejín Kjisoo.

²⁵Kó Kjisoo bi katsoó kui jaá:

—¡Mí xí ta chini nijnú kojo mí xí ta chjiya inimajnú nga kis'ijinjínjú ngayeje ni xi katsó já chjinie'eén Néná! ²⁶¿A yajínjúnú nga Kristoo chjen nga tsie kjoanima kjoa'latio nguindiee nga sakö kjoaje xi tsí'e?

²⁷Kó katsáyaá ni xi kxit'a xojon eén Néná nga íts'iyani ndeskande kjoakiti xi kats'enda Moisee, s'e ngayeje ni xi kats'én'indó já chjinie'eén Néná xi tsáya kjoaa Kjisoo.

²⁸Nguije makjachó má nangui Emau, Kjisoo kats'én xikó tsi kjin ngase kijí. ²⁹Kó kui jaá 'niú tsí'áa nga bi katsoó:

—K'ie tindyinjejne ngat'a je kamánguixón kó je mején kjimajñó, kó Kjisoo ts'as'iengo kui jaá kó kia kis'ijñajo. ³⁰Kó nguije síndo t'a yamíxa, Kjisoo iskjibe paan, kats'énchikonné, akjángá s'e katsjaá kui jaá, ³¹kji'á boá nga katjox'a ndyíkon kui jaá, kó kamákjiín nga Kjisoo xílba, tanga ta yajín ná kijí Kjisoo nguijee. ³²Kó jak'ie ja nga jan bi katsoó xkjín kui jaá:

—¿A kitíngajín inimaná nguiyaá ndiyaá tjienga tsichhiajoná kjoaa xojon eén Néná?

³³Kó tì kui chiboa jastjíen kó kijí'oyá nguiní kui jaá naxindá Jerusalen, kó kamábe nga je síndotikó nga tiengo já apostroo kojo xtá xi síndojo kui jaá, ³⁴xi bi ndyitsó:

—Jákoxi nga je ja'á'yaá Ndiao kó je jatokjaá Ximoo.

³⁵Kó kui jaá katsáya kui ni xi kamá nguiyaá kojo kóts'en kamábe nga Kjisoo kji'a nga akjángá paan.

Kjisoo bi ts'én akoó yojoó xtá tsí'e

(Matio 28:16-20; Marko 16:14-18; Jua 20:19-23)

³⁶Tjienga ta kó ndyichjia kui nii, Kjisoo jachó kó kia kis'ijñajíin ngamasieen kui jaá kó bi katsoó:

—Ngas'iejnú kjoaxió.

³⁷Kó s'e achichí katsakjonní, ngat'a kats'énkjó nga asién nixtin kamaá xi ndyibe. ³⁸Kó Kjisoo bi katsoó kui jaá:

—¿Ánní nga ndyindakónjúnú, kó mí kjoa nga kui nii ndibaá inimajnú?

³⁹Tsitsíjenjúnú ndsa án kojo ndsako án, án boá, tì'anjojnú'un kó tsitsíjenjúnú, ngat'a ngo asién nixtin jmíjiín yojoo kojo nda, xikó ts'en yajnú nga tjínna án.

⁴⁰Kó nguije boá katsó akoó tsja kojo se. ⁴¹Kó nga ta kó nde kjie s'ijinjiín, kjoaa kjoatsjaa, achichí kijíndikoón, s'e Kjisoo bi katsoó:

—¿A tjín chiíjnú ni chinie?

⁴²S'e kui jaá chií tjio tsjó katsjaá, ⁴³kó Kjisoo iskjíbe, s'e iskjinie nguindyikon kui jaá. ⁴⁴S'e bi katsoó kui jaá:

—Kuí eén xí tsíchjia an, kji'a nga ta kó tikónjojnú'un: nga chjen nga kjetjosón ngayeje ni xi kjit'a kjoaa an nguiya kjoakitiij Moisee, xojon xi kats'én'indó já chjinie'eén Néná kojo xojon salmoó.

⁴⁵S'e iskjíx'a kjoakjíntakoón ts'i'e nga kamákjiín ni xi kjit'a xojon eén Néná, ⁴⁶kó bi katsoó:

—Boa ts'én je kjit'a nga chjen nga tsie kjoanima kjoa'atio Kristoo kojo nga xi ma ján nixtin kjoa'á'yaá nguijiin xtä xi je jesón, ⁴⁷kojo nga chjen nga ja'eén Kjisoo k'uiníjmií xtaa nga sa'ínk'oyá yojoo kjoaa já xi ndyits'en kojo ts'i'e nga si'anjetakoón jeé ngayeje xtä naxindaá, kó naxindá Jerusalen kui'ítsiya ni. ⁴⁸Kó jún xi chistikojnú kjoaa ngayeje kui nii. ⁴⁹Kó ngot'e'ne sanguiyajnú'un ni xi katsáyatjón Na'lmina nga tsja kjoaa jún, tanga k'ie tindyionjnú naxindá Jerusalen, ngaskande nga sakojnú nga'niú xí kjindibáni ndi'ak'ajmi jan.

Bi ts'én kijí Kjisoo ndi'ak'ajmi jan

(Marko 16:19-20)

⁵⁰Kjisoo kijíjo já apostroo ngaskande naxindá Betania, kia iskjinink'a tsja, kó kats'enchikonñé. ⁵¹Kó tjienga kats'enchikonñé, kijiboa'át'axiín, kó Kjisoo kachjanink'a ndi'ak'ajmi jan. ⁵²Kó kui jaá, nguije kats'entsjajo, achichí tsja kis'iee nga kijí nguiní naxindá Jerusalen, ⁵³kó ngatsjé nixtin kats'entsjajo kojo kats'enchikonñé Néná nguiya nangoxii. Boa kji'i.